

Is Nengeulaula

Te Menge Epustul Ni Jesu Kristu

Is Mehitenged te Nengeulaula te Menge Epustul ni Jesu Kristu

Is midsurat kayi he libru te egngезanan te Nengeulaula te Menge Epustul ni Jesu Kristu, iyan is duktur he egngезanan ki Lucas. Ne sumpul heini te nehuna he surat din mehitenged te mibpen-ulaula ni Jesus hein kayi pa sikandin te kelibutan su wazè pa sikandin med-uli diyà te langit. Ne egkevasa ta kayi te ikezuwa he surat din is дума he menge vaal ni Jesus su impelaus din is menge vaal zin pinaagi te Wagas he Mulin-ulin he impeulin din te menge sakup din.

Nevatun si Jesus pehendiyà te langit, piru hein wazè pa haazà meulaula, ke sikandin diyà te menge epustul te, “Ebegayan kew zin te gehem emun egkelumunan kew en te Wagas he Mulin-ulin, ne is tudtul te keagi ku, idsangyew niw zini te Hiruselim wey id-eneb niw zini te prubinsya he Hudiya wey ziyà daan te prubinsya he Semarya wey minsan hendei zini te egketemanan te kelibutan” (Nengeulaula 1:8). Ne iyan iyan haazà nehitaवु su iyan dan midhunaan sengyawwi te Meupiya he Tudtulanen mehitenged ki Jesu Kristu is inged he Hiruselim, ne zutun mahabet he menge Hudiyu is nemeketuu ki Jesus (Nengeulaula 1:1–8:3). Iyan, hein neuma is timpu he mibpesipelahan is menge sumusundan ni Jesus te zuma zan he menge Hudiyu ziyà te Hiruselim he wazà medtuu ki Jesus, nemelaguy sikandan pehendiyà te prubinsya he Hudiya wey Semarya. Ne hein dutun dan en, insangyew zan is Meupiya he Tudtulanen taman te mahabet en dutun is nemeketuu ki Jesus (8:4–12:25).

Neuma is timpu he zutun midtigum is menge tumutuu zuen te inged he Entiyukya ne midsugù dan si Pablo wey si Birnabi te kedlayun te zagat pehendiyà te meziyù he menge lugar su wey zan daan mekewali zutun. Ne puun dutun insangyew ni Pablo is Meupiya he Tudtulanen mehitenged ki Jesus diyà te mezakel he nekedseselekawà he menge inged lavew en diyà te menge etew zutun he kenà menge Hudiyu (13:1–28:31). Ne heini is kedseweza te tudtul mehitenged ki Jesus taman en guntaan is ked-ul-ulaha kayi, su is Wagas he Mulin-ulin, kemulu ebegey te gehem diyà te menge sakup ni Jesus su wey mekezineg te Meupiya he Tudtulanen is minsan hentei.

1 ¹Minahal he suled ku he Teofilo:
 Diyà te nehuna he keguguzi ku kenikew, insurat ku is langun he mibeelan wey is langun he impenurù ni Jesus egenat dà dutun te aney en sikandin mebpenerù ^{2,3}taman en te kebetuna kandin te Megbevayà pehendiyà te langit. Hein midhimetayan si Jesus ne nevanhew, mezakel is paagi te kebpaahaa zin te minge epustul te timaan he nevanhew en sikandin. Su seled te kepatan he andew zutun, layun sikandin ebpaahà kandan. Impenurù din kandan is kedhadì te Megbevayà. Ne te wazè pa sikandin betuna pehendiyà te langit, impenurù din daan pinaagi te gehem te Wagas he Mulin-ulin is ebeveelan din kandan te minge epustul he zaan he nepili din. ⁴Ne sengeandew te netigum dan, migkagi zin kandan he, “Kenè kew med-awà dini te inged he Hiruselim, kekenà, medtagad kew taman te kenè pa ibegey keniyu kes impenaad te Amey tew he Megbevayà. Nekagi ku en heini keniyu he zaan. ⁵Te timpu pa ni Juan, wahig is imbewtismu zin te minge etew. Iyan, mekepira zà guntaan iyan kebewtismuwi keniyu is: edlumunan is kada sevaha keniyu te Wagas he Mulin-ulin.”

Is Kegkevatun ni Jesus Diyà te Langit

⁶Ne zuen timpu he nengetigum dan en maan. Ne mid-insaan dan si Jesus, ke sikandan te, “Nengazen, iyan en be heini sikan is timpu te kedtevangi nu kenami te minge kevuwazan ni Israyil su wey iuli dini te kenami he inged he Israyil kes daan he kegehem dey he edhedian key te keugelingen dey he hadì?” ⁷Ne midtavak si Jesus te, “Iyan dà is Amey tew he Megbevayà duen din kegehem te kegketau ke keenu he timpu egketuman is ebeelan din, ne wazà itugut keniyu is kegketueni kayi. ⁸Iyan,” ke si Jesus, “ebegayan kew zin te gehem emun egkelumunan kew en te Wagas he Mulin-ulin, ne is tudtul te keagi ku, idsangyew niw zini te Hiruselim wey id-eneb niw zini te prubinsya he Hudiya wey ziyà daan te prubinsya he Semarya wey minsan hendei zini te egketemanan te kelibutan.” ⁹Ne te nekagi ni Jesus haazà, nevatun sikandin pehendiyà te langit. Ne te kemulu zan pa edlingahà su ed-ahaan dan is kegkevatun din, neelangan si Jesus te gapun ne naawà sikandin diyà te ked-ehè dan. ¹⁰Ne te kemulu pa sikandan dutun edlingahà diyà te langit, mibpaahà kandan diyà te uvey zan is dezuwa he maama he ebpaanganlag is ugelingen dan. ¹¹Ne migkagi heini is dezuwa te, “Sikiyu is minge tigGeliliya, maan is kemulu kew pa edlingahà diyà te langit? Heini si Jesus he neehè niw he nevatun pehendiyà te langit, keuzemè en edlikù dini te tanà, ne is kedlikù din, ne iring ded daan te kegkevatun din.”

Is Kebpilia te Id-ilis ki Hudas

¹²Ne zutun mid-awà is minge epustul ziyà te wuvungan he egngезanan te Ulivuwan, ne mid-ulì dan diyà te inged he Hiruselim. (Haazà is

buvungan, uvey zà te Hiruselim; sengekilumitru zà buwa is keziyù din.)
 13Ne hein nekeuma zan diyà te Hiruselim, mid-ulì dan diyà te rugu he zivavew ziyà te valey he dus endanas he ubpeey zan. Iyan heini ensi Pedro, si Juan, si Santiago, si Andres, si Felipe, si Tomas, si Bartolome, si Mateo, si Santiago he anak ni Alfeo, si Simon Siluti, wey si Hudas he anak ni Santiago. 14Is langun kandan, nesevaha is gehinawa zan te ked-ampù diyà te Megbevayà ne midtampu zaan is menge vahi. Elin dutun si Maria sikan is iney ni Jesus wey is menge hazi ni Jesus.

15Ne nekepira zutun, nengetigum is menge tumutuu, menge nenggatus wey keluwaan sikandan is mibpetemtempuwà dutun; ne midhitindeg si Pedro is egkagi te, 16“Menge suled, kenà egkehimu he kenà egketuman kes netagnà he insurat he Lalag te Megbevayà. Dengan mid-ulinan si David te Wagas he Mulin-ulìn ne netagnè din si Hudas kes mibpalad ki Jesus diyà te edakep kandin. 17Si Hudas, дума tew he epustul, su insarig daan diyà te kandin is ebpeveelan kenitew te Nengazen,” ke si Pedro.

18(Ne si Hudas, impemasa zin te tanà kes insuhul kandin tenged te kelelalung din ne neulug sikandin ne nekelangkeb ne mibetu is getek din ne nekepeyapat is bituka zin. 19Ne hein netuenan heini te menge tigHiruselim, migngезanan dan haazà is tanà te Ekildama he ke và dà egkegiya, tanà he nepemasa te selapì he imbayad te kedhimetayi te etew.)

20Ne ke si Pedro te, “Insurat dengan kes netagnà diyà te libru te menge Salmu he edhenduen te,

‘Ewai niw is ed-ubpaan din;

kinahanglan he wazè en ed-ubpà dutun.’

Duen daan insurat he lalag he edhenduen te,

‘Sikan is ebpeveelan kandin,

ipeveeli niw te zuma.’

21,22Ne tenged dutun,” ke si Pedro, “kinahanglan he ebpien is sevaha he ebpekeuman kenitew te sepulù wey sevaha he epustul. Kinahanglan he zuma tew zengan dutun te kebpekiduma tew te Nengazen tew he si Jesus, puun pa te kebpepemtismu ni Juan taman en te kebetuna ki Jesus pehendiyà te langit, su kinahanglan he ebpeketampu kenitew te kebpenistigus te kegkevanhew ni Jesus,” ke si Pedro. 23Ne mibpilian dan is dezuwa he maama, si Jose Hustu wey si Matias. (Is sevaha he ngazan kayi te si Jose ne si Bersabas.) 24Ne zutun in-ampù sikandan eni Pedro ke sikandan te, “Nengazen, iyan ka nesayud ke hengkey is diyà te gehinawa te minsan hentei. Ne guntaan ipeehè nu kenami ke hendei zapit kayi te zezuwa is nepilì nu 25he mehimu he epustul he id-ilis ki Hudas. Su si Hudas, mid-engkezan din kes mibpeveelan kandin ne midhendiyè en te hustu he ed-ulian din.” 26Ne hein nepasad dan te ed-ampù midripa zan haazà is dezuwa ne iyan neripahan si Matias, ne nehimu sikandin he sevaha te menge epustul iring dutun te sepulù wey sevaha.

Is Kebpekeuma te Wagas he Mulin-ulin

2 ¹Ne hein andew en te pista he eggezanan te Pintikusti nevrurun kes langun he minge tumutuu ziyà te sevaha he valey. ²Ne netekewtekew zan te zuen utew mezaging he nezineg dan he ebpuun diyà te langit he henduen be te edselenuhug he utew mevendes he keramag. Ne haazà is daging, midsagkung dutun te seled te valey he nevruran dan. ³Ne zutun nengeehè dan is henduen be te minge regreg te hapuy he nekedsisiveysivey he nemekeuntut te kada sevaha kandan. ⁴Ne mibpurungan ulini te Wagas he Mulin-ulin is kada sevaha kandan, ne netekewtekew zan pintezi te minge kinegiyan he kenè dan egketuenan sumalà is gehem he imbegey kandan te Wagas he Mulin-ulin.

⁵Duen minge Hudiyu ziyà te Hiruselim he ziyà ebpemuun te minsan hendei he inged dini te tungkup te kelibutan ne minge metinumanen sikandan te sugù te Megbevayà. ⁶Ne hein nezineg dan haazà is mezaging, nerivurun sikandan dutun. Ne utew zan nengeinuinu su is kada sevaha zutun te minge etew he nerivurun, egkezineg din is kandin he keugelingen he kinegiyan he egkekagi zutun te minge tumutuu. ⁷Netikawan dan ne nengeinuinu zan ne mibpein-inseey zan te, “Hengkey vuwa heini? Minge tigGeliliya is egkagi. ⁸Ne maan is egkezineg ta is kegkagi zan he iyan egkegamit dan is kinegiyan te kada sevaha kenitew? ⁹Su zuen kayi te minge zuma tew minge tigPartya, minge tigMidya, wey minge tig-Ilam. Ne is duma kenitew, diyà ebpemuun te Misuputamyà. Duen daan tigHudiyu, tigKepedusya, tigPuntu, tig-Asya, ¹⁰minge tigPrigya, minge tigPempilya, minge tig-Ihptu wey ebpemuun te minge inged diyà te Libya he uvey te Sirini. Ne zuen daan dini minsan minge tigRuma he minge Hudiyu wey kenà minge Hudiyu he nemeketuu zaan te tinuuwan te minge Hudiyu. ¹¹Duen daan minge tigKrita wey minge tig-Erabya. Ne minsan pa te kenà ebpeked-iring is kinegiyan tew, is kada sevaha kenitew, nesavut din is egkegiyen su kandin he keugelingen he kinegiyan is egkegamit kayi te minge tigGeliliya. Ne impesavut dan kenitew is utew meupiya he egkein-inuwan he vaal te Megbevayà,” ke sikandan. ¹²Ne is langun he minge etew zutun, utew zan nengeinuinu, su wazè dan mesavut haazà is nehitavù. Ne kenà egkerintas is kebpein-inseey zan he egkagi te, “Hengkey vuwa heini?” ¹³Ne is duma kandan, edsumpeliten dan haazà is minge tumutuu he egkagi zan te, “Egkengelangut heeyan!”

Is Kedwali ni Pedro Hein Andew te Pintikusti

¹⁴Ne zutun midhitindeg si Pedro ne midhitindeg daan haazà is minge zuma zin he sepulù wey sevaha he epustul. Ne mibpekezesen sikandin he egkagi te, “Sikiyu is minge zuma ku he minge Hudiyu wey langun niw

te minge meginged dini te Hiruselim, pemineg kew wey niw mesavut is egkegiyen ku. ¹⁵Kunaan niw ke egkengelangut heini is minge zuma ku. Iyan, kenà egkehimu su liwazè pa he ebpemenahik is andew. ¹⁶Iyan heini kes netagnà dengan te ebpeneuven dengan he si Joel, su ke sikandin te,

¹⁷‘Migkagi is Megbevayà te,

“Keuzemà te ketepusan he timpu, sikiyu is tivuuk he menusiya,
ibpelumun ku keniyu is Wagas he Mulin-ulin.

Ne zutun ebpeneuven is minge anak niw he maama

wey is anak niw he vahi ne ibpesavut dan te minge etew is lalag ku.

Duen minge menguhed he ebpuwasan ku is id-ehè dan

wey zan maahà is kenà egkeahà te zuma.

Ne zuen minge megurang

he edhimuwen ku he minge menenegeinep.

¹⁸Su sikan is minge suluguen ku,” ke sikandin,

“minge vahi se maama, ibpelumun ku kandan keuzemà is Wagas he
Mulin-ulin

ne ebpeneuven ku sikandan

ne ibpesavut dan te minge etew is lalag ku.

¹⁹Ne zuen minge egkengein-inuwan he singyal he ibpeehè ku

ziyà te langit wey ziyàn daan te lumpad.

Egkeahà is lengesa wey hapuy wey zekelà he evel.

²⁰Siak is Nengazen,

te kenè pa keuzemà egkeuma is nevantug he andew te kedsiluti ku
te menusiya,

ebmerusirem is andew ne ebmerigà is bulan he iring te lengesa.

²¹Ne zutun he timpu,

is minsan hentei he ebpehizuhizu kediey te Nengazen,

edlibriyen ku sikandin te silut.” ’ ’ ”

²²Ne mid-uman megkagi si Pedro te, “Sikiyu is minge zuma ku he kevuwazan ni Israyil, peminega niw is egkegiyen ku. Si Jesus, kes tigNeserit, sugù sikandin te Megbevayà. Impesavut kenitew te Megbevayà he sugù din si Jesus pinaagi te gehem din wey minge egkein-inuwan wey minge singyal he mibpeveelan kandin te Megbevayà. Netueanan niw en heini is egkegiyen ku su neulaula heini is langun dini te inged niw. ²³Ne heini si Jesus, impalad te etew keniyu. Ne zaan he netueanan heini te Megbevayà su iyan imbanglis din ki Jesus. Impehimetayan niw sikandin te minge etew he kenà ed-azap te Megbevayà. Ne inransang dan te krus. ²⁴Iyan, midlibri si Jesus te Megbevayà ne mibanhew zin su kenà egkehimu he egkevaku si Jesus te kemetayen. ²⁵Netagnà dengan ni Hadì David is migkagi ni Jesus su ke sikandin te,

‘Layun ku egkeahà he edumahan a te Nengazen

su kenà sikandin ed-awà kayi te zapit

te egkekewanan ku,
 umba kenà a egkesemukan.

26 Tengeg kayi ne utew meupiya is gehinawa ku
 ne melipayen is kegkagi ku.

He Nengazen, idsarig ku kenikew is lawa ku

27 su netuenan ku he kenè nu ebpesegdanen
 is gimukud ku ziyà te Iveyaan.

Siak is metinumanen he suluguen nu,
 netuenan ku zaan he kenè nu idtugut
 he meredak is lawa ku.

28 Impeehè nu kediey sikan is ibayà
 pehendiyà te untung he wazà pidteman.

Emun layun ka zuma ku,
 utew zekelà is kediey he kelipey.’

Iyan heini kes netagnà ni David he lalag ni Jesus.”

29 Ne impelaus ni Pedro haazà is egkegiyen din, ke sikandin te, “Menge suled ku, netuenan tew he sikan is tipehuna he hadi tew he si David dengan, neuget en he minatey wey inleveng ne wazè pa mahanew is leveng din. 30 Ne si David, geina te mibpenaub te Megbevayà, nesavut din ke hengkey is impenaad kandin te Megbevayà su si David, iyan penaad kandin te Megbevayà is: keuzemà duen kevuwazan din he egkehimu he hadi he iring kandin. 31 Ne geina te netuenan ni David he iyan heini ebeelan te Megbevayà, netagnè din is kebenhawa ki Kristu, sikan is mibpili te Megbevayà he ibpahadi su ke si David te,

‘Wazà sikandin pesegdana te Megbevayà diyà te Iveyaan, ne wazà daan meredak is lawa zin.’ ”

32 Ne ke si Pedro te, “Iyan egkegiyen din si Jesus he mibanhew te Megbevayà. Ne is langun te sikami, ebpeketistigus key he nevanhew su neehè en te menge mata zey. 33 Midtulus en si Jesus ne imepinuu en diyà te lavew he pinuuwà diyà te zapit te egkekewanan te Megbevayà, ne imbegey kandin te Amey tew he Megbevayà is Wagas he Mulin-ulin he impesarig din kandin. Umba nengeehè niw wey nengezineg niw guntaan heini is langun he egkein-inuwan su ebpuun te gehem te Wagas he Mulin-ulin he imbegey te Megbevayà. 34 Ne zutun te netagnà ni David wazè din iyan kegiya is kandin he lawa su wazà iyan si David tulusa te Megbevayà pehendiyà te langit. Duen selakew pa he insurat he lalag ni David he ke sikandin te,

‘Migkagi is Megbevayà diyà te Nengazen ku,
 ke sikandin te,

“Dini ke zè pa pinuu
 te zapit te egkekewanan ku

35 taman te kenè ku pa

ibpeluhud diyà te kenikew
is minge kuntada nu.” ’

³⁶Na,” ke si Pedro, “kinahanglan he edsevuten tew te langun he minge kevuwazan ni Israyil he si Jesus, sikan is inransang niw te krus, midhimu en te Megbevayà he Nengazen wey hadi tew te langun.”

³⁷Ne hein nezing haazà te minge etew utew zan nekedsendit. Ne ke sikandan diyà te ki Pedro wey te minge zuma zin he epustul te, “Minge suled, ebmenumenu key?” ³⁸Ne midtavak si Pedro te, “Kada sevaha keniyu, iniyugi zin is mezaat he ulaula zin ne mebbebewtismu wey metueni he ebpekidsevaha sikandin ki Jesu Kristu. Ne human egkepesaylu is minge salè din ne is Wagas he Mulin-ulin, ibegey kandin te Megbevayà. ³⁹Su sikitew wey is minge kevuwazan tew, iyan mibpenaazan te Megbevayà te Wagas he Mulin-ulin ne kenà iyan kiw zà mibpenaazan kayi, kekenà, elin daan sikan is minge etew he ziyà ed-ubpà te meziyù, is minsan hentei he edhimuwen te Nengazen tew he Megbevayà he meketuu kandin.”

⁴⁰Ne mezakel he minge ketezengan is insambag ni Pedro kandan, ke sikandin te, “Likayi niw is limas te Megbevayà kayi te minge etew guntaan he memezaat is ulaula.” ⁴¹Ne zutun, mezakel is nemeketuu te impesavut kandan ni Pedro ne mibbbebewtismu sikandan. Ne zutun he andew neumanan kes minge tumutuu te tetelu he libu.

Is Betasan te Minge Tumutuu

⁴²Ne te kada andew ebpevineg dan te ibpenurù kandan te minge epustul. Mibpekid-upakat dan te langun he minge tumutuu ne mibeelan dan te tedeman is kebpateny ni Jesus pinaagi te kegkaan te supas ne layun dan ed-ampù.

⁴³Mezakel is minge egkein-inuwan wey singyal he nehimu pinaagi te minge epustul, umba neteguan is minge etew te kegkehandek te Megbevayà.

⁴⁴Mezesen is kebpekid-upakat te minge tumutuu. Sikan is duen azen din, mibegayan din daan is minge zuma zin. ⁴⁵Imbelegyè dan is minge azen dan wey minge tanà ne is halin dutun, ne mibpenalad dan diyà te langun he minge zuma zan sumalà is kinahanglan te kada sevaha. ⁴⁶Ne kada andew edtigum is langun he minge tumutuu zuen te zekelà he simbahan he eggezanan te Valey te Megbevayà. Ne egkesevaha zan daan he utew melipayen te kegkaan dan dutun te minge valey zan wey kebpevegbejayè dan. ⁴⁷Ne nekezalig dan te Megbevayà ne egkengetahud sikandan te minsan hentei. Ne te kada andew zutun duen minge etew he ebpeketuu. Ne is langun dutun, edlibriyen te Megbevayà wey kenè din en sikandan mesiluti ne haazà nemekeuman te minge tumutuu.

Is Kebewii Zuen te Etw he Pigket

3 ¹Ne sengeandew te zutun he timpu mibpezumahà si Pedro wey si Juan is edtekezeg pehendiyà te Valey te Megbevayà su uras en

te ked-ampù su liwazè en he ebpenaug is andew. ²Ne zuen lilimusan dutun he puun pa te ked-enaka kandin kenè en ebpekehipanew. Kada andew ed-uwiten sikandin te minge zuma zin ne idsavuk dan diyà te uvey te pultahan te simbahan he eggezezanan te Valey te Megbevayà, sikan is pultahan he eggezezanan te Mekempet. Iyan idsevuka kandin dutun su wey mekevuyù te limus diyà te minge etew he edseled dutun te simbahan. ³Ne hein neehè din si Pedro wey si Juan is edseled dutun te simbahan, mibuyuan din te limus. ⁴Ne midtengtengan sikandin ni Pedro wey ni Juan ne ke si Pedro te, “He Mama, ahaa key kenikew.” ⁵Ne midlingehè din sikandan su kunaan din ke zuen selapì he ibegey kandin. ⁶Ne migkagi si Pedro te, “Wazè ku naazen he vulawan wey selapì, iyan, is naazen ku, ibegey ku kenikew. Tenged te gehem te ngazan ni Jesu Kristu he tigNeserit, ebpekehipanew ka!” ⁷Ne zutun migewezan ni Pedro is kewanan he velad dutun te kenà ebpekehipanew ne mid-enew zin. Ne zutundutun neteguan te zesen is minge paa zutun te etew. ⁸Ne midtikew medhitindeg ne midhipanew ne miduma kandan te edseled dutun te simbahan he se mekelinglingketew ne se mekelangkadlangkad he edalig te Megbevayà. ⁹Ne is langun he minge etew zutun he nekeahà kandin te edlangkadlangkad he edalig te Megbevayà, ¹⁰ne nekilala zan he iyan kes lilimusan he ziyà ebpimpinuu te uvey te simbahan duen te pultahan he eggezezanan te Mekempet. Ne utew zan nengeinuinu zutun te kegkeulii kandin.

Is Kedwali ni Pedro Ziyà te Valey te Megbevayà

¹¹Ne te kemulu pa sikandin ebpaagak ki Pedro wey ki Juan, nengevurun is langun he minge etew he zutun, ne mibpelelaguy ne midliguy kandan su nengeinuinu zan. Ne ziyà sikandan te uvey te simbahan dutun te helungà he eggezezanan te Helungà ni Sulumun. ¹²Ne hein naahà haazà ni Pedro, migkegiyan din haazà is minge etew te, “Minge kezuzumahi ku he minge kevuwazan ni Israyil, maan is igkeinuinu niw utew heini? Maan is edtengtengan key keniyu? Kunaan niw vuwa ke pinaagi te kenami en he gehem wey ke tenged be te wazè dey salà, ne neulian dey heini wey mekehipanew. ¹³Is Megbevayà he ed-ezapen te minge kepuun tew he si Abraham, si Isaak, wey si Hakub, midtulus din is suluguen din he si Jesus. Ne te wazè pa sikandin tulusa, impalad niw ziyà te minge punuan ne midsumpalit niw ziyà te etuvangan ni Gubirnedur Pilatu. Ne si Pilatu, edlibriyen din pezem si Jesus, ¹⁴iyani, sikiyu, wazè niw mesuati sikandin is wagas he wazà kandin he mezaat he ulaula. Midhangyù kew he iyan libriya ni Pilatu kes teremunù he nepirisu. ¹⁵Ne sikan is puunà te untung he wazà pidteman, midhimetayan niw, iyan, mibanhew sikandin te Megbevayà. Ebpeketistigus key he nevanhew en si Jesus su neehè dey. ¹⁶Ne iyan

nekeulì kayi te kenà ebpekehipanew is gehem te ngazan ni Jesus. Heini is etew he kilala niw he neehè niw guntaan, tenged te kedtuu zey ki Jesus neulian heini kayi te etuvangan niw su nekesarig key te gehem te ngazan ni Jesus.

¹⁷Ne guntaan menge suled, netuenan ku he sikiyu wey is menge punuan tew, mibeelan niw is mezaat diyà te ki Jesus tenged te wazè niw mesavut ke hentei sikandin. ¹⁸Impesavut dengan te Megbevayà pinaagi te tagnà te ebpemeneuven din he edresayen te menge etew is mibpilì din he ibpahadì. Ne midhimu zin he metuman heini pinaagi te mid-ulaula niw. ¹⁹Ne guntaan kinahanglan he ed-iniyugan tew en is memezaat he ulaula. Ed-empuan tew is Nengazen ne ebpeseyluwen kiw zin te menge salè tew. Ne zutun duen timpu he ebegayan is gehinawa tew te zesen he ziyà ebpuun te kandin. ²⁰Ne edsuguen din dini te kenitew si Jesus he iyan kes mibpilì din he ibpahadì kenitew. ²¹Diyè pa si Jesus ebpekeubpà te langit taman te kenè pa edhimuwen te Megbevayà he vegu is minsan hengkey sumalà te netagnà dengan pinaagi te ebpemeneuven din. ²²Migkagi si Moises dengan te, 'Is Megbevayè tew he Nengazen te langun, edsuguen din dini te keniyu is ebpeneuven din iring te kedsugua zin kedì. Ne haazà is edsuguen din, duma tew zaan he Hudiyu. Kinahanglan he edtumanen niw is minsan hengkey he sugù din keniyu. ²³Ne sikan is kenà ebpemineg kandin te ebpeneuven te Megbevayà, kenè en sikandin idragkes te menge etew he ed-ulinan te Megbevayà,' ke si Moises dengan. ²⁴Ne is menge zuma he ebpemeneuven dengan he ebpemenagnà," ke si Pedro, "iring ki Samuel wey is nemekesunud kandin, netagnè dan daan is egkengeulaula guntaan. ²⁵Ne zuen impenaad te Megbevayà dengan pinaagi te ebpemeneuven din. Ne iyan kiw is menge Hudiyu sikan is mibpenaazan dengan te Megbevayà te langun he meupiya he idtuvad din. Umba ebpekeambit kiw zaan te impenaad dengan te Megbevayà diyà te menge kepuun tew, su migkagi is Megbevayà diyà te ki Abraham te, 'Pinaagi te kevuwazan nu edtuvazan ku te meupiya is tivuuk he menusiyà dini te kelibutan.' ²⁶Umba," ke si Pedro, "hein midsugù te Megbevayà is suluguen din he si Jesus, impehuna zin iphendini te kenitew te menge Hudiyu su wey kiw zin metevangi pinaagi te kebpeengkezi zin kenitew te memezaat he ulaula tew."

Is Kedewayà ki Pedro wey ki Juan

4 ¹Ne zutun te kemulu pa egkagi si Pedro wey si Juan diyà te menge etew, mibayaan sikandan te menge memumuhat wey te kepitan te guwardya ziyà te simbahan wey elin daan is menge Sedusiyu. ²Ne heini is menge punuan, neepesan dan is penurù eni Pedro te menge etew su impenurù ni Pedro he is kegkevanhew ni Jesus, iyan timaan he egkengevanhew keuzemà is menge etew. ³Ne midakep dan si Pedro

wey si Juan ne geina te mahapun en utew, mibpirisu zan su idtagad dan taman te egkepawà. ⁴Ne minsan pa zutun, neketuu is mezakel he nekepeming engki Pedro. Ne tenged dutun is kezakel te menge maama zutun te nemeketuu ki Jesus ne migawhat te lelima he libu.

⁵Ne hein nepawà nengetigum diyà te inged he Hiruselim is menge menunudlù te kesuguan wey is menge ebmegurangan wey is menge zuma pa he punuan he menge Huidiyu. ⁶Ne elin daan dutun si Anas, is lavew he memumuhat wey si Keyipas wey si Juan wey si Alejandro wey menge zuma pa he mesipeg he kezuzumahi ni Anas. ⁷Ne impeetuvang dan si Pedro wey si Juan, ne mid-insaan dan te, “Hengkey heini he gehem is ingkeulii kayi te kenà ebpekehipanew, ne hentei is mibegey keniyu kayi te gehem?” ⁸Ne zutun midtavak si Pedro is nepurung ulini te Wagas he Mulin-ulin, ke sikandin te, “Sikiyu is menge punuan wey ebmegurangan dey, ⁹emun iyan niw id-insà kenami ke mibmenumenu zey is meupiya he midhimu zey kayi te kenà ebpekehipanew, ne emun iyan niw zaan id-insà ke hengkey he gehem is ingkeulii kandin, ¹⁰ne sikiyu wey is langun he menge zuma ku he kevuwazan ni Israyil, kinahanglan he sevuta niw heini. Su heini is etew he zini te etuvangan niw, neulian sikandin pinaagi te gehem te ngazan ni Jesu Kristu he tigNeserit. Heini si Jesus, inransang niw te krus ne minatey, iyan, mibanhew te Megbevayà. ¹¹Iyan si Jesus kes batu he netagnà te insurat dengan he Lalag te Megbevayà he edhenduen te,

‘Sikan is batu he himan te valey,
mid-engkezan niw te menge pandey
su kunaan niw ke wazè din pulus.
Iyan, nehimu en heini guntaan he watu
he iyan dà igkepurungi te valey.’

¹²Iyan dà si Jesus ebpekelibri te silut kenitew,” ke si Pedro, “su zini te tivuuk he kelibutan wazè en дума pa he ngazan he etew he ebpemeleveg he imbegey te Megbevayà.”

¹³Ne zutun, haazà is menge punuan he menge Huidiyu, hein neehè dan he kenà egkehandek si Pedro wey si Juan he egkagi wey hein netuenan dan he kenà metikang is netunghaan dutun te zezuwa ne kenà metikang is pid-etawan dan, ne nengeinuinu zan. Ne human dan dutun mekilala he menge zuma zengan ni Jesus si Pedro wey si Juan. ¹⁴Ne edsumpeliten dan pezem haazà is egkein-inuwan he mid-ulaula eni Pedro, iyan, geina te zutun daan kes etew he neulian wazè en egkekagi zan. ¹⁵Umba, dutun te rugu he netiguman dan migkegiyan dan ensi Pedro he med-awè dan dè pa. Ne zutun mibitiyara zan, ke sikandan te, ¹⁶“Ebmenmenuwen tew heini is menge etew su venar man iyan he egkein-inuwan is nehimu zan, ne nevantug en heini zini te tivuuk he inged he Hiruselim ne kenè tew egkevarew. ¹⁷Edewayen tew nasì sikandan he kenè dan en maan ipenurù

is kedtuu te ngazan ni Jesus diyà te minsan hentei su wey kenà mekeeneb heini is ibpenurù dan diyà te menge etew.”¹⁸ Ne zutun impelikù dan ensi Pedro ne mibpelihandek dan ne migkegiyan dan te, “Kenè niw en maan ipenurù is kedtuu te ngazan ni Jesus.”

¹⁹Ne midtavak si Pedro wey si Juan te, “Isipa niw ke hendei zapit is egkesuatan te Megbevayà kayi te zezuwa he paagi: ke edtumanen dey ve is sugù niw he kenè dey ibpenurù is ngazan ni Jesus, wey ke edtumanen dey is ebpevelan kenami te Megbevayà. ²⁰Kenà egehimu he kenè dey idsangyew is nezineg dey wey is neehè dey,” ke si Pedro. ²¹Iyan, impaawè ded sikandan ne mibeleuzan dan he kenà ipesangyew. Ne haazà is menge ebmegurangan, wazè dan neisip he paagi te kedsiluti kandan su nahandek dan te menge etew. Is langun he menge etew, midalig dan is Megbevayà tenged te egkein-inuwan he nehimu, ²²su kes etew he neulian, subre en he kepatan he tuig is kegurang din, umba nengeinuinu is menge etew.

Is Ked-ampù te Menge Tumutuu

²³Ne zutun hein imeguwè en si Pedro wey si Juan, mid-ulì dan diyà te menge zuma zan he tumutuu. Ne mibpenudtul zan haazà is imbelaud kandan te menge punuan he menge memumuhat wey menge ebmegurangan. ²⁴Ne is menge tumutuu, hein nezineg dan haazà, ne mid-amur-amur zan te ked-ampù. Ne iyan heini ked-ampù dan, ke sikandan te, “Megbevayà he Nengazen te langun, nenlimbag ka te langit wey tanà wey zagat wey is langun he tagù kayi. ²⁵Iyan ka kes nekekagi zengan pinaagi te kepuun dey he suluguen nu he si Hadì David, su mid-ulinan sikandin te Wagas he Mulin-ulin ne nekagi zin he,

‘Maan is utew nengepauk is menge etew

he kenà menge Hudiyu,

wey maan is ebpekeisip sikandan te wazè din pulus?’

²⁶Su migkayew en is menge hadì dini te kelibutan

wey nengetigum is menge punuan

su edtebeken dan is Nengazen wey egkuntedahan dan

is mibpili din he hadì.’

²⁷Na,” ke sikandan is ed-ampù te, “netuman en kes migkagi nu su zini te Hiruselim mid-uyun is menge Hudiyu wey is kenà menge Hudiyu su si Hadì Hirudis wey si Gubirnedur Pilatu, nesevaha zan he ebpekigkuntada ki Jesus he pinilì nu he suluguen he ibpahadì nu. ²⁸Ne mid-uyunan dan ke hengkey is ed-ul-ulahan dan diyà te kandin sumalà is imbanglis nu he meulaula zan. ²⁹Ne ahaa nu man guntaan, Nengazen, is menge pelihandek dan kenami. Iveyey nu kenami guntaan te menge suluguen nu is kevrut wey key kenà mahandek te kedsangyew te lalag nu.

³⁰Ipelepew nu is gehem nu su wey zey meulii is egkengezeruwan, wey

zuen daan minge egkein-inuwan wey singyal he igkepeehè dey pinaagi te gehem te ngazan ni Jesus he pinilì nu he suluguen nu.” ³¹Ne hein nekeampù dan, ne negezam dan he egkehuyung haazà is baley he netiguman dan. Ne mibpurungan ulini te Wagas he Mulin-ulin is kada sevaha kandan, ne wazè dan ikehandek is kedsengyawa zan te Lalag te Megbevayà.

Is Kedsevahaa te Menge Tumutuu te Menge Azen Dan

³²Mezesen is kebpekid-upakat te minge tumutuu su nesevaha zà is isip dan wey gehinawa zan. Wazà minsan sevaha kandan he mid-isip din is minge azen din he iyan dà sikandin ebpehimulus, kekenà, mid-isip dan he sevaha zan dà te azen. ³³Ne is minge epustul, utew zekelà is gehem he imbegey kandan te kedtistigus he nevanhew is Nengazen tew he si Jesus, ne zekelà daan is kedtuvazi te Megbevayà te langun kandan te nemeketuu ki Jesus. ³⁴Ne is minsan hentei kandan, kenà edlised te minsan hengkey su is duma zan he zuen din tanà wey ke valey ve, ibelegyè din ³⁵ne ibegey zin is halin dutun diyà te minge epustul ne ebegayan te minge epustul is minsan hentei he edlised. ³⁶Ne zuen duma zan he tigSipru he Hudiyu zaan he kevuwazan duen te tipehuna he si Levi. Iyan ngazan din si Jose ne migeraran te minge epustul ki Bernabe he ke vā dà egkegiya, ebpekevegey te kezesen te kedtuu. ³⁷Ne zuen tanà ni Bernabe, ne imbelegyè din haazà. Ne imbegey zin is halin dutun diyà te minge epustul.

Is Kedtarùtarù ni Eneniyas wey ni Sepira

5 ¹Ne zuen maama zutun he egngezanan ki Eneniyas. Is esawa zin, egngezanan ki Sepira. Imbelegyè din is tanè dan, ²iyān, midtipigan din is bahin dutun te halin. Ne haazà, ingkesuat daan te esawa zin. Ne is wazè din tipigi, mid-uwit din ne imbegey zin te minge epustul, *ne migkagi zin he iyan en haazà kes tivuuk he halin duen te tanè din.* ³Ne migkegiyan sikandin ni Pedro te, “Eneniyas, maan is ebpevayàbayè ka ki Setanas su edlimbungan niw is Wagas he Mulin-ulin su kenè niw id-amin is selapì. ⁴Te wazè niw pa ivelegyà, kenè be keniya he tanà? Ne minsan dutun te ingkevelegyè niw en, kenè be keniya pa he vayàbayà is selapì? Ne maan is neisip niw heini is mezaat he ulaula? Kenà etew zà is edlimbungan niw, kekenà, iyan is Megbevayà.” ^{5,6}Ne te kegkezinega ni Eneniyas kayi he lalag, *midsilutan te Megbevayà* ne zutundutun nepiley sikandin ne minatey. Ne zutun mibeyaan sikandin te minge menguhed he maama ne mibukusan dan is lawa zin ne mid-uwit dan ne inleveng dan. Ne utew nengehandek is langun he nekezineg kayi te neulaula.

⁷Ne te minge tetelu he uras dutun nekeuma is esawa ni Eneniyas. Wazè din pa metueni is nehitavù ki Eneniyas. ⁸Ne mid-insà si Pedro te,

“He Bayi, heini is selapì, iyan dè be heini nezawat niw te kebelegyaa niw te tanè niw?” Ne midtavak haazà is bahi te, “Es, uya, iyan dà heeyan.” ⁹Ne migkagi en maan si Pedro te, “Maan is mid-uyunan niw he ebpenggezaman niw is Wagas he Mulin-ulin? Ebpekeume en maan kes menge maama he midleveng te esawa nu. Ne ed-uwiten ke zan daan su idleveng ka.” ¹⁰Ne zutundutun nepiley si Sepira ne minatey. Ne hein nekeseled haazà is menge maama ne neehè dan sikandin he minatey. Ne mid-uwit dan ne inleveng dan diyà te zurug te leveng te esawa zin. ¹¹Ne tenged dutun utew en nengehandek is langun he menge tumutuu wey minsan hentei he nekezineg dutun te neulaula.

Is Egkekein-inuwan he Mibeelan te Menge Epustul

¹²Ne is menge epustul, mezakel is menge singyal wey egkein-inuwan he impeehè dan te menge etew. Ne is langun he menge tumutuu, diyè dan layun egketigum te egngezanan te Helungà ni Hadì Sulumun. ¹³Ne is kenà menge tumutuu, kenà edtampu kandan su egkengehandek, asal is langun he tigHiruselim, edtehuzen dan is menge tumutuu. ¹⁴Ne layun ed-iseg is kegkeumani te menge tumutuu. Ne tenged dutun utew zan en mezakel is menge maama wey vahi he nemeketuu te Nengazen he si Jesus. ¹⁵Ne tenged te menge egkein-inuwan he nehimu te menge epustul, mid-uwit te menge etew is menge egkengezeruwan ne impenavuk dan diyà te kilid te menge kersada he impemehizegà diyà te menge ikam wey hizegaan dan su wey melembungi sikandan te alung ni Pedro ke edsagad. ¹⁶Ne is menge meginged te menge inged he ziyà te uvey te Hiruselim, midhendiyè dan te Hiruselim is ebpemen-uwit te menge egkengezeruwan wey ebpenlelunten te mezaat he mulin-ulin ne nengeulian is langun kandan.

Is Kebpesipelahi te Menge Epustul

¹⁷Ne zutun he timpu, is lavew he memumuhat wey menge zuma zin he menge Sedusiyu, utew zan nengesina zutun te menge epustul. Ne midwaleng dan dà ¹⁸ne midakep dan is menge epustul ne mibpirisu zan. ¹⁹Ne zutun te mezukilem, netekewtekew puwasi te velinsuguen te Nengazen haazà is pirusuwan ne impaawè din dutun is menge epustul ²⁰ne migkegiyan din sikandan te, “Hendiyè kew te Valey te Megbevayà ne ipenurù niw te langun he menge etew heini is begu he untung.” ²¹Ne hein nepawà dutun, midhendiyè dan te simbahan he egngezanan te Valey te Megbevayà ne mibpenurù dan.

Ne nekeuma zutun te simbahan is lavew he memumuhat wey menge zuma zin, ne mibpenenawag haazà is lavew he memumuhat he medtigum is menge ebmegurangan wey is menge punuan te menge Huidiyu, ne zuen daan midsugù din diyà te pirusuwan su ebpeveyaan sikan is menge

epustul. ²²Ne hein nekeuma ziyà te pirusuwan haazà is menge pulis, wazè dan naahà. Ne midlikù dan ne midtutul zan ke hengkey is nehítavù, ke sikandan te, ²³“Hein nekeuma key ziyà te pirusuwan, neehè dey he nepurungan melekevi is gemawan ne is menge vantey, dutun dan te uvey te gemawan, iyan, te kebpuwas dey wazè dey naahà diyà te seled,” ke sikandan. ²⁴Ne hein nezing haazà te kepitan te guwardya ziyà te simbahan wey te menge punuan he memumuhát, neked-iinseez zan ke hendei vuwa is menge epustul. ²⁵Ne zutun duen midseled he etew he egkagi te, “Sikan is mibpirisu niw, kayi zan te simbahan is ebpenurù te menge etew.” ²⁶Ne zutun mibeyaan haazà is menge epustul zutun te kepitan wey menge pulis ne mid-uwit dan sikandan diyà te menge punuan, ne wazà bugela zutun te pulis haazà is menge epustul su nahandek dan te menge etew su kela ke tulenga sikandan te watu.

²⁷Ne hein nekeuma zan en, in-etuvang dan haazà is menge epustul ziyà te menge punuan. Ne migkegiyan sikandan dutun te lavew he memumuhát, ²⁸ke sikandin te, “Imbelaud dey keniyu he kenè niw ipenurù is kedtuu te ngazan ni Jesus. Ne hengkey heini is mid-ulaula niw? Insangyew niw is penurù niw zini te tivuuk he Hiruselim ne kenà taman dà kayi is mid-ulaula niw, kekenà, iyan key pa keniyu ebesulan te kedhimetayi ki Jesus.” ²⁹Ne zutun midtavak si Pedro wey is duma he menge epustul te, “Kinahanglan he edtumanen dey is sugù te Megbevayà kenà is menge sugù he mibeelan te etew. ³⁰Mibunù niw si Jesus su inransang niw te krus, iyan, is Megbevayà he edsimbahan te menge kepuun tew, mibanhew zin si Jesus. ³¹Ne midtulus din en ne ziyè en sikandin te zapit te egkekewanan te Megbevayà. Sikitew is menge kevuwazan ni Israyil, egalen tew sikandin wey iyan kenitew edlibri te silut. Ne ebpeiniyugan din kenitew is mezaat he ulaula ne ebpeseyluwen kiw zin. ³²Ne sikami, ebpeketistigus key he nengeulaula heini is langun. Ne ebfirmahan daan heini te Wagas he Mulin-ulin su mibpeulinan kandin te Megbevayà is langun he edtuman te menge sugù din.”

³³Ne hein nezing heini te menge punuan, utew zan nengepauk ne ed-isipen dan en edhimetayi is menge epustul. ³⁴Iyan, duen duma zan he egngезanan ki Gemelil. Perisiyu sikandin he menunudlù te kesuguan wey telehuzen te langun he menge etew. Ne midhitindeg heini ne insugù din he ed-uwiten dè pa ziyà te gawas haazà is menge epustul. Ne hein diyè dan en te gawas, ³⁵migkegiyan ni Gemelil haazà is menge zuma zin te, “Sikiyu is menge zuma ku he kevuwazan ni Israyil, kenè tew edegdegusuwan ke hengkey is ed-ul-ulahan tew kayi te menge etew *su kela ke mesayep ki*. ³⁶Su zengan duen etew he egngезanan ki Tiyudas he mibpetuu he kenà etew zà duen sikandin. Menge heepat he gatus he menge maama is midsundan kandin. Iyan, dutun te kegkepetaya kandin ne nekedsusuwey is menge sumusundan din ne nahanew en haazà is

ed-ul-olahan dan. ³⁷Ne zutun nekesunud si Hudas he tigGeliliya zutun te timpu te kedsinsusa te gubirnu te tivuuk he menge etew. Ne zuen dutun nemekesundan daan kandin, asal midhimetayan daan sikandin ne nemekedsusuwey zaan haazà is menge sumusundan din. ³⁸Ne tenged dutun iyan sambag ku keniyu guntaan is: kenè tew en edhilevetan heini is menge etew, kekenà, ebpesegdanen tew su emun diyè dà ebpuun te etew zà duen is ebeelan dan wey ibpenurù dan, egkehanew zed gihapun. ³⁹Iyan, ke ziyà ebpuun te Megbevayà, ne kenè tew egkezaag. Ne kenà dutun dà taman su egkekuntada tew is Megbevayà!” ke si Gemelil. Ne zutun mibpezumdumahan haazà te menge punuan is sambag ni Gemelil, ⁴⁰iyanyan, impeleled dan en maan haazà is menge epustul ne impevugel zan. Ne migkegiyan dan haazà is menge epustul he kenè dan ipenurù is kedtuu te ngazan ni Jesus ne zutun impaawè dan. ⁴¹Ne is menge epustul, migenat dan ne utew zan nelipey su mid-isip sikandan te Megbevayà he meinentusen te ked-el-eleza kandan tenged te kedtuu zan ki Jesus. ⁴²Ne te kada andew ziyè dan gihapun te simbahan wey ziyà te menge valey is ebpenurù te Meupiya he Tudtulanen te keagi ni Jesus, sikan is mibpili te Megbevayà he ibpahadi.

Is Kebpilia te Pitu he Ibpeelima te Menge Tumutuu

6 ¹Ne zutun he timpu ed-iseg ebmezakel is menge tumutuu ki Jesus. Is menge tumutuu he Hudiyu he Gerisyahanen is kinegiyan dan, duen ibmezaat te gehinawa zan te zuma he menge tumutuu he Hudiyu. Egkagi haazà is menge Gerisyahanen he kenà pudu egkevegayan is kandan he menge valu he vahi ke ebpeneltelazen te kada andew is idtavang dutun te menge valu he vahi. ²Ne zutun midtigum te menge epustul is langun he menge tumutuu ne ke sikandan te, “Kenà meupiya ke sikami is menge epustul, emun ed-engkezan dey is kebpenurù te Lalag te Megbevayà wey zey mevahinbahin is ibpenavang. ³Umba, menge suled,” ke sikandan, “meupiya ke ebpili kew te pitu he menge zuma niw he telehuzen. Kinahanglan he iyan ebpilien is menge maama he memetau he netueanan niw he nepurung sikandan ulini te Wagas he Mulin-ulin. Ne ibegey zey ziyà te kandan is kegehem te kebahinbahin. ⁴Ne sikami mulà, is menge epustul, egkehimu he ebpurungan dey is baal zey te ked-ampù wey kebpesavut te Lalag te Megbevayà.” ⁵Ne hein nezineg haazà te menge tumutuu, nengesuat dan dutun te sambag te menge epustul. Ne mibpili dan si Esteban. Ne si Esteban, utew mezesen is kedtuu zin wey nepurung sikandin ulini te Wagas he Mulin-ulin. Ne elin dutun te nepili dan si Felipe, si Pukuru, si Nikenur, si Timen, si Perminas, wey si Nikulas he tig-Entiyukya. Ne haazà si Nikulas, kenà Hudiyu, iyan, neketuu zengan te tinuuwan te menge Hudiyu. ⁶Ne impeetuvang dan diyà te menge epustul haazà is nengepili dan ne in-ampù sikandan te menge epustul

ne midepenetan sikandan dutun te minge epustul *su iyan haazà paagi te kebegayi kandan te kegehem*.

⁷Ne impeiseg dan is kedweliya zan te Lalag te Megbevayà diyà te mezakel he minge etew. Ne utew mahabet is minge tigHiruselim he nemeketuu ki Jesus. Ne mezakel zaan is minge memumuhat he nemeketuu.

Is Kedekepa ki Esteban

⁸Ne si Esteban, midtuvazan sikandin te Megbevayà ne zekelà is gehem din. Mezakel is minge egkein-inuwan wey minge singyal he ingkepeehè din diyà te minge etew. ⁹Ne zuen daan minge kuntada ni Esteban. Iyan is minge Hudiyu he ziyà edsimba te egngезanan te Simbahan te minge Uripen he Nengevelukasan. Is duma kandan ne minge tigSirini, tig-Elihendriya, tigSilisya, wey tig-Asya. Ne ebpekidlewanè dan ki Esteban. ¹⁰Iyan, mibegayan si Esteban te ketau te Wagas he Mulin-ulin umba wazè dan igkelawan te ketezengan din. ¹¹Ne zutun duen minge etew he midsuhulan dan wey zan meulugi si Esteban te salà, ne egkagi haazà is minge etew te, “Nezineg dey is minge lalag din he supak te kesuguan ni Moises wey supak daan te Megbevayà,” ke sikandan. ¹²Ne pinaagi zutun te minge etew nengepeukan si Esteban te minge etew, minge ebmegurangan, wey minge menunudlù te kesuguan. Ne mibeyaan dan si Esteban ne midakep dan ne impeetuvang dan diyà te minge punuan. ¹³Ne zutun duen impeseled dan he minge etew he ibpeulug dan te salà ki Esteban. Ne migkagi haazà te, “Heini si Esteban, kenà ed-engked he edsudì kayi te simbahan tew he Valey te Megbevayà ne edsumpeliten din is kesuguan he imbilinbilin kenitew ni Moises. ¹⁴Su nezineg dey sikandin is egkagi he is simbahan tew he Valey te Megbevayà, edrundusen ni Jesus he tigNeserit ne ed-ilisan daan ni Jesus is langun he minge vetasan tew he imbilinbilin kenitew zengan ni Moises.” ¹⁵Ne midtengtengan si Esteban te langun he minge punuan dutun ne is paras din dutun ne henduen be te paras te velinsuguen te Megbevayà *tenged te ked-ulini kandin*.

Is Minge Lalag ni Esteban Diyà te Minge Punuan

7 ¹Ne zutun mid-insaan si Esteban te lavew he memumuhat, ke sikandin te, “Tutuu ve heini is langun he insumbung dan mehitenged kenikew?” ²Ne midtavak si Esteban te, “Sikiyu is minge ebmegurangan wey minge suled ku, peminega niw is minge lalag ku keniyu. Dengan, kes kepuun tew he si Abraham, mibpaahà kandin is mekegegehem he Megbevayà te kemulu pa ziyà si Abraham ed-ubpà te tanà he Misuputamya hein wazè pa sikandin medhalin diyà te inged he Haran. ³Ne migkegiyan si Abraham te Megbevayà te, ‘Awè ka kayi te

inged nu wey menge suled nu wey lukes nu, ne ziyè ka ubpà te ibpeehè ku kenikew he tanà.’ ⁴Ne zutun mid-awà diyà te inged he Keldiya ne midhalin diyà te inged he Haran. Ne hein minatey is amey zin impahalin en maan sikandin te Megbevayà dini te tanà he neubpaan tew guntaan. ⁵Ne zutun he timpu wazè pa izata te Megbevayà diyà te ki Abraham is minsan deisek dà kayi te tanà, iyan, impenaad te Megbevayà he ibegey zin ki Abraham heini is tanà ne egkeazen heini ni Abraham wey te menge kevuwazan din. Ne hein impenaad heini ziyà te ki Abraham, wazè pa anak ni Abraham. ⁶Ne migkagi kandin is Megbevayà te, ‘Is kevuwazan nu, diyè dan keuzemà ebpekeubpà te kenà kandan he inged. Ne egkeuripen sikandan te meginged dutun ne mezaat is ed-ul-olahan kandan. Ne emun egketapus is heepat he gatus he tuig, ⁷edsilutan ku is menge tegiuripen kandan ne ed-ewaan dan dutun haazà is inged ne ed-uli dan dini. Ne siak is Megbevayà, dini zan ed-azap te kediey.’” ⁸Ne ke si Esteban te, “Duen daan impenaad te Megbevayà ki Abraham. Midsugù te Megbevayà he mebpesirkunsidar is langun kandan te menge maama su iyan tuus te kebpekid-uyun dan mehitenged te impenaad te Megbevayà. Umba hein nevuwad si Abraham ki Isaak, nekewalu zutun te ked-enaka kandin midsirkunsidar ni Abraham. Ne hein nevuwad si Isaak ki Hakub, midsirkunsidar zin daan. Ne hein iyan en maan nenganak si Hakub, midsirkunsidar zin daan kes sepulù wey zezuwa he anak din he kepuun tew te menge Hudiyu.”

⁹Ne ke si Esteban te, “Si Jose is sevaha he anak ni Hakub, nesina kandin is menge kakey zin ne imbelegyè dan sikandin ne neuwit diyà te Ihiptu. Iyan, midumahan si Jose te Megbevayà, ¹⁰ne midlibri zin te langun he menge meregen he nengehitavù kandin. Midtuvazan si Jose te Megbevayà ne tenged dutun ingkesuat si Jose te hadi diyà te Ihiptu su neehè din he zekelà is ketau he imbegey kandin. Ne is hadi, midhimu zin si Jose he gubirnedur te tivuuk he ginhedian din wey iyan ebayàbayà te langun he menge azen din. ¹¹Na,” ke si Esteban diyà te menge punuan te, “mid-agi is dekelà he vivil ziyà te tivuuk he tanà he Ihiptu wey ziyà daan te Kanaan ne neregenan is menge meginged dutun. Ne is menge kepuun tew, wazè dan egkekuwaan te keuyagan dan. ¹²Umba hein nezineg ni Hakub he zuen egkeenen diyà te Ihiptu, midsugù din is menge anak din he maama, sikan is menge kepuun tew, he medhendiyè dan. Iyan heini kes nehuna he kedhendiyè dan te kedlagud te egkeenen. ¹³Ne zutun te ikezuwa en he kedhendiyè dan te Ihiptu, mibpekilala si Jose kandan te menge suled din ne human dutun metueni te hadi ke hentei is menge kezuzumahi ni Jose. ^{14,15}Ne intelaan ni Jose is amey zin he medhendiyà te kandin wey is langun he kezuzumahi zin. Ne zutun midhendiyà ensi Hakub te Ihiptu. Is kezakel zan dutun te midhendiyà te Ihiptu, ne kepituwán wey lelima he etew. Ne hein neuget, minatey si Hakub diyà

te Ihiptu ne minatey zaan kes minge anak din he kepuun tew. ¹⁶Ne kada is ebpatey kandan, id-ulì is lawa zin diyà te mibpuunan dan, diyà te Sikim ne zutun ileveng te surung he penlevengà he mibpemasa he zaan ni Abraham. Mibpemasa zin te selapì he pelata ziyà te minge anak ni Hamur he iyan meginged dutun te Sikim.

¹⁷Ne neuget dutun hein megaan en edtumanen te Megbevayà sikan is impenaad din diyà te ki Abraham he edlibriyen is minge kevuwazan din dutun, utew en dekelà diyà te Ihiptu is minge kevuwazan te minge kepuun tew. ¹⁸Ne zutun, duen midhadì diyà te Ihiptu he wazè din hanew te kedhadì dengan ni Jose. ¹⁹Na,” ke si Esteban, “heini is hadì, mibpesipelahan din is minge kepuun tew wey mezaat is mid-ulaula zin kandan. Pinaagi te peges impetimbang din te minge Hudiyu is minge anak dan he utew pa vatà diyà te meziyù wey mebpatey. ²⁰Ne iyan haazà daan timpu te ked-enaka ki Moises. Utew sikandin mekempet he vatà ne ingkesuat te Megbevayà. Seled te tetelu he vulan is ked-elimahi kandin te lukes din. ²¹Ne hein insavuk sikandin diyà te meziyù, naahà te vahi he anak te hadì. Ne mid-anak-anak din si Moises ne ziyè en medekelà te kandin he iring te tutuu he anak din. ²²Ne impepenurù din diyà te ki Moises is langun he ulaula te minge tig-Ihiptu ne nevantug sikandin tenged te ketau te kebpesavut wey te minge vaal zin.

²³Ne hein kepatan en is penuigen ni Moises, neisip din he ebpenumbelayan din is minge zuma zin he minge kevuwazan ni Israyil. ²⁴Ne hein nekeuma en sikandin neehè din is maama he Hudiyu he ebpesipelahan te tig-Ihiptu. Ne midtevangen haazà ni Moises is duma zin he Hudiyu ne midhimetayan din haazà is tig-Ihiptu. ²⁵Kunaan ni Moises ke nesavut en te minge zuma zin he Hudiyu he iyan sikandin nepilì te Megbevayà wey zin melibri sikandan te minge tig-Ihiptu, iyan, wazè dan mesavut. ²⁶Ne hein nepawà dutun, midlikù med-uman si Moises. Ne zuen neehè din he zezuwa he minge Hudiyu he ebpetebekà. Ne ebpelangen din pezem haazà is dezuwa su ke sikandin te, ‘He minge suled, kenè kew medtebek su teltelesuled kew.’ ²⁷Iyan, haazà is nekesalà te zuma zin, kenà ebpemingeg; intukù din si Moises, ne ke sikandin te, ‘Hentei is mibegey kenikew te kegehèm te kedatùdatù kenami?’ ²⁸Kela ke edhimetayan a kenikew iring te kedhimetayi nu geviì te tig-Ihiptu?’ ²⁹Ne hein nezineg ni Moises heini, mibpelaguy ne ziyà med-ubpà te tanà he Madyan. Ne ziyà te Madyan ianak is dezuwa he anak din he maama.

³⁰Ne neuget pa zutun, minge kepatan he tuig, duen belinsuguen te Megbevayà he mibpaahà ki Moises diyà te Siney, diyà te tanà he kenà ed-ubpaan te etew. Naahà ni Moises is belinsuguen te Megbevayà diyà te merapung he zugiyen he sagbet he egkeregereg. ³¹Ne hein naahà ni Moises haazà, nein-inuwan din ne mid-uvayan din su edsusiyen din. Ne hein uvey en dutun, migkagi is Nengazen te, ³²Iyan a Megbevayà

he ed-ezapen te minge kepuun nu he si Abraham, wey si Isaak, wey si Hakub.' Ne migkerker si Moises ne wazà mekeaku te kedtengteng dutun su nahandek. ³³Ne migkegiyan sikandin te Nengazen te, 'Ewaa nu is sepatun nu su mibulusan ku heini is tanà he nehitudengan nu. ³⁴Neehè ku is kebpesipelahi te minge tig-Ihptu te minge pinili ku he minge etew ne nezineg ku is dag-es dan. Umba zini ad guntaan te tanà su edlibriyen ku sikandan. Ne genat ke en su edsuguen ku sikew ziyà te Ihptu.'

³⁵Ne heini si Moises," ke si Esteban diyà te minge punuan, "daan he wazè dan dewata te minge Hudiyu is penavang din, kekenà, migkegiyan dan dà te, 'Hentei is mibegey kenikew te kegehèm te kedatùdatù kenami?' " Ne ke si Esteban en maan te, "Ne pinaagi zutun te velinsuguen he mibpaahà kandin dutun te egkeregeg he sagbet, midsugù si Moises te Megbevayà. Ne midhimu zin si Moises he pengulu he iyan edlibri te minge Hudiyu. ³⁶Ne mid-uwit ni Moises is minge kepuun tew ne mid-awè dan diyà te Ihptu. Ne zutun te wazè dan pa med-awà diyà te Ihptu, duen minge egkengein-inuwan wey minge singyal he impeehè din. Ne ziyà te zagat he egngезanan te Merigà, wey ziyà daan te imbayè dan he tanà he wazà duen ed-ubpà he etew, impeehè din daan is iring dutun he minge vaal. Kepatan he tuig is ked-uwita ni Moises kandan diyà te tanà he wazà dutun ed-ubpà he etew. ³⁷Ne si Moises, migkegiyan din is minge kepuun tew te, 'Keuzemà duen daan ebpeneuven te Megbevayà he ed-uwit keniyu iring kedì te ebpeneuven din. Ne heini he ebpeneuven keuzemà, duma niw zaan he Hudiyu.' ³⁸Ne hein nengetigum is minge kepuun tew ziyà te tanà he wazà dutun ed-ubpà he etew, pinaagi ki Moises nekepekidlalag dan te velinsuguen te Megbevayà diyà te vuntud he egngезanan te Siney. Ne nezawat ni Moises dutun kes kenà egkehanew he minge Lalag te Megbevayà wey zin daan ikevegey kenitew. ³⁹Ne wazà tumana te minge kepuun tew is ibpeulaula ni Moises kandan. Ne kenè dan egkesuatan he pengulu zan sikandin. Ne neisip dan he meupiya ke edlikù dan diyà te Ihptu. ⁴⁰Ne migkegiyan dan si Arun, kes kakey ni Moises, te, 'Beeli key te minge ledawan he egkehimu he minge ziwata he edsunuzen dey su heini si Moises, is mid-uwit kenitew puun diyà te Ihptu, wazè dey en hanew ke hendei en sikandin mekepevayà.' ⁴¹Ne zutun," ke si Esteban, "mibeelan dan is ledawan he nati te vaka ne mibpelengeshan dan ne midlipey zan su nesuatan dan haazà is mibeelan dan. ⁴²Ne zutun mid-iniyugan is minge kepuun tew te Megbevayà ne mibpesagdan din sikandan is ed-azap te minge vituen diyà te langit. Ne zuen insurat he Lalag te Megbevayà diyà te libru te ebpemeneuven dengan he edhenduen te,

'He minge kevuwazan ni Israyil,
kenà a iyan sikan is mibpemuhat niw zengan
hein seled te kepatan he tuig diyà kew te tanà

he wazà duen ed-ubpà he etew,
kekenà, selakew is mid-azap niw.

⁴³ Iyan niw edyeyungen kes ibpeubpaan niw
zuen te ed-ezapan niw he si Muluk
wey kes ledawan he vituen
he ed-ezapan niw he si Ripan.
Menge ledawan heini he mibeelan niw ne mid-azap niw,
ne tenged dutun ibpeuwit ku sikiyu ziyà te meziyù,
diyà dapit te inged he Bebilunya.’ ”

⁴⁴ Ne ke si Esteban te, “Dengan te kemulu pa ziyà is menge kepuun tew
te tanà he wazà duen ed-ubpà he etew, insarig kandan sikan is lawig he
maggad he iyan tuus he kenà edsuwey ziyà te kandan is Megbevayà.
Midhimu zan heini sumalà is insugù te Megbevayà diyà te ki Moises,
sumalà is ebpeiringan te Megbevayà kandin. ⁴⁵ Ne neuget dutun, is
menge anak kayi te kepuun tew, hein nekebkevilin dan en haazà is
lawig he ed-ubpaan te Megbevayà kenè dan haazà edsuwayen dutun te
keduma zan ki Josue te kedseled dan kayi te tanè tew. Ne naangken dan
heini is tanà hein impaawà te Megbevayà is menge zaan he meginged
kayi. Ne haazà is lawig he ed-ubpaan te Megbevayà, wazà maawà kayi
taman te wazè pa medhadì si David. ⁴⁶ Ne hein nehimu en sikandin he
hadì, ingkesuat sikandin te Megbevayà ne midhangyù si David he tuguti
sikandin te Megbevayà he iyan sikandin mekevangun te hustu he valey
he simbahan he zutun ed-ezapa is Megbevayà he iyan sikan is ed-ezapan
dengan te kepuun tew he si Hakub. ⁴⁷ Iyan, wazà tuguti te Megbevayà si
David su si Sulumun, iyan nekevangun te Valey te Megbevayà.”

⁴⁸ Ne ke si Esteban te, “Ne minsan pa zutun, is lavew he Megbevayà,
kenà diyè dà ed-ubpà te valey he vineelan te etew su zuen insurat te
ebpeneuven he,

⁴⁹ ‘Egkagi is Nengazen te,
“Is langit, ne pinuuwè ku wey is tanà,
ne iyan edsevukan ku te paa ku.
Wazà baley he egkeveelan niw he ed-eregan ku.
Kenè kew zaan ebpekevaal te hustu
he edhimelayan ku

⁵⁰ su iyan a midlimbag kayi te tanà
wey is langun he tagù din.” ’ ”

⁵¹ Ne ke si Esteban te, “Sikiyu is menge zuma ku he Hudiyu, utew
memehunit is gehinawa niw. Kenè kew egkesuat he ebpemineg; ne kenè
kew zaan edtuman te Lalag te Megbevayà. Kenè kew ed-engked he
edsupak te Wagas he Mulin-ulin. Kes mid-ulaula te menge kepuun tew,
iyan daan ed-ul-olahan niw. ⁵² Duen be minsan sevaha zà he ebpeneuven
dengan he wazà resaya te menge kepuun tew? Wazà. Mibpenhimetayan

dan is midsugù te Megbevayà, sikan is nemeketagnà dengan te kebpekeuma te metazeng he suluguen din he si Jesus. Ne sikiyu zaan guntaan su heini si Jesus, is suluguen te Megbevayà, mid-ekalan niw ne mibunù niw. ⁵³Ne is kesuguan te Megbevayà, imbegey kenitew zengan pinaagi te minge velinsuguen te Megbevayà, iyan, nasi wazè niw tumana,” ke si Esteban.

Is Kedhimetayi ki Esteban

⁵⁴Ne hein nezineg te minge punuan he minge Hudiyu haazà is lalag ni Esteban, utew zan nengepauk. Ne migkegetket is bagang dan te kegkerengiti zan utew. ⁵⁵Ne si Esteban, nepurung sikandin ulini te Wagas he Mulin-ulin ne midlingahà diyà te langit ne neehè din is mekegegehem he anlag te Megbevayà. Ne elin dutun neehè din si Jesus he ziyà edhithitindeg te zapit te egkekewanan te Megbevayà. ⁵⁶Ne ke si Esteban te, “Ahaa niw man! Egkeehè ku en is langit he nepuwasan ne zutun is Kakey te Menusiyà he edhithitindeg te zapit te egkekewanan te Megbevayà.” ⁵⁷Ne zutun haazà is minge punuan, nekekulahi dan ne midsabpeng dan is telinga zan su wey kenè dan en mezineg is minge lalag ni Esteban ne midlingketawan dan. ⁵⁸Ne inggawas dan sikandin puun dutun te inged ne midtuleng dan te watu. Ne sikan is nemekesumbang kandin, insavuk dan is minge kumbalè dan diyà te uvey te etew he egngezanan ki Seulu. ⁵⁹Ne zutun te kedtulenga zan ki Esteban, nengumew-umew sikandin te Nengazen. Ke sikandin te, “He Jesus he Nengazen ku, dewata nu is gimukud ku.” ⁶⁰Ne zutun nekeluhud ne mid-uman megkagi te, “He Nengazen, kenè nu isipa he idsilut kandan heini is salè dan.” Ne te nekagi zin haazà, naawà is gehinawa zin.

Is Kebpesipelahi wey Kebpekedsusuwey te Minge Tumutuu

8 ^{1,2}Ingkesuat utew ni Seulu is kedhimetayi zan ki Esteban. Ne inleveng si Esteban te minge tumutuu te Megbevayà. Utew zan ingkeseeng haazà ne midlendagan dan. Ne puun dutun te andew te kebpatay ni Esteban, is minge tumutuu, ebpemesipelahan en sikandan te minge punuan he minge Hudiyu ziyà te Hiruselim, ne mibpemelaguy zan ne nekedsusuwey zan diyà te tivuuk he prubinsya he Hudiya wey Semarya. Iyan dà wazà mekepelaguy is minge epustul.

³Ne si Seulu, egkesuatan din he mezezeeti zin is upakat te minge tumutuu ne mezaat is ed-ul-olahan din kandan. Midsusi zin is kada valey ne midakep din is minge tumutuu ne mibpen-uwit din is minge maama wey minge vahi ne mibpirisu zin.

⁴Ne sikan is nemekedsusuwey he minge tumutuu he nemelaguy, impesavut dan diyà te minge inged is Lalag te Megbevayà. ⁵Ne si Felipe, is sevaha kayi, ne midhendiyà sikandin te inged dutun te prubinsya

he Semarya ne inwali zin diyà te minge tigSemarya ke hentei sikan is mibpili te Megbevayà he ibpahadi. ⁶Ne is mezakel he minge etew zutun, hein nesavut dan haazà is inwali ni Felipe wey hein neehè dan is minge egkein-inuwan he mibeelan din, mibpurung dan mebpemingeg te impesavut din kandan. ⁷Mezakel is nengeulian din he etew he edlelungen te mezaat he mulin-ulin ne nekekulahì is minge mezaat he mulin-ulin te ked-awè dan dutun te edlelungen dan. Ne elin daan nengeulian din is minge piang wey mibpimatey is divaluy he lawa. ⁸Ne utew nengelipey is minge etew zutun he inged.

Si Simon he Selemengkiru

⁹Ne zuen etew he tigSemarya he selemengkiru he egngезanan ki Simon. Nepipira en he tuig ne kemulu zà duen igkengeinuinu te minge etew is minge vaal zin. Impetuu zin is minge tigSemarya he kenà sikandin etew zà duen. ¹⁰Ne mibentayan is minge lalag din te minsan hentei ziyà te Semarya, minge lavew se kenà lavew. Ne ke sikandan te, “Heini is gehem he egemiten din, gehem te Megbevayà he egngезanan te Lavew he Gehem.” ¹¹Umba edsundanan dan sikandin su neuget en is ked-uwita zin kandan pinaagi te minge ketau zin. ¹²Ne hein impesavut ni Felipe is Meupiya he Tudtulanen te kedhadì te Megbevayà wey is gehem te ngazan ni Jesu Kristu, neketuu zan ne sikandan is minge vahi wey minge maama, mibpebewtismu zan, ne minsan si Simon, kes selemengkiru, neketuu zutun. ¹³Ne hein nebewtismuwan si Simon, mibpekiduma sikandin ki Felipe ne neinuinu sikandin utew zutun te kegkeehaa zin te minge singyal wey minge egkengein-inuwan he edhimuwen ni Felipe.

¹⁴Ne nezingeg te minge epustul ziyà te Hiruselim he neketuu en te Lalag te Megbevayà is minge tigSemarya. Ne tenged dutun midsugù dan diyà si Pedro wey si Juan. ¹⁵Ne midhendiyè dan ne in-ampù dan he mevegayi is minge tumutuu he tigSemarya te Wagas he Mulin-ulin, ¹⁶su wazè pa zutun ulini is minge tumutuu he tigSemarya te Wagas he Mulin-ulin, su iyan pa nehimu kandan is nebewtismuwan sikandan wey metueni he zuen dan en kebpekidsevaha ki Jesus. ¹⁷Ne midepenetan sikandan ni Pedro wey ni Juan ne puun dutun mid-ulinan sikandan te Wagas he Mulin-ulin.

¹⁸Ne zutun naahà ni Simon he ed-ulinan is minge etew te Wagas he Mulin-ulin emun egkezepenetan te zezuwa he epustul. Ne ebegeyan din pezem sikandan te selapì, ¹⁹ke sikandin te, “Begayi a zaan kayi te gehem niw su wey a mekezepenet te etew ne egkeulinan te Wagas he Mulin-ulin.” ²⁰Ne migkagi si Pedro te, “Berakat he siluti ka te Megbevayà ne zèdeeti zin is selapì nu su maan is neisip nu he egkepemasa is gehem he ibegey te Megbevayà. ²¹Wazè nu kelavet wey ketenged kayi te ebpeveelan

kenami su netuenan te Megbevayà he kenà metazeng is egkeisip nu.
 22 Ewaa nu ziyà te gehinawa nu heini is mezaat he neisip nu ne vuyù ka te pesaylu ziyà te Nengazen su kela ke peseyluwa ke zin te neisip nu ²³su neuripen ka te kegkesina ne kenè nu egkelikayan is memezaat he ulaula nu.” ²⁴Ne migkagi si Simon te, “Iampù a keniyu te Nengazen; hengyui niw sikandin he kenà meulaula kedì is silut he migkagi nu.”

²⁵Ne seled te nepipira he andew zutun, si Pedro wey si Juan, mibpenudtul zan is keagi ni Jesus wey impesavut dan is lalag te Nengazen. Ne zutun mid-ulì dan diyà te Hiruselim. Ne ziyà te imbayè dan he mezakel he minge inged te prubinsya he Semarya impesavut dan te minge etew zutun is Meupiya he Tudtulanen.

Si Felipe wey Kes Upisyal he Tig-Itiyupya

²⁶Ne zuen belinsuguen te Nengazen he migkagi ziyà te ki Felipe, ke sikandin te, “Hipanew ka guntaan ne hendiyè ka te zivavà, diyà te kersada he ed-awà te inged he Hiruselim pehendiyà te inged he Gasa,” ke sikandin. (Ne heini he zalan, kenè en guntaan utew ibayà.)
^{27,28}Ne migenat dutun si Felipe. Ne zuen dutun etew he tig-Itiyupya he midhendiyà te Hiruselim su edsimba te Megbevayà. Upisyal sikandin he sinerigan te kendaki he ke vâ dà egkegiya, bai, diyà te Itiyupya. Insarig kandin te vai is langun he ketigeyunan din. Ne hein ed-ulì en haazà is upisyal he ed-untud te kelisa ebesahan din sikan is libru he insurat dengan ni Esaias he ebpeneuven te Megbevayà. ²⁹Ne zutun migkegiyan si Felipe te Wagas he Mulin-ulin te, “Hendiyè ka ne uvayi nu heeyan is kelisa.” ³⁰Ne hein nekeuvey si Felipe zutun, nezinég din haazà is upisyal he ebasa zutun te insurat ni Esaias. Ne ke si Felipe te, “Egkesavut nu ve heeyan is ebesahan nu?” ³¹Ne midtavak haazà is upisyal te, “Ebmenumenu a te kedsavut kayi te wazà edseysey kedì?” Ne impeuntud din si Felipe. ³²Iyan ebesahan dutun te upisyal is insurat ni Esaias dengan he edhenduen te,

“Iring sikandin te vuutan he kerehidu
 he migkuwa zan su edhimetayan.
 Ne wazà migkagi zin su iring sikandin
 te nati he kerehidu he kenà ed-erang ke ed-elutan.

³³Mid-eled-eled dan sikandin
 ne kenà metazeng is kedsiluti zan kandin.
 Wazà egkegugud he kevuwazan din
 su mevavè dà utew is untung din
 dini te kelibutan.”

³⁴Ne mid-insà haazà is upisyal ziyà te ki Felipe te, “Hentei vuwa is egkegiyen kayi te ebpeneuven te Megbevayà? Iyan be sikandin wey ke selakew en be he etew?” ³⁵Ne zutun midseysayan sikandin ni Felipe.

Midhunaan din haazà is ebesahan te upisyal ne impesavut din kandin is Meupiya he Tudtulanen te keagi ni Jesus. ³⁶Ne netegtegaad dutun nekeuma zan te wahig, ne migkagi haazà is upisyal te, “Wahig en heini; egkehimu ve ke ebewtismuwan a kenikew?” ³⁷Ne midtavak si Felipe te, “Egkehimu emun hustu en is kedtuu nu.” Ne midtavak haazà is upisyal te, “Neketuu ad; edtuuwan ku he Anak te Megbevayà si Jesu Kristu.” ³⁸Ne impeteren din haazà is kelisa ne mibpenaug dan is dezuwa, si Felipe wey haazà is upisyal, ne midhendutun dan te wahig ne mibewtismuwan sikandin ni Felipe. ³⁹Ne hein migaun dan dutun te wahig, intik-ew in-awà dutun si Felipe te Wagas he Mulin-ulin ne nahanew te ked-ahà dutun te upisyal. Ne haazà is upisyal, midlaus pehendiyà te inged din ne utew zekelà is kelihey zin. ⁴⁰Ne si Felipe, diyè en maahà te inged he Asdud ne midlaus medhipanew is ebpenudtul te Meupiya he Tudtulanen diyà te langun he minge inged he ibayè din taman te nekeuma sikandin diyà te Sisarya.

Is Kebpeketuu ni Seulu

9 ¹Igkikinehendekè pa zutun si Seulu te minge sumusundan te Nengazen he si Jesus su ebpenhimetayan din sikandan. ²Ne tenged dutun midhendiyà sikandin te lavew he memumuhat ne midhangyù he pesurati zin is minge egalen te minge simbahan te minge Hudiyu ziyà te inged he Demasku; ne hengyua zin he itugut dan ki Seulu is kedekepa te minsan hentei he egkeehè din, maama se vahi, he edsunud te paagi ni Jesus. Ne sikan is egkengezakep din, ebekusen ne ed-uwiten diyà te Hiruselim.

³Ne hein uvey en si Seulu te inged he Demasku, netekewtekew sikandin te zuen utew merayag he ebpuun te langit he neketayew kandin. ⁴Ne nepiley sikandin diyà te tanà ne nezing din is egkagi te, “He Seulu, maan is ebpesipelahan a kenikew?” ⁵Ne migkagi si Seulu te, “Hentei ka?” Ne midtavak te, “Iyan a si Jesus kes ebpesipelahan nu. ⁶Enew ka ne laus ka ziyà te inged ne zuen dutun etew he ebpenurù kenikew te ebpeveelan ku kenikew.” ⁷Ne midteren dutun is minge zuma ni Seulu, ne wazè dan mekekagi; nahandek dan su nezing dan haazà is egkagi, iyan, wazè dan naahà. ⁸Ne mid-ew si Seulu ne hein migimerat, ne kenè en ebpekeahà ne mid-agak dan dà sikandin pehendiyà te Demasku. ⁹Ne seled te tetelu he andew is kenà ebpekeahà ne wazè din nekaan wey neinum.

¹⁰Ne zutun te inged he Demasku, duen sumusundan ni Jesus he egngезanan ki Eneniyas. Ne mibpaahà kandin is Nengazen he si Jesus ne migkagi te, “He Eneniyas.” Ne midtavak si Eneniyas te, “Hei e zed.” ¹¹Ne migkagi is Nengazen te, “Hendiyè ka te kersada he egngезanan te Metandang. Ne ziyà te valey ni Hudas, iinsè nu is etew he tigTarsu he egngезanan ki Seulu. Kemulu en ed-ampù. ¹²Ne pinaagi te gehem ku, neehè ke zin en, Eneniyas,

is edseled diyà te kandin he edepenet kandin wey mepuwasi is ked-ehè din.”
 13Ne midtavak si Eneniyas te, “Nengazen, netuenan ku pinaagi te mezakel he etew is utew memezaat he mid-ulaula zin diyà te menge sumusundan nu ziyà te Hiruselim. 14Ne midhendini te Demasku su intugut kandin te menge punuan he memumuhat is kebpendekepa te langun he ebpengumew-umew kenikew.” 15Ne migkegiyan si Eneniyas te Nengazen te, “Beyai nu su nepili ku sikandin wey zin ikesangyew is ngazan ku ziyà te menge etew he kenà Hudiyu wey minsan diyà te menge hadi wey ziyà daan te menge zuma nu he kevuwazan ni Israyil. 16Ne ibpesavut ku kandin he mezakel is menge kemeregenan he egkeegiyan din tenged te suluguen ku sikandin.”

17Ne zutun migenat si Eneniyas ne midhendutun te valey ne hein nekeseled midepenetan din si Seulu te egkagi te, “Sikew Seulu, is suled ku, midsugù a zini te Nengazen he si Jesus he mibpaahà kenikew ziyà te imbayè nu. Impehendini e zin su wey mepuwasi en is ked-ehè nu, wey ka meulini te Wagas he Mulin-ulin.” 18Ne zutundutun henduen be te zuen nelekat diyà te mata ni Seulu ne nepuwasan is ked-ehè din. Ne mid-eneu ne mibpebewtismu. 19Ne migkaan ne nekeulì is desen din.

Ne seled te nepipira he andew zutun, mibpekiduma si Seulu te menge sumusundan ni Jesus diyà te Demasku.

Is Kebpenurù ni Seulu Diyà te Demasku

20Ne zutun midseled te simbahan te menge Hudiyu ne impenurù din is keagi ni Jesus. Ne ke sikandin te, “Si Jesus, Anak te Megbevayà.” 21Ne nengeinuinu is langun he nekezineg kandin ne mibpein-inseey zan te, “Kenè be heini kes etew he mibpesipelahan din is langun diyà te Hiruselim he ed-zap ki Jesus? Umba kun midhendini te Demasku su edekepen din is langun he edtuu ki Jesus ne ed-uwiten din kun diyà te Hiruselim ne ibpeetuvang din sikandan te menge punuan he menge memumuhat.”

22Ne si Seulu, mid-iseg is gehem din te kebpsavut te Lalag te Megbevayà ne kenà sikandin egkezaag te menge Hudiyu ziyà te Demasku su melig-en is menge ketezengan din he si Jesus, iyan sikan is mibpili te Megbevayà he ibpahadì. 23Ne wazà dutun utew meuget, mid-uyun is menge Hudiyu he edhimetayan dan si Seulu, 24iyan, duen midlaguy zutun ki Seulu. Ne te maandew wey mezukilem mibentayan te menge Hudiyu is menge gemawan dutun te ingkutà te inged su edhimetayan dan si Seulu ke egkeehè dan. 25Iyan, sevaha zutun he mezukilem midumahan sikandin te menge sumusundan din, ne midteyuntun dan sikandin liyu te kutà he in-ahuk te rinara he teleguey.

Si Seulu Ziyà te Hiruselim

26Ne midhendiyà si Seulu te Hiruselim, iyan, hein ebpekiduma te menge sumusundan ni Jesus, nahandek dan su kenè dan ebpeketuu

he tutuu he sumusundan si Seulu ni Jesus. ²⁷Ne midtevang an si Seulu ni Bernabe ne miduma zin diyà te minge epustul ne mibpenudtul zin kandan is kebpaahà te Nengazen ki Seulu ziyà te imbayè din, wey is lalag kandin te Nengazen. Ne midtudtul zin daan he si Seulu, minsan te nekuntada zin is minge Hudiyu diyà te Demasku, wazè din kegkehandek te kedsengyawa zin te kedtuu te ngazan ni Jesus. ²⁸Ne zutun nekeamur si Seulu kandan ne midrigurigu sikandin diyà te Hiruselim ne wazè din kegkehandek te kedsengyawa zin te kedtuu te ngazan te Nengazen he si Jesus. ²⁹Ne ebpekidlalag wey ebpekidibati te minge Hudiyu he Gerisyahanen is kinegiyan dan. Ne ed-isipen dan en sikandin edhimetayi. ³⁰Ne hein netuenan haazà te minge zuma zin he tumutuu miduma zan si Seulu ziyà te inged he Sisarya ne zutun impeuntud dan te barku pehendiyà te inged he Tarsu.

³¹Ne zutun mibmelinew is kebpekesavuk te langun he minge tumutuu ki Jesus diyà te prubinsya he Hudiya, wey Semarya wey Geliliya. Neheget is kedtuu zan ne tenged te layun dan ibpehuna is kedtahud dan te Nengazen wey tenged te kedtavang kandan te Wagas he Mulin-ulin mid-iseg dan mebmezakel.

Hein Diyà si Pedro te Lida wey Hupi

³²Ne mibeyaan ni Pedro is langun he minge inged. Ne midhendiyà daan sikandin te minge etew he gaked te Megbevayà he ziyà te inged he Lida. ³³Ne zutun neehè din is maama he egngезanan ki Iniyu. Ne haazà si Iniyu, walu en he tuig he kenà ebpekeenew su minatey is divaluy he lawa zin. ³⁴Ne migkegiyan sikandin ni Pedro te, “He Iniyu, ebewian ka ni Jesu Kristu.” Enew ka ne tepiza nu is minge gelemiten nu te kedhizegà. Ne zutundutun neulian si Iniyu ne mid-eneu. ³⁵Ne naahà te langun he minge meginged dutun te minge inged he Lida wey Sarun he neulian sikandin. Ne pudu zan nemeketuu te Nengazen he si Jesus.

³⁶Ne ziyà te inged he Hupi, duen sumusundan he vahi he egngезanan ki Tebita, ne emun kinegiyan he Gerisyahanen, iyan ngazan din si Durkas, *he ke và dà egkegiya, Kuleping. Ne heini is bahi, mezakel is minge meupiya he vaal zin; layun edtavang te egkengeayuyau.* ³⁷Ne zutun he timpu nezeruwan ne minatey. Imperey-as is lawa zin ne insavuk dan diyà te rugu he ziyà te zivavew he ziyà te valey zin. ³⁸Ne is inged he Hupi, uvey te inged he Lida, ne is minge sumusundan diyà te Hupi, hein nezineg dan he ziyà si Pedro te Lida, midsugù dan diyà te kandin is dezuwa he maama he impepenudtul kandin te, “Hendini ka gaanggaan.” ³⁹Ne migenat si Pedro is eduma kandan. Ne hein nekeuma si Pedro miduma zan diyà te rugu he ziyà te zivavew. Ne zuen dutun minge valu he vahi ne midlingutan dan si Pedro te ebpemeninegew. Ne impeehè dan kandin is minge kumbalà wey zuma pa he ugelingen he

mibpenahì ni Durkas hein uuyag pa. ⁴⁰Ne imegawas ni Pedro is langun te sikandan ne midluhud sikandin is ed-ampù diyà te Megbevayà. Ne zutun midsineruwan din haazà is lawa zutun te minatey ne ke sikandin te, “He Tebita, enew ka.” Ne migimerat si Tebita ne neehè din si Pedro, ne mid-enew ne mibpinuu. ⁴¹Ne migewezan ni Pedro is belad din ne impehitinge din. Ne zutun mid-umew ni Pedro haazà is menge zuma zin he tumutuu he ragkes dutun is menge valu he vahi ne impeehè din kandan si Tebita. ⁴²Ne nekeeneb haazà he tudtul te tivuuk he inged he Hupi, ne mezakel is nemeketuu te Nengazen he si Jesus. ⁴³Ne si Pedro, mid-ubpaupè pa zutun, diyà te valey te etew he egnezezanan ki Simon he mememaal te gelemiten puun te lundis he egenguwen din.

Is Naahà ni Cornelio

10 ¹Ne ziyà te inged he Sisarya zuen etew he kenà Hudiyu he egnezezanan ki Cornelio. Kepitan sikandin te kumpeniya te menge sundaru he Rumanu, sikan is mignezezanan te kumpeniya te menge tig-Italya. ²Heini si Cornelio, ne metinumanen te sugù te Megbevayà. Sikandin wey is tivuuk he pemilya zin, minsan kenè dan menge Hudiyu, ed-azap dan te Megbevayà. Dekelà is tavang din te menge egkengeayuyu he menge Hudiyu wey layun sikandin ed-ampù diyà te Megbevayà. ³Ne sengeandew te liwazè pa ebpenaug is andew zutun te mahapun, mibpaahà ki Cornelio is belinsuguen te Megbevayà. Ne nepurung memelmelegi ni Cornelio haazà. Ne midseled dutun te valey haazà is belinsuguen ne migkegiyan din si Cornelio te, “He Cornelio!” ⁴Ne si Cornelio, netengtangan din haazà is belinsuguen ne utew sikandin nahandek. Ne ke sikandin te, “Hengkey?” Ne migkagi haazà is belinsuguen te, “Midineg en te Megbevayà is ked-ampù nu ne neehè din is ketulanged nu ne kenè ke zin egkelipatan. ⁵Ne guntaan sugua nu ziyà te inged he Hupi is ed-angey te etew he egnezezanan ki Simon Pedro. ⁶Diyà sikandin te valey te etew he egnezezanan daan ki Simon he mememaal te gelemiten puun te lundis. Diyà sikandin ed-ubpà te veyvey.” ⁷Ne zutun mid-awà haazà is belinsuguen te Megbevayà. Ne segugunà midtawag ni Cornelio is dezuwa he menge suluguen din wey is sundaru he sevaha zutun te menge sinerigan din. Ne heini he sundaru, ed-azap daan te Megbevayà. ⁸Midtudtul kandan ni Cornelio is nehitavù kandin ne midsugù din sikandan diyà te inged he Hupi.

Is Naahà ni Pedro

⁹Ne hein neudtu te ilis he andew zutun, diyè dan pa te zalan ne megaan dan en ebpekeuma ziyà te Hupi. Ne te iyan haazà daan he timpu, si Pedro, mibpemenahik diyà te perenggayà he atep te valey he patag is atep din su ed-ampù te Megbevayà. ¹⁰Ne hein netegtegaad dutun,

nevitil utew ne egkaan pezem. Ne te wazè pa melutù is sinuba zan, duen impaahà te Megbevayà ki Pedro. ¹¹Neehè din is langit he nepuwasan ne zuen midteyuntun he iring te layag he utew meluag. Midhiketani is heepat he kilid din ne midteyuntun. ¹²Ne zutun te seled is langun he menge kelasi te keranapranap, iring te menge langgam wey menge uled wey menge tagbis. ¹³Ne zuen migkagi ziyà te ki Pedro te, “He Pedro, lapè ka wey ka mekekaan.” ¹⁴Ne midtavak si Pedro te, “Kenà a, Nengazen, su wazè e pa mekekaan te minsan hengkey he meremerik he iring keninyan su indaway te kesuguan.” ¹⁵Ne mid-umanan kegiyi sikandin te, “Is migkagi te Megbevayà he meupiya, kenè nu kegiya he meremerik.” ¹⁶Ne ketetelu en mesublì haazà is langun he menge lalag diyà te ki Pedro, ne zutun, in-uli diyà te langit haazà is midteyuntun.

¹⁷Ne te kemulu pa ed-is-isipa ni Pedro ke hengkey is kehulugan dutun te neehè din, nekeuma zutun te inged kes menge sugù ni Cornelio. In-insè dan ke hendei is baley ni Simon. Ne hein diyè dan en te gawas uvey te gemawan, ¹⁸mibpenelehuzen dan ne mid-insè dan te, “Duen be megeliyug niw he egngезanan ki Simon Pedro?” ¹⁹Ne si Pedro zutun, kemulu zin pa ed-isipa ke hengkey is ibpesavut te neehè din. Ne zutun migkegiyan sikandin te Wagas he Mulin-ulin te, “Duen tetelu he etew he ebpen-ahà kenikew. ²⁰Gaanggaan ka penaug ne kenè ka melenew he eduma kandan su iyan a midsugù kandan.” ²¹Ne mibpenaug si Pedro ne migkegiyan din sikandan te, “Iyan a ebpen-ahaan niw. Hengkey is tuyù niw kedì?” ²²Ne migkagi zan te, “Impehendini key ni Kepitan Cornelio. Metazeng sikandin he etew. Ed-azap sikandin te Megbevayà, ne telehuzen daan sikandin te langun he menge Hudiyu. Migkegiyan sikandin te velinsuguen te Megbevayà te, ‘Ipaangey nu si Simon Pedro wey nu mezineg is ibpesavut din,’ ” ke sikandan.

²³Ne impealed dan ni Pedro ne impehizegè din sikandan te sengekezukileman.

Hein Diyà si Pedro te Valey ni Cornelio

Ne te nepawà dutun, miduma si Pedro kandan. Ne zuen daan miduma he menge tumutuu he tigHupi. ²⁴Ne nepawè pa zutun, ne human dan mekeuma ziyà te Sisarya. Ebpeebuten sikandan ni Cornelio ne midtigum din is kezuzumahi zin wey menge emigu zin. ²⁵Ne hein edseled en si Pedro zutun te valey, midsinugung si Cornelio ne midluhud kandin su ed-azap. ²⁶Iyan, impehitindeg sikandin ni Pedro he egkagi te, “Hitindeg ka su etew e zà daan iring kenikew.” ²⁷Ne mibpekibitiyara si Pedro kandin dutun te edseled dan en. Ne zutun naahà ni Pedro is mezakel he nengetigum dutun te valey. ²⁸Ne migkegiyan din sikandan te, “Netuenan niw en he sikami is menge Hudiyu, indaway kenami te tuluuwen dey is kebpekiduma wey kebpenumbaley ziyà te iring keniyu te kenà menge

Hudiyu. Iyan,” ke si Pedro, “impesavut kedì te Megbevayà he kenè din egkesuatan he isipa ku he meremerik is minsan hentei su edewaten din is langun. ²⁹Ne tenged dutun, kayi te mibpeveyaan a keniyu, ne wazà a melenew he edhendini. Ne guntaan tudtula niw ke hengkey is igkinehenglana niw kedì.”

³⁰Ne midtavak si Cornelio te, “Heepat en he andew guntaan, te iring kayi he uras dini a te valey te liwazè en ebpenaug is andew su ed-ampù a. Netekewtekew a te mibpaahà kedì is maama he ebpenganlag is bisti zin. ³¹Ke sikandin te, ‘Cornelio, midineg en te Megbevayà is ked-ampù nu, ne wazè din daan melipati is tavang nu te menge etew. ³²Ne guntaan ipaangey nu te menge suluguen nu ziyà te inged he Hupi is etew he egngezanan ki Simon Pedro. Diyà ed-ubpà te valey te etew he Simon daan is ngazan din he mememaal te gelemiten puun te lundis. Diyà te veyvey is baley zin.’ ³³Umba,” ke si Cornelio, “segugunè ku sikew impeveyai ne selamat utew su nekeuma ka kayi. Ne guntaan nengetigum key en dini te etuvangan te Megbevayà su ebpemingey dey is minsan hengkey he insugù din kenikew he ipesavut kenami.”

³⁴Ne zutun migkagi si Pedro te, “Netuenan ku en he venar iyan he wazà ibpelavi te Megbevayà te minsan hentei, ³⁵su is meginged te minsan hengkey he inged dini te kelibutan, emun edtehuzen din is Megbevayà wey metazeng is ulaula zin, edewaten sikandin te Megbevayà. ³⁶Netuenan niw en is Meupiya he Tudtulanen he impresavut te Megbevayà kenami te menge kevuwazan ni Israyil su pinaagi ki Jesu Kristu he iyan Nengazen te langun he menge etew, impresavut din he egkeawà is pauk te Megbevayà kenitew. ³⁷Ne netuenan niw zaan kes neulaula ziyà te tivuuk he tanà te menge Hudiyu, iyan, dutun mebpun te prubinsya he Geliliya, dutun te timpu he neipus ni Juan is kebpsavut din te kebewtismu. ³⁸Si Jesus he tigNeserit, mibpeulinan sikandin te Megbevayà te Wagas he Mulin-ulin ne mibegayan sikandin te zekelà he gehem. Ne mid-eneb din is menge inged ne meupiya is baal zin diyà te menge etew ne nengeulian din is langun he edlelengen ni Setanas. Neveelan din heini su kenà edsuwey kandin is Megbevayà. ³⁹Ne sikami, ebpekepenistigus key kayi su neehè dey is langun he mibeelan din diyà te langun he menge inged te menge Hudiyu wey ziyà daan te Hiruselim. Ebpekepenistigus key zaan he midhimetayan sikandin te menge Hudiyu pinaagi te kedrensanga kandin te krus. ⁴⁰Iyan, mibanhew te Megbevayà seled te tetelu he andew ne impaahà kenami te Megbevayà he neuyag en. ⁴¹Te nevanhew en sikandin wazà pudu mekeahà kandin is menge etew, kekenà, sikami zà is menge tistigus he zaan he mibpilì te Megbevayà. Sikami, nekekaan key wey nekeinum key zuma kandin hein nevanhew en sikandin. ⁴²Ne insugù din kenami he ipesavut dey te menge etew is Lalag te Megbevayà. Insugù daan ni Jesus he ipesavut dey he iyan sikandin

sikan is intezù te Megbevayà he edsusi keuzemà te minge nengeulaula te minge etew he uuyag pa wey minsan is nemematey en. ⁴³Netagnà si Jesu Kristu te langun he ebpemeneuven dengan te Megbevayà ne migkagi zan he pinaagi te gehem te ngazan din, is langun he edsarig kandin, ebpeseyluwen din sikandan te minge mezaat he ulaula zan.”

⁴⁴Ne te kemulu pa egkagi si Pedro zutun, mibulusan te Wagas he Mulin-ulin is langun he etew he ebpemineg dutun. ⁴⁵Is minge tumutuu he Hudiyu he nemekezuma ki Pedro, utew zan nengeinuinu su is Megbevayà, mibpeulinan din daan te Wagas he Mulin-ulin is minsan minge etew he kenà minge Hudiyu. ⁴⁶Su is minge Hudiyu zutun, nezineg dan haazà is minge kenà Hudiyu he ebpendalig te Megbevayà wey netekewtekew zan pintezi te minge kinegiyan he wazè dan dutun hanew ke hengkey haazà is egkegiyen dan. ⁴⁷Ne zutun migkagi si Pedro te, “Heini is minge etew he kenà minge Hudiyu, mibegayan daan sikandan te Wagas he Mulin-ulin iring te sikitew is minge Hudiyu. Ne tenged kayi kenà egkehimu he kenà sikandan egkebewtismuwan.” ⁴⁸Ne insugù ni Pedro he bewtismuwi sikandan wey metueni he nekidsevaha sikandan ki Jesu Kristu. Ne hein nepasad haazà, si Pedro, midhengyuan eni Cornelio he med-ubpè dè pa ziyà te kandan seled te egkepipira he andew.

Is Tudtul ni Pablo Ziyà te Hiruselim

11 ¹Sikan is minge epustul ziyà te prubinsya he Hudiya wey is minge zuma zan he tumutuu he minge Hudiyu, nezineg dan he midawat te minge kenà Hudiyu is Lalag te Megbevayà he impesavut kandan. ²Ne hein mid-ulì si Pedro ziyà te Hiruselim, duen midsawey kandin he minge tumutuu he Hudiyu. ³Ne ke sikandan te, “Maan is sikew he Hudiyu, nenumbaley ka ziyà te minge etew he kenà minge Hudiyu he wazà mesirkunsidar ne mibpekidtugen ka zaan kandan?” ⁴Ne midtudtul ni Pedro is langun puun pa te nehuna he nehitavù kandin.

⁵Ke sikandin te, “Diyà a te inged he Hupi is ed-ampù ne zuen impaahà kediey te Megbevayà. Neehè ku is midteyuntun he ebpuun te langit he iring te zekelà he layag he midhiketan is heepat he kilid din ne neketanà diyà te uvey ku. ⁶Ne midtengtangan ku ne neehè ku is tagù din he minge keranapranap, iring te minge langgam, minge uled, wey minge tagbis. ⁷Ne zutun nezineg ku is egkagi te, ‘He Pedro, lapè ka wey ka mekekaan.’ ⁸Ne midtavak a te, ‘Kenà a, Nengazen, su wazè e pa mekekaan te minsan hengkey iring keniyen te meremerik he indawey te kesuguan.’ ⁹Ne ziyà te langit nezineg ku en maan is egkagi, ke sikandin te, ‘Is migkagi te Megbevayà he meupiya, kenè nu kegiya he meremerik.’ ¹⁰Ne hein ketetelu en mesublì haazà is langun he minge lalag, in-ulì diyà te langit haazà is midteyuntun. ¹¹Ne zutun duen nemekeuma ziyà te valey he

neubpaan ku he tetelu he etew he kenà minge Hudiyu he midsugù diyà te kedì he ebpuun te inged he Sisarya. ¹²Ne migkegiyan a te Wagas he Mulin-ulin he ibpezume e zin dutun te minge etew ne kenà a melenew te keduma kandan. Heini zaan is heenem he tumutuu he minge zuma tew he Hudiyu is miduma kedì diyà te Sisarya. Ne midseled key ziyà te valey ni Cornelio. ¹³Ne midtudtulan key ni Cornelio he zuen belinsuguen te Megbevayà he mibpaahà kandin diyà te valey zin. Ne migkagi kandin haazà is belinsuguen te, ‘Sugua nu ziyà te inged he Hupi is ed-angey te etew he egngezanan ki Simon Pedro. ¹⁴Sikew wey is pemilya nu, ibpesavut din keniyu is paagi he iyan igkelibri niw te silut te Megbevayà keniyu.’ Iyan heini tudtul ni Cornelio,” ke si Pedro. ¹⁵Ne ke si Pedro te, “Hein edweliyan ku en sikandan, dutundutun mibulusan sikandan ne mid-ulinan sikandan te Wagas he Mulin-ulin iring kenitew te minge Hudiyu zutun te aney kiw en ulini. ¹⁶Ne zutun netenuzan ku is lalag te Nengazen tew he si Jesus he ke sikandin te, ‘Wahig is imbewtismu ni Juan te minge etew, iyan, iyan kebewtismuwi keniyu is edlumunan kew te Wagas he Mulin-ulin.’ ¹⁷Ne emun mibpeulinan sikandan te Megbevayà te Wagas he Mulin-ulin iring dutun te kebpeulini zin dengan kenitew te kedtuu tew te Nengazen he si Jesu Kristu, kenà egkehimu he kenè ku edewaten is kebpeulini zin kandan te kenà minge Hudiyu.” ¹⁸Ne hein nezineg te minge tumutuu he Hudiyu haazà is ketezengan ni Pedro, mid-engkezan dan is kedsewaya zan kandin ne midalig dan is Megbevayà su ke sikandan te, “Mibulusan en bes te Megbevayà is minge kenà Hudiyu wey zan daan meiniyugi is mezaat he ulaula wey zan mezawat is untung he wazà pidtemanan.”

Is Minge Tumutuu Ziyà te Entiyukya

¹⁹Ne zuen minge tumutuu he nememelaguy tenged te minge kebpesipelahi zutun te minge edsarig ki Jesus hein mibunù si Esteban. Ne nemekedsusuwey zan pehendiyà te tanà he Pinisi wey te pulu ziyà te zagat he egngezanan te Sipru wey ziyè dan daan te inged he Entiyukya. Ne mibpenudtul zan is Lalag te Megbevayà, iyan, diyè dà te minge Hudiyu. ²⁰Ne tigSipru wey tigSirini is duma zutun te nemelaguy. Ne hein nekeuma zan diyà te Entiyukya, mibpenudtulan dan daan is minge kenà Hudiyu; ne impesavut dan is keagi te Nengazen tew he si Jesus. ²¹Ne midtevangan te Megbevayà sikandan is mibpenudtul su utew mezakel he etew is neketuu te Nengazen tew he si Jesus ne midtuman dan is minge sugù din.

²²Heini is neulaula, nezineg te minge tumutuu he ziyà te Hiruselim ne midsugù dan si Bernabe ziyà te Entiyukya. ²³Ne hein nekeuma si Bernabe, neehè din he utew zekelà is tuvad te Megbevayà te minge etew, ne heini, utew zin ingkelipey. Inhangyù din kandan he hemeni zan wey

hegeta zan is kedtuu zan te Nengazen. ²⁴Ne si Bernabe, meupiya is ulaula zin, ne meheget is ked-ulini kandin te Wagas he Mulin-ulin ne meheget daan is kedtuu zin te Megbevayà, ne mezakel zutun is nemeketuu te Nengazen tew he si Jesus.

²⁵Ne midhendiyà si Bernabe te Tarsu su ebpen-ahaan din si Seulu.

²⁶Ne hein neturedu zin, miduma zin diyà te Entiyukya. Ne seled te sengetuig, diyè dan is dezuwa med-amur te menge tumutuu ziyà te Entiyukya ne mezakel is mibpemenurù dan. Ne ziyà te Entiyukya, sikan is menge sumusundan, aney en gerari he menge Kristiyanus.

²⁷Ne zutun he timpu, duen ebpuun diyà te Hiruselim he menge ebpeneuven te Megbevayà he midtupang su edhendiyè dan te inged he Entiyukya. ²⁸Is sevaha zutun he migngezanan ki Egebu, ne mid-ulinan te Megbevayà, ne midhitindeg sikandin ne midtagnè din is utew zekelà he vitil he ebpekeeneb te tivuuk he kelibutan. (Ne nehitavù heini hein iyan pa hadi diyà te Ruma si Claudio.) ²⁹Ne tenged dutun neuyun is menge sumusundan diyà te Entiyukya he ed-emuètè dan te selapì. Ne mebegey is kada sevaha sumalà is egkehimu zin wey zan metevangi is menge egkengeayuyu he menge zuma zan he menge tumutuu ziyà te prubinsya he Hudiya. ³⁰Ne mid-ulaula zan heini ne midsugù dan si Bernabe wey si Seulu he iyan ibpahated te selapì diyà te menge ebmegurangan te menge tumutuu ziyà te Hiruselim.

Is Kebpeguwaa ki Pedro Ziyà te Pirisuwan

12 ¹Ne zutun he timpu, ebpesipelahan ni Hadì Hirudis is duma he menge tumutuu ki Jesus. ²Si Santiago, sikan is suled ni Juan, impetibas ni Hirudis su wey mebpatey. ³Ne hein netuenan ni Hirudis he utew ingkesuat te menge Hudiyu is kedhimetayi ki Santiago, impezakep din daan si Pedro. (Nehitavù heini hein Pista te Supas he Wazè Din Tapey.) ⁴Ne zutun te kegkezakep ki Pedro, impepirisu sikandin ni Hirudis ne impalad din diyà te heepat he gurupu he menge sundaru he iyan eguwardya kandin. Ne tig-epat he sundaru is kada gurupu. Neisip ni Hirudis he emun egkeipus haazà is pista he egngезanan te Pista te Kedlevayi, ed-imbistigahan din si Pedro ziyà te etuvangan te menge Hudiyu. ⁵Ne tenged dutun diyà si Pedro te seled te pirisuwan he ebentayan dutun te menge sundaru. Ne nenigudu med-ampù is menge tumutuu su edhengyuen dan diyà te Megbevayà he tevangi zin si Pedro.

⁶Ne zutun te kezukileman he emun egkepawà dutun ibpeetuvang ni Hadì Hirudis si Pedro te menge etew, ne si Pedro, diyà iphezegà te teliwazà te zezuwa he sundaru. Midhiketan sikandin te zezuwa he kedina ne zuen daan menge sundaru he impevantey zutun te gemawan te pirisuwan. ⁷Ne netekewtekew te zuen mibpaahà kandin he velinsuguen te Nengazen ne zuen daan neketayew zutun te seled te pirisuwan. Ne

migewezan dutun te velinsuguen si Pedro ziyà te kilid ne migunggel zin ne mibpukew zin. Ke sikandin te, “Enew ka gaanggaan.” Ne zutundutun naawà is menge kedina ziyà te menge velad ni Pedro. ⁸Ne migkegiyan sikandin te velinsuguen te, “Bevakes ka wey sesepatus ka.” Ne mibpemineg si Pedro. Ne migkagi en maan haazà is belinsuguen te, “Samput ka ne zuma ka kedì.” ⁹Ne midsunud si Pedro kandin pehendiyà te gawas, iyan, wazè din metueni he kenè din tegeinep dà haazà is kedtevangi kandin dutun te velinsuguen. ¹⁰Ne midlevayan dan is aney en he guwardya zutun te ibayè dan ne human is ikezuwa, ne te kebpekeuma zan dutun te lekeb he putew te pultahan he ziyà ipesinaru te inged, netekewtekew mepuwas dà duen haazà te wazà mibpuwas duen ne migawas dan dutun. Ne midlaus dan is dezuwa, ne te kegketegtegaad te kedhipanew zan ne nahanew haazà is belinsuguen, ne netagak si Pedro zutun te sebsevaha zin.

¹¹Ne human mesavut ni Pedro he kenè bes tegeinep dà haazà ne ke sikandin te, “Tutuu ves iyan he midsugù te Nengazen is belinsuguen din ne midlibri e zin wey kenà a mekeizi te gehem ni Hirudis. Nelibri ad guntaan te langun he mezaat he ed-ul-ulahan kedì he ebperetengen pezem te tivuuk he kehudiyuwan.”

¹²Ne zutun te kegkesevuta zin kayi te langun, midlaus diyà te valey ni Maria, sikan is iney ni Juan he iyan kes Juan he ed-umawen daan ki Marcos. Ne zutun te valey mezakel is nengetigum he menge tumutuu su ed-ampù dan diyà te Megbevayà. ¹³Ne midteguktuk ni Pedro is pultahan te ibpegunselang dutun te lama. Ne zuen dutun suluguen he vahi he eggezanan ki Ruda ne mid-ehè din su edsusiyen din ke hentei. ¹⁴Ne nekilala zin is lageng ni Pedro, iyan, tenged te utew zin kegkesuat te kebpekeuma ni Pedro, wazè din mepuwasi haazà su mibpelelaguy nasi is edlikù su ebpenudtulan din is menge zuma zin te nekeuma en si Pedro ne zutun en te gawas. ¹⁵Ne migkagi is menge zuma zin te, “Ebunegen ka!” Iyan, edtegel si Ruda te, “Kenà, iyan en si Pedro.” Ne ke sikandan te, “Kenà iyan si Pedro, kekenà, iyan sikan is belinsuguen te Megbevayà he ebantey kandin.” ¹⁶Ne wazà med-engked si Pedro he edteguktuk. Ne hein mibpuwasan dan, utew zan nengeinuinu su si Pedro en iyan haazà. ¹⁷Ne in-uyew zin kandan he kenè dan megurub ne mibpenudtul zin kandan is paagi te Nengazen te kedlibriya kandin puun diyà te pirisuwan. Ne migkegiyan din sikandan te, “Tudtuli niw zaan si Santiago wey is menge zuma he suled tew.” Ne mid-awà sikandin dutun, ne midhendiyà te sengeinged.

¹⁸Ne hein nepawà dutun, utew nengeliveg is menge sundaru ziyà te pirisuwan su hendei vuwa si Pedro? ¹⁹Impepengahà ni Hirudis, iyan, wazè dan sikandin maahà. Ne impepengimbistiga zin sikan is menge guwardya ne impepenhimetayan din sikandan.

Ne zutun mid-awà si Hirudis diyà te prubinsya he Hudiya ne midtupang diyà te Sisarya ne ziyà med-ubpà.

Is Kebpatey ni Hirudis

²⁰Ne zutun he timpu nepeukan ni Hadì Hirudis is minge meginged diyà te minge inged he Tiru wey Sidun. Mibpetavang dan ki Belastu he sinerigan ni Hirudis he edumala te turugan din. Ne nengetigum dan su edhendiyè dan te ki Hirudis su edhengyuan dan he maawà is pauk din kandan. Umba mid-ulaula zan haazà su ziyè dan dà ebepekuwa te keyayan te inged dutun te hadì.

²¹Ne zutun te andew he midtelaan ni Hadì Hirudis, mid-etuvang dan kandin. Insun-ud ni Hirudis is bisti zin te kedhadì ne mibpinuu ziyà te pinuuwè din te kedhadì ne midlelagan din sikandan. ²²Ne nengelipey zutun is minge etew. Mibpengulahì dan is egkagi te, “Kenà etew zà duen is egkagi, kekenà, diwata en.” ²³Ne segugunà midlatun diyà te lawa zin is daru he insavuk te velinsuguen te Nengazen su ingkesuat ni Hirudis haazà is ked-ezapa kandin te minge etew, ne wazè din iyan ipaazap is Megbevayà. Ne midteggayan is lawa zin ne wazà utew meuget ne minatey.

²⁴Iyan, mid-iseg is kedsengyawa te minge tumutuu te Lalag te Megbevayà, ne mibmezakel utew is minge tumutuu zutun. ²⁵Ne mid-uli si Bernabe wey si Seulu is ebpuun diyà te inged he Hiruselim hein neipus dan is mibpevelan kandan, ne miduma zan daan si Juan, sikan is edumawen ki Marcos.

Is Kebpilia ki Seulu wey ki Bernabe

13 ¹Ne zuen minge tumutuu ziyà te inged he Entiyukya he minge menunudlù wey ebpemeneuven te Megbevayà. Dutun si Bernabe, si Simeon he migeraran daan te Meitem. Dutun daan si Lucio he tigSirini wey si Menain he ziyè en medekelà te turugan su impeelukuy ki Gubirnedur Hirudis hein batè pa. Ne zutun daan si Seulu. ²Ne zutun te ked-azap dan te Nengazen wey kedsalang dan te egkaan su ed-ampù dan, duen impesavut te Wagas he Mulin-ulin kandan. Ke sikandin te, “Ipeveyveyai niw kedì si Bernabe wey si Seulu su wey zan meveeli is ibpevelan ku kandan.” ³Ne mid-uman dan medsalang te egkaan ne mid-ampù dan diyà te Megbevayà, ne zutun indepenet dan is belad dan ki Bernabe wey ki Seulu ne impegenat dan sikandan.

Hein Diyà si Bernabe wey si Seulu te Sipru

⁴Ne haazà is dezuwa, geina te midsugù sikandan te Wagas he Mulin-ulin, midlazas dan pehendiyà te inged he Silusya ne zutun mid-untud dan te barku su edhendiyè dan te pulu te zagat he egngезanan te Sipru. ⁵Ne

hein nekezunggù dan diyà te inged he Selemina, impesavut dan dutun is Lalag te Megbevayà diyà te minge simbahan te minge Hudiyu. Iyan дума zan he edtavang kandan si Juan, kes ed-umawen ki Marcos.

⁶Ne mid-abley zan haazà is pulu ne nekeuma zan diyà te inged he Pepus. Ne zutun neuma zan is selemengkiru he egngезanan ki Berhisus. Hudiyu haazà he mibpetuu he ebpeneuven sikandin te Megbevayà.

⁷Emigu sikandin ni Sergio Peulu, te gubirnedur zutun te pulu. Ne uluwanen he etew haazà si Sergio. Impetawag din si Bernabe wey si Seulu su egkesuat he ebpemineg te Lalag te Megbevayà. ⁸Ne haazà is selemengkiru, ne egngезanan daan ki Ilimas, ne egkuntedahan din ensi Seulu ne midhimu zin is taman te egkehimu zin wey kenà meketuu ki Jesus haazà is gubirnedur. ⁹Ne si Seulu he egngезanan daan ki Pablo, nepurung sikandin ulini te Wagas he Mulin-ulin. Midtengtengan din haazà is selemengkiru ¹⁰ne migkegiyan din te, “Iring ka ki Setanas he ebpenlimbung. Utew ka lalung ne kuntada ka te minsan hengkey he meupiya. Su is Lalag te Nengazen he utew hustu, egkegiyen nu he tarù. ¹¹Ne guntaan,” ke si Pablo, “edsilutan ka te Nengazen. Egkelakap ka, ne egkeuget ka egkeulii ne kenè ka ebpekehà.” Ne zutundutun mibmerusirem is ked-ahà ni Ilimas. Ne nekekawàkawà su ebpetavang te minge etew he mekeagak kandin. ¹²Ne zutun neketuu haazà is gubirnedur geina te neehè din haazà is neulaula, su utew sikandin neinuinu te impesavut kandin he keagi te Nengazen.

Hein Diyà si Pablo te Entiyukya he Sakup te Pisidya

¹³Ne si Pablo wey is minge zuma zin, mid-awè dan dutun te inged he Pepus ne mid-untud dan te barku. Ne midhendiyè dan te prubinsya he Pempilya, diyà te inged he Pirga. Ne si Juan mulà, mid-ewaan din sikandan ne mid-ulì diyà te Hiruselim.

¹⁴Ne mid-awè dan diyà te Pirga ne midlaus dan diyà te inged he Entiyukya, sikan is Entiyukya he ziyà te prubinsya he Pisidya. Ne te andew he Sebadu midseled dan diyà te simbahan te minge Hudiyu ne mibpinuu zan dutun. ¹⁵Ne zuen mibasa ziyà te insurat he kesuguan wey ziyà te minge surat te ebpemeneuven dengan. Ne hein neipus haazà, mibpeinsaan ensi Pablo te minge egalen dutun te simbahan te, “Menge suled, ke zuen niw ibpesavut he ibmelig-en te kedtuu kayi te nengetigum he etew, ebpeminegen dey.” ¹⁶Ne midhitindeg si Pablo ne imbayew zin is belad din *su wey zan metueni he zuen egkegiyen din* ne migkagi te, “Menge zuma ku he kevuwazan ni Israyil wey sikiyu is langun he ed-azap daan te Megbevayà, peminega niw is egkegiyen ku. ¹⁷Is Megbevayè tew te minge Hudiyu, nepilì din dengan is minge kepuun tew. Ne midtuvazan din sikandan te meupiya. Ne tenged dutun utew mibmezakel is kevuwazan dan te kemulu zan pa ed-ubpà diyà te tanà he Ihiptu he kenà kandan he

inged. Ne is Megbevayà, pinaagi te zekelà he gehem din, midtevangan din is menge kepuun tew wey zan mekeawà diyà te Ihiptu. ¹⁸Ne seled te kepatan he tuig te kemulu zan pa zutun te tanà he kenà ed-ubpaan te etew, naantus te Megbevayà is kedsukul zan kandin. ¹⁹Is menge meginged dutun te pitu he ginhedian diyà te tanà he Kenaan, nengezaag sikandan te Megbevayà ne impaangken din is tanè dan te menge kepuun tew. Is ked-ul-ulaha te Megbevayà dutun te langun, ne seled te heepat he gatus wey kelimahan he tuig. ²⁰Ne hein netapus haazà, menge zatù en is impezumala zin kandan taman te timpu ni Samuel, te ebpeneuven dengan.

²¹Ne zutun midhangyù dan diyà te Megbevayà he pilia zin is hadi he iyan edumala kandan. Ne si Seulu, he anak ni Kis he kevuwazan ni Benjamin, nepili te Megbevayà he iyan hadi dan. Ne midhadì si Seulu seled te kepatan he tuig. ²²Ne zutun in-awà te Megbevayà si Seulu zutun te kedhadì din, ne si David maan is impehadì din kandan. Ne migkagi is Megbevayà te, 'Heini si David, is anak ni Isai, neehè ku he utew metinumanen te ebpevelan ku kandin; utew ku egkesuati is menge ulaula zin.' ²³Na," ke si Pablo, "si Jesus, is sevaha he kevuwazan ni Hadi David, iyan impenaad te Megbevayà he edlibri kenitew te kevuwazan ni Israyil wey kiw kenà mesiluti. ²⁴Ne zutun te wazè pa mebpuun mebpenurù si Jesus, impesavut ni Juan Megbebewtismu ziyà te langun he menge kevuwazan ni Israyil he kinahanglan he mebpebewtismu zan he tuus te mid-iniyugan dan is memezaat he ulaula. ²⁵Ne zutun te megaan en egkepasad ni Juan is ebpevelan kandin te Megbevayà, migkegiyan din is menge etew te, 'Kunaan niw vuwa ke iyan a sikan is ebpeebuten niw he hadi, iyan, kenà a iyan. Ebpekesunud sikandin kediey ne lavew sikandin kedì su minsan te kedhekaza zà te hiket te sepatus din kenè e pa zait.'

²⁶Ne menge suled," ke si Pablo, "sikiyu is menge zuma ku he kevuwazan ni Israyil wey kevuwazan ni Abraham, wey sikiyu zaan is kenà Hudiyu he ed-azap daan te Megbevayà, iyan kiw kes mibpeuwitan te Megbevayà te Meupiya he Tudtulanen wey kiw melibri te kedsiluti kenitew. ²⁷Is menge Hudiyu he menge meginged diyà te Hiruselim wey is menge egalen dan, wazè dan mesavut he iyan si Jesus sikan is edlibri kenitew. Ne wazè dan daan mesavut is insurat he tagnà te ebpemeneuven dengan te Megbevayà. Minsan ke egkezineg dan is kebesaha kayi kada Sebadu ziyà te menge simbahan dan, nengetuman dan gihapun kes nengetagnà pinaagi te kekgagi zan he zait si Jesus he edhimetayan. ²⁸Ne minsan pa zutun te wazè dan naahà he salà he zait he idhimetayi kandin, midhangyù dan si Gubirnedur Pilatu he pehimetayi zin si Jesus. ²⁹Ne hein nengeulaula en te menge tigHiruselim kes langun he netagnà dengan he ibpeulaula zan kandin, in-awè dan is lawa zin dutun te krus he

midrensangan dan kandin ne inleveng dan. ³⁰Ne mibanhew sikandin te Megbevayà. ³¹Ne hein nevanhew en si Jesus, seled te mezakel he menge andew is layun din kebpaahà te menge etew he iyan menge zuma zin hein mid-awà sikandin diyà te prubinsya he Geliliya ne midhendiyà te inged he Hiruselim. Ne sikandan guntaan, ibpenudtul zan si Jesus diyà te menge zuma tew he kevuwazan ni Israyil. ³²Ne sikami zaan,” ke si Pablo, “dini key guntaan su ibpesavut dey keniyu is Meupiya he Tutdulanen. Duen ed-ul-olahan te Megbevayà he impenaad din dengan te menge kepuun tew. ³³Ne sikitew is menge kevuwazan dan, midhimu zin dini te kenitew is impenaad din kandan ne mibanhew zin si Jesus. Su zuen migkagi te Megbevayà dutun te libru te menge Salmo he insurat dengan dutun te ikezuwa he Salmo he edhenduen te,

‘Iyan ka Anak ku ne guntaan ibpeehè ku he Amey a kenikew.’

³⁴Ne impenaad daan dengan te Megbevayà is kebenhawa zin ki Jesus wey is kenè din kebmehimuwa he meredak is lawa ni Jesus su ke sikandin te,

‘Kes menge tuvad he impenaad ku ki David,
siguradu idtuvad ku keniyu.’

³⁵Ne zuen pa netagnà ni David *he menge lalag ni Jesus* he edhenduen te,

‘Siak is metinumanen he suluguen nu,
kenè nu ebmehimuwen he meredak is lawa ku
ziyà te leveng.’

³⁶Ne netuenan ta, menge suled,” ke si Pablo, “*he neuget en si David*.

Midtuman din is mibpeveelan kandin te Megbevayà ne hein neumuran sikandin ne minatey. Inleveng uvey te menge lukes din ne neredak is lawa zin. ³⁷Iyan, si Jesus mulà, he mibanhew te Megbevayà, ne wazà mulà meredak is lawa zin. ³⁸Kinahanglan, menge suled, he sevuta niw he tenged ki Jesus, ibpesavut dey en keniyu he ebpeseyluwen kiw te Megbevayà te memezaat he ulaula. ³⁹Kenè kiw egkelibri te menge salè tew pinaagi te kedtumana tew te kesuguan ni Moises, iyan, is minsan hentei he edtuu ki Jesus, egkelibri mulà sikandin. ⁴⁰Purungi niw isipa heini su wey kenà mehitavù diyà te keniyu is netagnà dengan he Lalag te Megbevayà he insurat te ebpemeneuven he ke sikandin te,

⁴¹‘Sikiyu is edsumpalit,
utew kew egkeinuinu te ebeelan ku.
Ne ebpatay kew su zuen ebeelan ku
he egkeehè niw, iyan,
kenè niw edtuuwan minsan duen edseysey keniyu.’ ”

⁴²Ne hein miguwà si Pablo wey si Bernabe zutun te simbahan, migkegiyan sikandan te menge etew he medlikù dan te ed-ilis he Sebadu wey zan iuman ipesavut haazà is midseysey ni Pablo. ⁴³Ne zutun te ked-awè dan puun te simbahan, mezakel is menge etew he nemenduma

ki Pablo wey ki Bernabe. Elin dutun is menge Hudiyu wey kenà menge Hudiyu he edsimba zuma te menge Hudiyu. Mibpekibitiyara kandan ensi Pablo. Ne midsembagan dan sikandan he kenè dan engkezi is kedsarig dan te gagew te Megbevayà.

⁴⁴Ne zutun te mid-ilis he Sebadu hapit langun te tivuuk he menge meginged dutun te Entiyukya is nengetigum dutun te simbahan su ebpeming dan te Lalag te Nengazen. ⁴⁵Iyan, hein nengeahà te menge Hudiyu is mezakel he menge etew, nengesina zan engki Pablo ne midsumpalit dan is impenurù ni Pablo ne mibpenulè dan sikandin. ⁴⁶Ne minsan pa zutun wazà mahandek si Pablo wey si Bernabe su ke sikandan dutun te menge Hudiyu te, “Kinahanglan he edhunaan dey sikiyu is menge Hudiyu edtudtuli te ibpesavut te Megbevayà, iyan, geina te kenè niw edewaten, ibpeehè niw he kenè kew zait he ebegayan te untung he wazà pidtemanan. Ne tenged dutun kenè dey en maan ibpesavut is Meupiya he Tudtulanen diyan te keniya, kekenà, edhendiyè key te kenà menge Hudiyu. ⁴⁷Iyan heini ebpeveelan kenami te Nengazen su zuen insurat he lalag din he edhenduen te,

‘Midhimu ku sikew he sulù he ebpeketayew te menge etew he kenà menge Hudiyu wey mesangyew ziyà te egketemanan te kelibutan is kedlibriya ku te menge etew wey zan kenà mesiluti.’ ”

⁴⁸Ne hein nezing haazà te menge etew zutun he kenà menge Hudiyu, nengeliyep zan utew ne mibpeselematan dan is impesavut kandan te Nengazen. Ne is langun he menge etew he imbanglis kandan te Megbevayà is untung he wazà pidtemanan, nemeketuu.

⁴⁹Ne nekeeneb is Lalag te Nengazen diyà te langun he menge siringan dutun he menge inged. ⁵⁰Ne is menge punuan dutun te inged he Entiyukya wey is menge vai he ed-azap te Megbevayà, midhimu sikandan te menge Hudiyu he mengepauk dan ki Pablo wey ki Bernabe. Ne midsegseg dan haazà is dezuwa zutun te inged. ⁵¹Ne zutun te ked-awà ni Pablo wey si Bernabe, in-awè dan is tanà diyà te parapara zan wey metueni te menge etew he kuntada sikandan te Megbevayà. Ne midlaus dan diyà te inged he Ikunya. ⁵²Ne is menge sumusundan ni Jesus he netagak diyà te inged he Entiyukya, mid-ulinan te Wagas he Mulin-ulin ne utew zekelà is kelipey zan.

Hein Diyà si Pablo wey si Bernabe te Ikunya

14 ¹Ne haazà is neulaula ziyà te Entiyukya, ne iring din ded daan is neulaula ziyà te Ikunya su midseled si Pablo wey si Bernabe diyà te simbahan te menge Hudiyu ne utew mezesen is kebpesevuta zan te Lalag te Megbevayà. Ne tenged dutun mezakel is menge Hudiyu wey kenà menge Hudiyu he neketuu ki Jesus. ²Ne sikan is menge Hudiyu he wazà medtuu, midhimu zan he mengepauk te menge tumutuu is

kenà minge Hudiyu. ³Ne malù netegtegaad is ked-ubpà te minge epustul, si Pablo wey si Bernabe, dutun te Ikunya. Wazè dan ikehandek is kedsengyawa zan te keagi te Nengazen. Ne midtuvazan sikandan te Nengazen su mibegayan din sikandan te gehem wey zan ikepaahà is minge singyal wey egkein-inuwan he iyan timaan he tutuu is impenudtul zan he gagew te Nengazen. ⁴Ne nengevahinbahin is minge etew zutun te Ikunya. Is duma, edlevanan dan haazà is dezuwa he epustul, ne is duma, ne ziyè dan te minge Hudiyu.

⁵Ne is minge Hudiyu wey minge punuan dan wey is minge zuma zan he kenà minge Hudiyu, neisip dan he ebpesipelahan dan wey edtulengen dan te vatu is minge epustul. ⁶Ne hein netueanan heini eni Pablo, mibpelaguy zan pehendiyà te inged he Dirbi wey Listera wey te siringan dutun he minge inged diyà te prubinsya he Likeunya. ⁷Ne impesavut dan te minge etew zutun is Meupiya he Tudtulanen.

Si Pablo wey si Bernabe Ziyà te Listera wey Dirbi

⁸Ne ziyà te Listera neehè dan is etew he ebpimpinuu he nepiang is minge paa zin. Puun pa te ked-enaka kandin kenè en ebpekehipanew. ⁹Ne mibpemingeg din is minge lalag ni Pablo. Ne zutun netueanan ni Pablo he zuen kedtuu zutun te etew su wey meulii. Ne midtengtengan sikandin ni Pablo ¹⁰ne midhabet is egkagi te, “Tulidtulid ka hitindeg!” Ne zutundutun nekehitingeg sikandin ne midhiphanew. ¹¹Ne hein naahà te mezakel he minge etew haazà is midhimu ni Pablo, mibpemengulahì dan te kinegiyan he Linikeunyan he egkagi te, “Mibpeetew en is minge ziwata ne mibulusan kiw zan!” ¹²Ne egkegiyan dan he si Bernabe, iyan kes diwata zan he si Siyus, ne si Pablo, iyan kes diwata he si Hirmis su iyan metau zutun te zezuwa he ebpesavut. ¹³Ne zuen dutun uvey te inged simbahan te ziwata zan he si Siyus. Ne is beylan he memumuhat dutun, dutun en sikandin te pultahan te inged is ed-uwit te minge kevukazan he miduzung wey vaka he ibpemuhat su sikandin wey is minge etew, ed-ezapan dan ensi Pablo. ¹⁴Ne hein netueanan ni Pablo wey si Bernabe he iyan haazà ebeelan dutun te minge etew, mibpemindas dan is kumbalè dan te zezuwa su ibpeehè dan he igkeepes dan haazà he ulaula, ne mibpelelaguy zan pehendutun te minge etew. Ne migkagi sikandan te, ¹⁵“Maan is ed-ezapan key keniyu, minge suled? Minge etew key zà daan; menusiye key zaan iring keniyu! Midhendini key te inged niw wey zey ikepesavut keniyu is Meupiya he Tudtulanen wey niw meengkezi heini is minge ulaula niw he wazè din pulus ne wey niw zaan tuuwi is Megbevayà he wazè din kemetayen. Iyan sikandin nenlimbag te langit wey tanà wey zagat wey is minsan hengkey he tagù kayi. ¹⁶Dengan intugut din kenitew te tivuuk he menusiya he ed-ul-ulahan tew is sumalà te egkesuatan tew, minsan ke wazà pulus dutun. ¹⁷Iyan, minsan pa zutun, egketueanan ta

gihapun ke hentei sikandin pinaagi te minge pengelimuman din kenitew. Su ebegayan ki zin te uzan wey vegas te minge pinemula ta emun tiragun. Ibegey zin kenitew is egkinehenglanan tew wey zuen keuyagan tew ne zuen ibmeupiya te gehinawa tew,” ke sikandan. ¹⁸Ne minsan pa te iyan haazà minge lalag eni Pablo, hapit kenè dan egkezawey haazà is minge etew he ed-azap kandan. ¹⁹Ne nekeuma is minge Hudiyu he tig-Entiyukya ziyà te prubinsya he Pisidya wey elin dutun is minge Hudiyu he tig-Ikunya. Midhimu zan he mengepauk engki Pablo haazà is minge etew. Midtuleng dan si Pablo te watu ne miguyud dan in-awà dutun te inged su kunaan dan ke minatey en. ²⁰Iyan, hein midlingutan sikandin te minge tumutuu, mid-enuw ne midlikù dutun te inged. Ne zutun te mid-ilis he andew, midhendiyà si Pablo wey si Bernabe te inged he Dirbi.

Is Kedlikù ni Pablo wey ni Bernabe Ziyà te Entiyukya

²¹Ne impesavut ni Pablo wey ni Bernabe is Meupiya he Tudtulanen diyà te minge etew ziyà te Dirbi, ne mezakel zutun is midsundan ki Jesus. Ne zutun mid-ikul zan is imbayè dan ne midlikù dan diyà te inged he Listera, wey ziyà te inged he Ikunya wey Entiyukya he ziyà te prubinsya he Pisidya. ²²Ne impesavut dan te minge tumutuu zutun is ibmezesen te kedtuu zan. Migkagi zan kandan he kinahanglan he kenè dan engkezi is kedtuu zan ki Jesus. Ke sikandan te, “Sikita is tumutuu, wey ki zà egkehedi te Megbevayà ke egkeantus ta is mezakel he kemeregenan.” ²³Diyà te kada iglisya, *he ke và dà egkegiya, gurupu te minge tumutuu, midtezù ensi Pablo te minge ebmegurangan. Midsalang dan egkaan is ed-ampù; ne is minge sumusundan dutun, insarig ni Pablo wey si Bernabe ziyà te Nengazen he midtuuwan dan.*

²⁴Ne hein mid-ikul ensi Pablo te imbayè dan diyà te prubinsya he Pisidya nekeuma zan diyà te Pempilya. ²⁵Ne impesavut dan is Lalag te Megbevayà diyà te inged he Pirga ne zutun midtupang dan pehendiyà te Etalya. Ne zutun mid-untud dan te barku ²⁶su ed-ulì dan diyà te inged he Entiyukya. Su is Entiyukya, iyan mibpuunan dan he inged hein aney iampù te minge tumutuu he elimahi sikandan te Megbevayà dutun te mibpeveelan din kandan he nepasad dan en.

²⁷Ne hein nekeuma zan diyà te Entiyukya, midtigum dan is minge tumutuu ne midtudtul zan is langun he nehimu te Megbevayà pinaagi kandan wey is kedhimuwa zin te paagi wey meketuu is minge etew he kenà Hudiyu. ²⁸Ne neuget is ked-ubpè dan te zezuwa zuma te minge tumutuu zutun te Entiyukya.

Is Bitiyara Ziyà te Hiruselim

15 ¹Ne zutun he timpu, duen minge Hudiyu he tumutuu he ebpemuun diyà te prubinsya he Hudiyu he midhendiyà te inged he Entiyukya.

Ne haazà he minge etew, duen ibpenurù dan diyà te minge kenà Hudiyu he tumutuu he tig-Entiyukya. Ke sikandan te, “Emun kenè niw edtumanen is insugù kenitew te kesuguan he imbilinbilin dengan ni Moises he mebpesirkunsidar kew, kenà egkehimu he egkelibri kew te silut.” ²Ne si Pablo wey si Bernabe, wazè dan dewata haazà is impenurù dutun te minge etew, ne utew mezesen is kebpekidlewanè dan, umba, is minge tumutuu zutun, midsugù dan si Pablo, si Bernabe, wey is duma pa kandan he medhendiyè dan te Hiruselim wey zan ikeinsà haazà diyà te minge epustul wey minge ebmegurangan te minge tumutuu ziyà. ³Ne hein migenat dan, midtevangen sikandan te minge tumutuu. Ne ziyè dan mekevayà te prubinsya he Pinisya wey prubinsya he Semarya ne impenudtul zan te minge tumutuu zutun he nemeketuu en is mezakel he kenà minge Hudiyu. Mibpenudtul zan he mid-ewaan en te kenà minge Hudiyu is daan he tuluuwan dan wey zan mekesundan te Megbevayà. Ne hein nezineg haazà te minge tumutuu ziyà, nengeliwey zan utew. ⁴Ne hein nekeuma zan diyà te Hiruselim, midtelavuk kandan he nengegalew is langun he tumutuu wey is minge epustul wey minge ebmegurangan, ne impenudtul ni Pablo wey ni Bernabe is langun he nengeveelan te Megbevayà pinaagi kandan. ⁵Ne zutun duen migkagi he minge tumutuu he sakup te upakat he Perisiyu, ne ke sikandan te, “Sikan is minge tumutuu he kenà minge Hudiyu, kinahanglan he edsirkunsidaren sikandan wey kinahanglan ded daan he ibpetuman kandan is kesuguan he imbilinbilin ni Moises.”

⁶Ne zutun miburunburun is minge epustul wey minge ebmegurangan wey zan memitingi. ⁷Ne hein malù en netegtegaad dutun te kebivitiyara zan, midhitindeg si Pedro ne ke sikandin te, “Minge suled, netuean niw he kayi te kenitew, iyan a sikan is mibpili dengan te Megbevayà wey ku metudtul ziyà te kenà minge Hudiyu is Meupiya he Tudtulanen wey zan mekepeming wey meketuu te Megbevayà. ⁸Ne is Megbevayà, impeehè din kenitew is kedewata zin te kenà minge Hudiyu su imbegey zin kandan is Wagas he Mulin-ulin iring te kebegaya zin dini te kenitew. Nesayud sikandin te minsan gehinawa tew te menusiya. ⁹Wazà daan isipa te Megbevayà he zuen kebpekeviza te kenà minge Hudiyu kenitew su tenged te kedtuu zan mibpesaylu zin sikandan te minge ulaula zan he mezaat iring te kebpesaylu zin dini te kenitew. ¹⁰Ne maan is egezamen niw is pauk te Megbevayà? Maan is ibpetuman niw te minge zuma tew he sumusundan ni Jesus is minge imbilinbilin he kesuguan he utew meregen, he sikitew wey is ginikanan tew, wazà daan meketuman. ¹¹Kenè niw ve, minge suled, edtuuwan he is kegelibri kenitew te silut te minge Hudiyu, ne iring daan te kegelibri kandan te kenà minge Hudiyu su tenged dà te gagew te Nengazen tew he si Jesus?”

¹²Ne zutun, wazè en midtavak; ne mibpeming dan is tudtul ni Bernabe wey si Pablo te langun he egkengein-inuwan he mibeelan te

Megbevayà pinaagi kandan hein diyè dan te kenà minge Hudiyu. ¹³Ne hein neketapus dan is egkagi, human megkagi si Santiago. Ke sikandin te, “Menge suled, peminega niw is egkegiyen ku. ¹⁴Is Megbevayà, migugud en keniyu ni Simon Pedro is mid-ulaula zin hein aney zin en ipetuu is kenà minge Hudiyu su wey zuen minge etew zaan dutun he edsundan kandin. ¹⁵Ne haazà is kebpeketuu te kenà minge Hudiyu, nepurung mekesungkad te minge lalag he ingkesurat te minge ebpeneuven dengan te Megbevayà su zuen insurat he tagrà he edhenduen te,

¹⁶ ‘Emun egkeiwas heini,’ egkagi is Nengazen,
 ‘edlikù a ziyàn,
 ne edtukuzen ku en maan is ginhedian ni David.
 Ebpurungan ku is minge sakup din,
 ne ebegayan ku en maan sikandan te zesen.

¹⁷ Umba, is tivuuk he menusiya,
 sikan is langun he minge etew
 he edhimuwen ku he meketuu kediey,
 egkesuat dan daan he ed-azap kediey.’

¹⁸ Lalag heini te Nengazen; impesavut din en heini zengan.

¹⁹ Umba,” ke si Santiago, “iyan kedì he sambag is: heini is minge etew he kenè tew zuma te Hudiyu he edtuu te Megbevayà, kenè tew sikandan edsemuken. ²⁰ Iyan is: ebpesuratan tew sikandan ne egkegiyen tew kandan he kenè dan megkaan te egkeenen he indawey su impemuhat diyà te minge kenà tutuu he megbevayà; ne kenè dan daan hileveti is kenè dan esawa, wey kenè dan daan megkaan te lengesa wey te edlepaan he kenà ebpekelelengesa. Iyan dà heini minge sugù he imbilinbilin ni Moises he ibpetuman tew kandan. ²¹ *Umba ibpetuman tew heini su wey kenà meepes kandan is minge Hudiyu su netuenan tew he puun pa te zengan dà, kada Sebadu ebesahan te minge Hudiyu ziyà te minge simbahan dan is insurat he kesuguan he imbilinbilin kenitew ni Moises. Ne ibpenurù dan daan heini ziyà te minsan hendei he inged.”*

Is Surat Pehendiyà te Minge Tumutuu he Kenà Hudiyu

²² Ne zutun, is minge epustul wey ebmegurangan wey is langun he minge tumutuu he Hudiyu, neisip dan he ebpilì dan te minge zuma zan he ibpezuma zan ki Pablo wey ki Bernabe ziyà te Entiyukya. Ne iyan nepilì dan si Silas wey si Hudas he sevaha he ngazan din si Bersabas. Ne haazà is dezuwa, telehuzen sikandan te minge tumutuu zutun. ²³ Ne impeuwit dan kandan is surat he edhenduen te,

“Sikami is minge suled niw he epustul wey ebmegurangan te minge tumutuu he minge Hudiyu kayi, ebpengemusta key keniyu te langun he kenà minge Hudiyu he minge suled dey te kedtuu ziyàn te inged he Entiyukya wey ziyàn te minge prubinsya he

Sirya wey Silisya. ²⁴Nezineg dey is tudtul he zuen minge zuma zey he Hudiyu he nekesamuk keniyu v su igkeliveg niw is minge penurù dan, iyan, wazè dey sikandan sugua. ²⁵Ne tenged kayi, netigum key zini ne neuyunan dey he edsuguen dey ziyan is ebpekepesavut keniyu. Eduma zan ki Pablo wey ki Bernabe he minahal he suled tew. ²⁶Heini is dezuwa, impelavi zan kenà te untung dan is kedtumana zan te ebpeveelan kandan te Nengazen tew he si Jesu Kristu. ²⁷Ne heini is edsuguen dey, si Hudas wey si Silas, ebpenudtulen dan daan keniyu is seled kayi te surat dey keniyu. ²⁸Impesavut kenami te Wagas he Mulin-ulin ne neuyunan dey zaan he kenè dey keniyu ibpetuman is memeregen he imbilinbilin he kesuguan; iyan dà heini is utew kinahanglan he edtumanen niw. ²⁹Ne iyan is: kenè niw keena is impemuhat diyà te kenà tutuu he Megbevayà. Kenè niw keena is lengesa, ne kenè niw zaan keena is edlepaan he kenà ebpekelelengesa; kenè niw hileveti is kenè niw esawa. Emun edtumanen niw heini, meupiya en. Iyan dà heini lalag dey.”

³⁰Ne zutun, migenat haazà is midsugù ne nekeuma zan diyà te Entiyukya. Ne midtigum dan is langun he minge tumutuu ne indata zan haazà is surat. ³¹Ne is minge tumutuu, hein nevasa zan, utew zan nengelipey zutun te sambag kandan. ³²Ne si Hudas wey si Silas, ebpeneuven sikandan te Megbevayà, ne neuget is kebpekidlalag dan te minge tumutuu su midsembagan dan su wey meheget is kezesen te kedtuu zan. ³³Ne haazà is minge tigHiruselim, hein nepipira he andew is kebpekeuma zan dutun, mid-ulì dan diyà te midsugù kandan. Impenulud sikandan te minge tumutuu zutun he egkagi te, “Berakat he meupiya is hipanew niw.” ³⁴Asal si Silas, wazà meduma su mibpetagak mulà.

³⁵Ne neuget maan dutun is ked-ubpà ni Pablo wey ni Bernabe ziyà te Entiyukya. Sikandan wey is mezakel he minge zuma zan, impenurù dan wey impesavut dan is Lalag te Nengazen.

Is Kebpesuwayà ni Pablo wey ni Bernabe

³⁶Ne hein neuget en dutun, migkegiyan ni Pablo si Bernabe te, “Edlikuan ta nasi te edlauy is minge tumutuu ziyà te minge inged he mibpesevutan ta te Lalag te Nengazen.” ³⁷Ne nesuat dutun si Bernabe. Ne edumahan din si Juan Marcos, ³⁸iyang, kenà mulà egkesuat si Pablo he mezuma si Juan Marcos su mid-engked sikandin he edtavang kandan ne mid-ewaan din sikandan dengan hein diyè dan te Pempilya. ³⁹Ne ingkesavè dan haazà, umba mibpesuwayè dan. Ne si Bernabe, miduma zin si Marcos ne mid-untud dan te barku ne midhendiyè dan te Sipru. ⁴⁰Ne si Pablo mulà, mibpilà din si Silas he iyan edumahan din ne migenat dan daan. Ne is minge tumutuu zutun te Entiyukya, impengumew-umew

zan te Megbevayà he tevangi zin haazà is dezuwa te hipanew zan. ⁴¹Ne mid-eneb dan is menge prubinsya he Sirya wey Silisya ne midhegetan dan is kedtuu te menge tumutuu.

Si Pablo, si Silas wey si Timoteo

16 ¹Ne midlaus ensi Pablo ziyà te menge inged he Dirbi wey Listera. Ne zuen sumusundan ni Jesus he meginged dutun he egngezanan ki Timoteo. Is iney zin, ne Hudiyu he tumutuu zaan, asal is amey zin ne Gerisyahanen. ²Sumalà is lalag te menge tumutuu ziyà te Listera wey Ikunya, utew meupiya is ulaula ni Timoteo. ³Egkesuat si Pablo he edumahan din si Timoteo ne tenged dutun midsirkunsidar zin. Iyan insirkunsidara zin ki Timoteo su wey kenà meepesi si Timoteo te menge Hudiyu he ziyà te menge inged he ibayè dan, su is langun he menge Hudiyu zutun, netuenan dan he Gerisyahanen is amey ni Timoteo. ⁴Ne migenat dan en maan ne zutun te langun he menge inged he imbayè dan, impesavut dan diyà te kenà Hudiyu he menge tumutuu zutun is insugù te menge epustul wey ebmegurangan diyà te Hiruselim, ne migkagi zan kandan he kinahanglan he iyan haazà bentayi zan. ⁵Ne tenged dutun neheget is kedtuu te menge tumutuu ne mid-iseg te kada andew is kezakel te nemeketuu.

Is Nelewasan ni Pablo Ziyà te Truwas

⁶Ne ziyè dan mekevayà te menge inged he ziyà te Perigya wey Gelasya su wazà sikandan tuguti te Wagas he Mulin-ulin he ibpesavut dan is Lalag te Megbevayà diyà te prubinsya he Asya. ⁷Ne hein nekeuma zan diyà te netemanan te prubinsya he Misya, edlaus dan pezem diyà te prubinsya he Bitinya, iyan, wazà daan itugut kandan te Wagas he Mulin-ulin he ebpuun diyà te ki Jesus. ⁸Ne tenged dutun diyè dan mekevayà te Misya ne midtupang dan ne nekeuma zan diyà te inged he Truwas he ziyà te veyvey te zagat. ⁹Ne si Pablo, te mezukilem dutun, duen impaahà kandin te Megbevayà. Neehè din is iring te etew he tigMesidunya he edhangyù kandin te, “Laus kew en dini te Mesidunya su wey key keniyu metevangi.” ¹⁰Ne zutun dà te neehè din en heini, nen-ehè key te paagi wey key mekelaus diyà te Mesidunya su nesavut dey he intuvad kenami is kedsengyawa te Meupiya he Tudtulanen diyà te menge tigMesidunya.

Is Kebpeketuu ni Lydia Ziyà te Pilipus

¹¹Mid-untud key te barku ziyà te Truwas ne midhendiyè key te pulu he Semutrasya; ne zutun te ilis he andew midlaus key ne nekezunggù key ziyà te inged he Niyepulis. ¹²Ne midrenè key zutun ne mid-uzahik key ne nekeuma key ziyà te inged he Pilipus he ziyà te aney en he distritu te prubinsya he Mesidunya. Ne zutun te inged he Pilipus, ne mezakel is

menge Rumanu he umuuliey. Ne nepipira key he andew zutun te inged he Pilipus. ¹³Ne zutun te Sebadu he iyan Andew te Kedhimeley, mid-awè key ziyà te inged ne midhendiyè key te veyvey te wahig su ed-ahaan dey ke zuen be zutun edtiguman te menge Hudiyu he ed-empuan dan te Megbevayà. Ne zuen menge vahi he nengetigum dutun, ne mibpinuu key ne mibpekidlalag key kandan. ¹⁴Is sevaha zutun te menge vahi, ne egngezanan ki Lydia he tigTiyetira he zutun ed-ubpà te inged he Pilipus. Iyan petigayun din is ebpemelegyà te manggad he merudtem. Edsimba sikandin te Megbevayà. Midtuvazan sikandin te Megbevayà wey mekezawat te ibpesavut ni Pablo. ¹⁵Mibpebewtismu sikandin wey is menge emurè din dutun te valey zin. Ne migkegiyan key zin te, “Emun ed-ispipen a keniyu he tutuu is kedtuu ku te Nengazen, diyè kew pemengahik te valey ku.” Ne wazè din mehimuwa zutun he wazè key mekezuma kandin.

Is Kegkepirisu ni Pablo wey ni Silas Diyà te Pilipus

¹⁶Sengeandew zutun te edhendiyè key te elempuey zan, midsinugung kenami is bahi he uripen he mid-ulinan te mezaat he mulin-ulin he ibpeketagnè din. Ne zekelà is selapè he nekuwa te tegiuripen kandin pinaagi te kepbenagnè din. ¹⁷Ne miduma kenami ki Pablo haazà is bahi he ebpengulahè te, “Heini is menge etew, menge suluguen sikandan te lavew he Megbevayà. Ibpesavut dan keniyu is paagi wey kew melibri te idsilut din.” ¹⁸Ne kada andew zutun iyan en haazà ed-ul-olahan din. Ne te malù neuget, si Pablo, kenè en ebpekeantus ne midlilingey ne migkegiyan din haazà is mezaat he mulin-ulin te, “Pinaagi te gehem te ngazan ni Jesu Kristu, egkegiyan ku sikew he med-awè ka keniyu te vahi!” Ne zutundutun mid-ewaan haazà is bahi te mezaat he mulin-ulin. ¹⁹Ne is menge tegiuripen dutun te vahi, hein netueanan dan he naawà is kegketigayun dan pinaagi zutun te vahi, ne migewazan dan si Pablo wey si Silas ne miguyud dan pehendiyà te menge punuan te inged he zutun te pelasa. ²⁰Ne hein diyè dan en, impeetuvang dan te menge upisyal he Rumanu ne ke sikandan te, “Heini he menge etew, menge Hudiyu sikandan ne ebaal zan te samuk kayi te inged tew. ²¹Ibpenurù dan is menge vetasan he supak te veldud tew. Ne sikitey is menge Rumanu, kenè kiw mulà ebpekezawat wey ebpeketuman te ibpenurù dan he vetasan.” ²²Ne zutun midtistigusan haazà te mezakel he menge etew is kedsumbunga zan ki Pablo wey ki Silas; ne haazà is menge upisyal, mibpemindas dan is menge ugelingen ni Pablo wey ni Silas su edlevasan dan ne insugù dan he vugela haazà is dezuwa. ²³Ne hein nepurung en mevugel si Pablo wey si Silas, mibpirisu sikandan. Sikan is ebantey zutun te pirusuwan, midteleanan dan he purungi zin bentayi haazà is dezuwa. ²⁴Ne zutun in-ahuk din sikandan diyà te rugu he ziyà te teliwazà te pirusuwan, ne is menge paa zan, midlipit te petungà.

²⁵Ne hein metaneb en is kezukileman, mid-ampù si Pablo wey si Silas wey migkanta zan is edalig te Megbevayà, ne ebpememineg kandan is menge zuma zan he pirisu. ²⁶Ne zutun midtik-ew medlinug te utew mezesen ne nepurung mehuyung haazà is pirisuwan. Ne segugunà nepuwas is menge lekeb dutun te pirisuwan ne nengetangtang is menge puas te langun he menge pirisu. ²⁷Ne zutun nepukew sikan is ebantey zutun te pirisuwan. Ne hein neehè din he nengepuwas is menge lekeb te pirisuwan, kunaan din ke nemekepelaguy is menge pirisu ne midhulavut din is sundang din. Edsundangen din en pezem is lawa zin su edhiket. ²⁸Ne zutun mibensag si Pablo te, “Kenè nu pelii is lawa nu su heini key zed te seled ne wazà mibpelaguy kenami.” ²⁹Ne haazà is ebantey, midsugù he uwita is sulù ne migaanggaan medseled ne midluhud is egkerkeren diyà te etuvangan ni Pablo wey ni Silas. ³⁰Ne miduma zin sikandan diyà te gawas ne ke sikandin te, “Hengkey is ed-ul-ulahan ku wey a melibri te silut te Megbevayà?” ³¹Ne midtavak dan te, “Tuu ka te Nengazen he si Jesus ne egkelibri ka, ne egkelibri zaan is pemilya nu ke edtuu zan.” ³²Ne sikandin wey is menge emurè din diyà te valey zin, impesavut kandan eni Pablo is Lalag te Nengazen. ³³Ne zutun te metaneb pa is kezukileman, migkuwa si Pablo wey si Silas dutun te ebantey te pirisuwan, ne mibpenlùluan din is menge palì dan ne zutun mibewtismuwan dan sikandin wey is tivuuk he pemilya zin. ³⁴Impepemenahik din si Pablo wey si Silas diyà te valey zin ne impekaan din. Ne sikandin wey haazà is pemilya zin, utew zan nengelipey su neketuu zan en te Megbevayà.

³⁵Ne hein nepawà dutun, midsugù te menge upisyal he menge Rumanu is menge pulis. Ke sikandan te, “Ipaawè niw en heeyan he menge etew.” ³⁶Ne zutun midtudtul haazà ki Pablo te ebantey te pirisuwan. Ke sikandin te, “Insugù te menge upisyal he Rumanu he ibpaawà kew en ki Silas. Ne ebpekeawà kew en kun asal kinahanglan he wazà samuk.” ³⁷Ne zutun, wazà dewata ni Pablo ne migkagi sikandin diyà te menge pulis te, “Kenà egkehimu su ed-inged key he zizalem te velaud te inged he Ruma ne nesupak dan is belaud te menge Rumanu su wazè key zan imbistigaha ne wazè key mekesupak te velaud, ne impevugel key zan diyà te etuvangan te langun he menge etew ne mibpirisu key zan. Ne guntaan id-eles-eles key keniyu ibpaawa! Kenà egkehimu su kinahanglan he iyan ebpaawà kenami sikan is menge egalen niw he upisyal he Rumanu.” ³⁸Ne haazà is lalag ni Pablo, midtudtul zutun te pulis diyà te menge upisyal, ne hein netuenan dan he sakup bes si Pablo wey si Silas te inged he Ruma, nengehandek dan. ³⁹Ne tenged dutun midhendiyè dan ne mibuyù dan te pesaylu. Ne miduma zan sikandan diyà te gawas te pirisuwan ne midhengyuan dan he med-awè dan dutun te inged. ⁴⁰Ne mid-awà si Pablo wey si Silas dutun te pirisuwan ne midhendiyè dan te

valey ni Lydia. Midlelagan dan is minge tumutuu ne midsembagan dan wey meheget is kedtuu zan. Ne zutun midlaus dan te hipanew zan.

Si Pablo wey si Silas Diyà te Tiselunika

17 ¹Diyè dan mekevayà te minge inged he Empipulis wey Epulunya ne nekeuma zan diyà te inged he Tiselunika. Ne zuen dutun simbahan te minge Hudiyu. ^{2,3}Ne zutun midsimba si Pablo zuma te minge Hudiyu su iyan betasan din. Ne kada Sebadu seled te tetelu he simana mibpekidibati sikandin te minge etew, ne impesavut din kandan is tagnà he insurat diyà te libru he Lalag te Megbevayà he is hadi he mibpili te Megbevayà, imbanglis kandin kes kedresaya wey kes kedhimetayi kandin ne emun egkeiwas haazà ebhenawen sikandin te Megbevayà. Ne ke si Pablo te, “Heini is etew he egngезanan ki Jesus, iyan en sikan is hadi he mibpili te Megbevayà.” ⁴Ne zutun neketuu is duma he minge Hudiyu ne midsunud ki Pablo wey ki Silas. Mezakel zaan is nemeketuu he minge Gerisyahanen he zaan he edsimba te Megbevayà, wey elin daan nemeketuu is mezakel te minge vai zutun te inged.

⁵Ne zutun, nengesina engki Pablo is minge Hudiyu ne midtigum dan is mezakel he minge tepulan he wazà minge pulus he etew. Ne mid-eneb dan is tivuuk he inged te edsinamuk. Midhendiyè dan te valey ni Jason su edtegelen dan egkuwaa si Pablo wey si Silas su wey zan meuwit diyà te minge etew. ⁶Iyan, hein wazè dan sikandan maahà, midakep dan si Jason wey is duma pa he minge tumutuu zutun, ne miguyud dan diyà te minge upisyal zutun te inged dan te ebensag he egkagi te, “Heini is minge etew, nekevaal zan te samuk diyà te minsan hendei! Ne guntaan, kayi zan en maan te inged tew. ⁷Ne heini si Jason,” ke sikandan, “impepemenahik din sikandan diyà te valey zin. Pudu sikandan nekesupak te velaud te hadi tew ziyà te Ruma su egkegiyen dan he iyan hadi is etew he egngезanan ki Jesus.” ⁸Ne hein nezineg haazà dutun te minge upisyal wey minge etew, ne mibmezaat utew is gehinawa zan. ⁹Ne si Jason wey haazà is minge zuma zin, impevayad sikandan dutun te minge upisyal te piyansa te lawa zan ne human sikandan ipaawà.

Si Pablo wey si Silas Diyà te Biriya

¹⁰Ne hein mezikilem en, impehipanew si Pablo wey si Silas te minge tumutuu pehendiyà te inged he Biriya. Ne hein nekeuma zan midhendiyè dan te simbahan te minge Hudiyu. ¹¹Ne zeyzey is minge Hudiyu zutun te Biriya kenà te minge Hudiyu ziyà te Tiselunika su memetulanged dan mulà. Ne utew zan egkesuat he ebpemineg te impesavut kandan. Ne kada andew edsusiyen dan is insurat he Lalag te Megbevayà su ed-ahaan dan ke tutuu ve iyan haazà is ibpenurù eni Pablo. ¹²Mezakel zan is nemeketuu ki Jesus. Ne is mezakel zutun, ne minge telehuzen he vahi he

menge Gerisyahanen wey elin daan nemeketuu is menge Gerisyahanen he maama.

¹³Ne sikan is menge tigTiselunika he menge Hudiyu, hein nezineg dan he impesavut daan ni Pablo is Lalag te Megbevayà dutun te inged he Biriya, midhendutun dan ne midhimu zan he mengepauk engki Pablo is mezakel he menge etew. ¹⁴Ne zutun impaawà dutun si Pablo te menge tumutuu pehendiyà te zagat, iyan, si Silas wey si Timoteo, intagak din diyà te Biriya. ¹⁵Sikan is menge maama he midhated ki Pablo, miduma zan kandin taman diyà te inged he Etinas. Ne zutun mid-ulì dan diyà te Biriya ne mibpenudtul zan ki Silas wey ki Timoteo he ibpegaanggaan dan ibpetelukun ni Pablo.

Si Pablo Ziyà te Etinas

¹⁶Ne zutun te kedtegazi ni Pablo ki Silas wey ki Timoteo ziyà te Etinas, utew neseeng sikandin su neehè din he utew mezakel is menge ledawan he edsimbahan te menge meginged dutun. ¹⁷Ne tenged dutun, midseled sikandin diyà te simbahan te menge Hudiyu, ne mibpekidibati sikandin te menge Hudiyu wey te kenà menge Hudiyu he edsimba zaan te Megbevayà. Ne minsan daan diyà te mirkadu ebpekidibati sikandin te minsan hentei he zutun. ¹⁸Ne zuen dutun menge menunudlù te menge penurù dengan ni Ipikiranu wey ni Sinu. Mibpekidibati zan daan ki Pablo. Ne is duma zutun egkagi te, “Paglung heini he mepedeligen. Hengkey vuwa pezem is egkegiyen din?” Ne is duma egkagi te, “Iyan buwa ibpesavut din is menge selakew pa he menge ziwata he edsimbahan diyà te meziyù he inged.” Umba egkekagi zan haazà su impesavut kandan ni Pablo is keagi ni Jesus wey is kegkevanhew zin. ¹⁹Ne mid-uwit dan si Pablo ziyà te etuvangan te upakat dutun he egngezanan te Eriyupagu ne ke sikandan te, “Egkesuat key he metueni zey heini is begu he penurù he ibpesavut nu. ²⁰Duen edtudtulen nu he sikan dey pa mezineg; umba ebpemineg key kenikew su wey nu ikeseysel.” ²¹(Umba egkekagi zan haazà su is menge tig-Etinas wey minsan is menge umuuliey zutun, utew zan egkesuat he ebpemineg wey ebpenudtul te menge penurù he sikan dan pa mezineg minsan ke egkehepunan pa.)

²²Ne zutun midhitindeg si Pablo ziyà te etuvangan dutun te hukmanan he Eriyupagu ne ke sikandin te, “Sikiyu is tig-Etinas, nesavut ku he utew kew metinumanen te menge tuluuwen niw. ²³Su te kedrigurigu ku kayi te inged niw nengeehè ku is menge ed-ezapen niw. Ne zuen daan sevaha he pemuhatà he neehè ku he insurat dutun is lalag he edhenduen te, ‘Kayi ed-ezapa is Megbevayà he Wazè Pa Metueni.’ Ne sikan is Megbevayà he ed-ezapen niw minsan wazè niw pa metueni, iyan heini is ibpesavut ku en keniyu. ²⁴Su heini he Megbevayà, iyan nenlimbag te kelibutan wey te minsan hengkey he tagù din. Nengazen sikandin te langit wey

tanà, ne kenà diyè dà ed-ubpà te minge simbahan he mibeelan te etew, ²⁵ne wazà minsan hengkey he egkeveelan te etew he egkinehnglanan din. Su iyan sikandin ebegey te gehinawa wey untung wey is minsan hengkey ziyà te langun he minge etew. ²⁶Ne te sebsevaha zà he kepuun mibeelan din is langun he kelasi te etew ne in-eneb din sikandan kayi te tivuuk he kelibutan. Ne midtukud din he zaan is egketemanan te ed-ubpaan tew te menusiya wey is timpu te ked-ubpè tew kayi. ²⁷Umba mibeelan din heini su wey tew sikandin mepen-ahà ne wey tew meturedu sikandin. Ne is Megbevayà, kenà daan meziyù te kada sevaha kenitew, ²⁸su ‘pinaagi te kandin he gehem ebpekewaleng kiw, ne zuen daan untung tew wey kegkeetew te kada sevaha kenitew.’ Su iring te lalag te memetau he egkagi te ebpenlumlumbayan he lalag dini te keniyu he egkagi te, ‘Sikitew zaan, minge anak kiw zin.’ ²⁹Ne geina te minge anak kiw zin, iring kiw kandin. Ne tenged dutun kenè tew ed-isipen he is Megbevayà, sevaha he ledawan he vulawan wey selapì wey watu he mideyzeyanan te etew he metau. ³⁰Dengan hein wazè pa sikandin mekilala te menusiya, mibpesagdan din is mezaat he ulaula te minge etew, iyan, guntaan indawey zin en te langun he minge etew te minsan hendei he ibpeiniyugan is memezaat he ulaula. ³¹Midtendek din en is andew keuzemà he zutun ed-imbistigahan din is tivuuk he menusiya, ne metazeng daan is ked-imbistiga zin pinaagi te etew he mibpilà din. Impeehè din he tutuu heini is ebeelan din su haazà is etew, minatey ne mibanhew te Megbevayà!”

³²Ne hein nezineg dan haazà is kegkevanhew he nekagi ni Pablo, is duma zutun midsumpalit dan sikandin. Iyan, duen duma he egkagi te, “Likù ka kayi su egkesuat key pa he ebpemineg te kedseysaya nu kayi.” ³³Ne zutun, mid-awà si Pablo zutun te hukmanan. ³⁴Duen minge etew zutun he neketuu ki Jesus ne midsunud dan ki Pablo. Iyan haazà ensi Dionisio, is sevaha he zatù dutun te Eriyupagu wey elin daan is bahi he enggezanan ki Demaris wey zuen pa minge zuma zutun he neketuu.

Hein Diyà si Pablo te Kurintu

18 ¹Wazà meuget ne mid-awà si Pablo zutun te Etinas ne midlaus diyà te Kurintu. ²Ne zutun neuma zin is dezuwa he Hudiyu he telesawa he tigPuntu, si Ekilu wey is esawa zin he si Priscila. Begu pa sikandan he nekeuma zutun he ebpuun te Italya su zuen belaud ni Hadì Claudio he ibpaawà diyà te inged he Ruma is langun he minge Hudiyu. Ne mibpenumbelayan sikandan ni Pablo ³ne mid-amur sikandin kandan su neked-iring is terebahu zan he iyan is kepemaal te idlelawig he terapal. ⁴Ne kada Sebadu edhendiyà si Pablo te minge simbahan te minge Hudiyu is ebpekidlewanà su wey mesavut te minge Hudiyu wey minge Gerisyahanen he tutuu is ibpenurù din.

⁵Ne hein nekeuma si Silas wey si Timoteo is ebpuun te Mesidunya, wazà duma he vaal ni Pablo, kekenà, iyan dà is kebpesevuta zin te Lalag te Megbevayà su ibpeehè din te minge Hudiyu he tutuu iyan he iyan si Jesus sikan is mibpili te Megbevayà he ibpahadi. ⁶Ne hein wazè dan dewata su edsumpalit sikandan kandin, inhuyab din is kumbalè din he tuus te mid-engkezan din en sikandan. Ke sikandin te, “Kenè en kediey he salà ke edsilutan kew te Megbevayà. Ne guntaan diyè ku en ibpesavut is Lalag te Megbevayà te kenà minge Hudiyu.” ⁷Ne mid-ewaan din sikandan ne midhendiyà te valey ni Tito Hustu, sevaha he etew he kenà Hudiyu he midtuu zaan te Megbevayà. Nekesiringan is baley zin te simbahan te minge Hudiyu. ⁸Ne si Crispo, is egalen dutun te simbahan, neketuu te Nengazen ne neketuu zaan is pemilya zin. Ne zutun mezakel is minge tigKurintu, hein nezingè dan is Lalag te Megbevayà, neketuu zan ne mibpemebewtismu sikandan.

⁹Ne mibpaahà ki Pablo is Nengazen hein mezikilem dutun ne migkegiyan din te, “Kenè ka mahandek. Kenè nu engkezi, kekenà, ipenigudu nu is kebpesevuta nu te lalag ku, ¹⁰su zuma a kenikew. Wazà minsan hentei he ebpekekaid kenikew. Mezakel pa is ebpeketuu kediey kayi he inged.” ¹¹Ne ziyà med-ubpà si Pablo te inged he Kurintu taman te sengetuig wey heenem he vulan su impenurù din te minge etew is Lalag te Megbevayà.

¹²Ne hein iyan midhimu si Galyu he gubirnedur te prubinsya he Gerisya, midtigum is minge Hudiyu ne midakep dan si Pablo ne impeetuvang dan ki Galyu. ¹³Ke sikandan te, “Heini he etew, ibpesimba zin is minge etew te Megbevayà te paagi he supak te velaud tew.” ¹⁴Ne edtavak pezem si Pablo, iyan, migkagi si Galyu ziyà te minge Hudiyu te, “Sikiyu is minge Hudiyu, emun utew zekelà he samuk iring te hustu en he salà wey ke mezaat be he ulaula kayi te etew, ed-entusen ku te edhusey keniyu. ¹⁵Ne geina te mehitenged dà heeyan te kegkesumpakì niw tenged te minge ngazan wey is kesuguan niw, iyan kew en medhuhusey su kenà a iyan ebpenhusey te iring dutun.” ¹⁶Ne zutun impaawè din sikandan dutun te hukmanan. ¹⁷Ne is minge kenà Hudiyu zutun, midakep dan si Sustinis, is edumala te simbahan te minge Hudiyu, ne mibpemugel zan dutun te uvey te hukmanan. Ne minsan pa zutun wazà itetenged haazà ni Galyu.

Is Kedlikù ni Pablo Ziyà te Entiyukya

¹⁸Ne si Pablo, malù pa netegtegaad is ked-ubpè din dutun te Kurintu zuma te minge tumutuu ne human medlaus. Miduma zin si Ekilu wey si Priscila ne migenat dan. Ne zuen dutun impenaad ni Pablo ziyà te Megbevayà. Ne hein nekeuma zan diyà te inged he Singkriya, mibpaalut si Pablo he iyan tuus te midtuman din en. Ne mid-untud dan te barku he

edhendiyà te prubinsya he Sirya. ¹⁹Nekeuma zan diyà te inged he Ipisu ne mid-ewaan ni Pablo si Ekilu wey si Priscila. Midhendiyà sikandin te simbahan te menge Hudiyu ne mibpekibpezeyagà sikandin te menge ketezengan. ²⁰Midhangyù dan kandin he kenà petuluy sikandin med-awà diyà te kandan, iyan, wazà si Pablo mebpemineg. ²¹Su ke sikandin dutun te kegenat din te, “Edlikù a zini ke edtugut is Megbevayà.” Ne nekeuntut te barku ne mid-awà diyà te Ipisu.

²²Ne hein nekezunggù diyà te inged he Sisarya midlaus sikandin diyà te Hiruselim ne mibpenumbelayan din is menge tumutuu zutun. Ne zutun mid-ulì sikandin diyà te inged he Entiyukya. ²³Ne hein malù sikandin neuget dutun ne midlaus en maan. Mid-eneb din is menge prubinsya he Perigya wey Gelasya ne midhegetan din is kedtuu te menge sumusundan ni Jesus dutun.

Hein Diyà si Epulus te Ipisu wey Kurintu

²⁴Ne zutun, diyà te Ipisu zuen nekeuma he Hudiyu he tig-Elihendriya he egnezeanan ki Epulus. Metau he edikursu ne metau zaan he edseysey te insurat he Lalag te Megbevayà. ²⁵Duen nekepenurù kandin he zaan te keagi te Nengazen tew he si Jesus ne utew sikandin mezesen he ebpenurù wey hustu is kedseysey zin mehitenged ki Jesus. Asal, iyan pa netuenan din is kebpemewtismu he impenurù dengan ni Juan. ²⁶Ne zutun, layun ebpenurù si Epulus diyà te simbahan te menge Hudiyu, ne kenè din igkelenew is kebpenerù. Ne si Ekilu wey si Priscila, hein nezineg dan is kebpenerù din, miduma zan sikandin diyà te valey zan ne impurung dan kandin ipenurù is menge Lalag te Megbevayà he wazè din pa metueni. ²⁷Ne zutun neisip ni Epulus is edhendiyà te prubinsya he Gerisya. Ne midtevangan sikandin te menge tumutuu ziyà te Ipisu su mibpesuratan dan is menge tumutuu ziyà te Gerisya ne midhangyù dan he zewata zan sikandin. Ne hein nekeuma si Epulus diyà te Gerisya, is langun he nemeketuu ki Jesus pinaagi te gagew te Megbevayà, dekelà he tavang haazà is penurù din kandan. ²⁸Su utew mezesen is menge ketezengan din dutun te insurat he Lalag te Megbevayà he iyan si Jesus sikan is mibpilà te Megbevayà he ibpahadì. Ne pinaagi zutun, diyà te etuvangan te mezakel he menge etew, nezaag din is menge Hudiyu he mibpekidibati kandin.

Hein Diyà si Pablo te Ipisu

19 ¹Dutun te kemulu pa si Epulus diyà te Kurintu, diyà si Pablo mebayà te menge inged he zizaya te Ipisu ne midhendiyè en maan te Ipisu. Ne neuma zin dutun is menge sumusundan daan ni Jesus. ²Ne mid-insaan din sikandan te, “Hein neketuu kew ki Jesus mid-ulinan kew ve te Wagas he Mulin-ulin?” Ne midtavak dan te, “Wazà. Sikan dey pa

mezineg he zuen Wagas he Mulin-ulin.” ³Ne ke si Pablo te, “Hengkey he penurù is midsunud niw zutun te kebewtismuwi keniyu?” Ne ke sikandan te, “Iyan kes impenurù dengan ni Juan Megbebewtismu.” ⁴Ne ke si Pablo maan te, “Sikan is kebewtismu he impenurù ni Juan, ne tuus dà te ked-iniyugi te mezaat he ulaula, asal impenurù daan ni Juan te menge tig-Israyil he kinahanglan daan he medtuu zan te ed-ilis kandin he iyan si Jesus.” ⁵Ne hein nezineg dan haazà is lalag ni Pablo, mibpembewtismu sikandan wey metueni he zuen dan upakat te Nengazen tew he si Jesus. ⁶Ne zutun mibpendepenetan ni Pablo te velad din is menge purù dan, ne mid-ulinan sikandan te Wagas he Mulin-ulin ne netekewtekew zan mekekagi te menge kinegiyen he kenè dan egkesavut. Ne midtudtul zan is impesavut kandan te Megbevayà. ⁷Menge sepulù dan wey zezuwa he menge maama.

⁸Ne kada Sebadu taman te tetelu he vulan mibpekiduma si Pablo te menge Hudiyu zutun te kedsimba zan, ne wazè din ikelenew is kebpenurù din kandan. Mezakel is menge ketezengan he imbegey zin kandan wey zan meketuu te penurù din mehitenged te kedhadì te Megbevayà. ⁹Ne is duma, mezesen is gehinawa zan ne wazè dan medtuu. Ute w mezaat is menge lalag dan diyà te simbahan he idsumpalit dan te tuluuwen he imbegey te Nengazen tew. Ne tenged dutun, mid-awà si Pablo zutun ne miduma zin is nengehimu en he sumusundan ni Jesus. Ne kada andew edtigumen sikandan ni Pablo ziyà te valey ni Tiranu he nehimu he tulunghaan wey zan meistudyuwi is Lalag te Megbevayà. ¹⁰Ne seled te zezuwa he tuig iyan haazà mid-ulaula zan, ne insangyew is Lalag te Nengazen diyà te langun he menge Hudiyu wey se kenà Hudiyu he menge meginged dutun te prubinsya he Asya.

Is Menge Anak ni Isiva he Midtebek te Mezaat he Mulin-ulin

¹¹Ne utew zekelà is menge egkengein-inuwan he mibeelan te Megbevayà pinaagi ki Pablo. ¹²Su minsan penuwilu zà wey ke tualya he negamit din, ed-uwiten dan diyà te menge egkengezeruwan wey edlelungen te mezaat he mulin-ulin ne egkengeulian sikandan. ¹³Ne zuen menge Hudiyu he ebpenhipanew su ebewian dan is menge etew he edlelungen te mezaat he mulin-ulin. Ne neisip dan is egezaman dan ebewii is edlelungen te mezaat he mulin-ulin he egemiten dan is ngazan ni Jesus. Ne migkegiyan dan is mezaat he mulin-ulin te, “Pinaagi te gehem te ngazan ni Jesus he idsangyew ni Pablo, ewai nu en heeyan he etew.” ¹⁴Is mid-ulaula kayi, iyan is pitu he menge anak te lavew he memumuhat he Hudiyu he egngезanan ki Isiva. ¹⁵Ne zutun midtavak haazà is mezaat he mulin-ulin te, “Egkekilala ku si Jesus ne netuanan ku zaan is etew he egngезanan ki Pablo, iyan sikiyu, hentei kew vuwa?” ¹⁶Ne haazà is etew he edlelungen te mezaat he mulin-ulin, mid-

urembakan din sikandan ne mibugel zin ne mibpemindas din is menge bisti zan. Ne tenged dutun, nengehandek dan ne nekepelaguy zan dutun te valey he nengelevasan wey nengepelian. ¹⁷Ne is langun he menge etew he tig-Ipisu, menge Hudiyu wey se kenà Hudiyu, nezineg dan haazà is tudtul mehitenged dutun ne nengehandek dan ne mid-iseg is kedtahu dan te ngazan te Nengazen tew he si Jesus. ¹⁸Ne mezakel is sikan pa memeketuu zutun he mibpenudtul zan diyà te etuvangan te langun is memezaat he menge ulaula zan he ed-iniyugan dan. ¹⁹Ne sikan is ebaal te kinaagman, mid-uwit dan is menge libru zan te kebaal te kinaagman ne mibinsulan dan dutun te etuvangan te langun. Ne migkuwinta zan is bali zutun te menge libru. Ne menge kelimahan he libu he elad he selapi is bali zutun. ²⁰Ne iring dutun he paagi mid-iseg wey nekeeneb is gehem te Lalag te Nengazen diyà te menge etew zutun he inged.

Is Samuk Diyà te Ipisu

²¹Ne zutun, neisip ni Pablo is edhipanew he ziyà ebayà te menge prubinsya he Mesidunya wey Gerisya pehendiyà te Hiruselim. Ke sikandin te, “Emun ebpekehendiyà a te Hiruselim, ebpekelaus e pa ziyà te inged he Ruma.” ²²Ne zutun, impehuna zin diyà te Mesidunya is dezuwa he timbang din te ebaal te ebpeveelan te Megbevayà he si Timoteo wey si Irastu. Asal mibpetagak dè pa sikandin diyà te prubinsya he Asya.

²³Ne zutun, nehitaavù is dekelà he samuk diyà te Ipisu tenged te tuluuwen he imbegey te Nengazen tew. ²⁴Duen dutun etew he pandey he egngezanan ki Dimitriyu. Ne zekelà is genansya te menge sinuhulen din te kebpemaal te menge zeisek he pemuhatà he pelata he idtahud te ziwata zan he si Diana. ²⁵Ne haazà si Dimitriyu, midtigum din haazà is menge sinuhulen din wey is menge iring dan he pandey ne ke sikandin te, “Menge suled, netuenan niw he mid-uswag kiw en kayi te kebpandey tew. ²⁶Siguradu neehè niw wey nezineg niw en is ebeelan kayi te etew he egngezanan ki Pablo. Egkegiyen din he is menge ziwata he ebeelan te etew, kenà hustu he ed-ezapen. Mezakel is menge etew he nemeketuu te egkegiyen din ne kenà dini zà te inged tew he Ipisu, kekenà, te tivuuk he prubinsya tew he Asya. ²⁷Ne tenged kayi kela ke meepesi te menge etew heini is menge vaal tew. Ne kenà duen dà taman su is lavew he ziwata tew he si Diana, kela ke meisip te menge etew he wazà pulus kayi te simbahan din wey egkeawà daan is kegkevantug din. Ne iyan sikandin edsimbahan te langun he menge etew kayi te Asya wey te minsan hentei te tivuuk he kelibutan.”

²⁸Ne zutun hein nezineg haazà te mezakel he nengetigum dutun he menge etew, utew zan nengepauk engki Pablo ne mibpemememengsag dan te, “Lavew si Diana, is edsimbahan tew te menge tig-Ipisu!” ²⁹Ne zutun

nekeeneb is samuk te tivuuk he inged. Ne haazà is dezuwa he zuma ni Pablo, si Gayu wey si Eristarku he menge tigMesidunya, midakep sikandan te menge etew ne migègaanan dan uwita ziyà te tigumanan te menge etew. ³⁰Ne si Pablo, edseled daan pezem dutun, iyan, wazà sikandin tuguti te menge zuma zin he sumusundan. ³¹Ne zuen daan menge emigu zin he upisyal te prubinsya he Asya. Duen midsugù dan diyà te kandin su wey zan sikandin mehengyui he kenà sikandin medseled dutun te tigumanan. ³²Ne is menge etew zutun te tigumanan, utew midekelà is kedsinamuk dan. Ebpeked-iilis-ilis dà is ebpememensag he kenà ebpeked-iiring is ibensag dan. Deisey zà he menge etew is netau zutun te hitavù he ingketigum dan. ³³Kunaan te zuma ke iyan si Alejandro nekesalà su maan is impeetuvang sikandin te menge Hudiyu. Ne si Alejandro, imbayew zin is belad din he tuus te zuen egkegiyen din he ketezengan dutun te menge etew. ³⁴Iyan, hein netuenan dan he Hudiyu sikandin, mibpememensag dan med-uman te, “Lavew si Diana he edsimbahan tew te tig-Ipisu.” Ne seled te zezuwa he uras is kepememensag dan dutun.

³⁵Ne hein neuget en, is sikritaryu zutun te inged dan, ingkepeengked din haazà is kedsinamuk te menge etew. Ke sikandin te, “Menge zuma ku he tig-Ipisu, netuenan en te minsan hentei he sikitew is menge tig-Ipisu, insarig kenitew is simbahan te lavew he ziwata he si Diana wey is edselilayen he watu he neulug he ebpuun te langit. ³⁶Wazà ebpekekagi he kenà tutuu heini. Umba kinahanglan he maawà is keinit te gehinawa niw ne engked kew is edsinamuk. ³⁷Mid-uwit niw zini heini is menge etew he wazè dan mekepenakew ziyà te menge simbahan tew wey wazè dan daan sumpelita is diwata tew. ³⁸Ne emun duen idsumbung eni Dimitriyu, duen andew he netail para te kebpenhusey, ne zuen daan menge etew he netail he menhuhukum. Kinahanglan he zutun dan isumbung. ³⁹Ne ke zuen pa id-insè niw kinahanglan he zutun kew med-insà te netail he kegketigum te menge etew. ⁴⁰Su kela ke iinsà kenitew ke maan is midsinamuk kiw kayi te neulaula guntaan. Ne wazè tew ketezengan ke maan is neulaula tew heini.” ⁴¹Ne hein nekagi zin haazà impeulì din is menge etew.

Is Kedhendiyà ni Pablo te Mesidunya wey Gerisya

20 ¹Ne si Pablo, hein mid-engked is menge etew he edsinamuk, midtigum din is menge sumusundan. Midweliyan din sikandan su wey meheget is kedtuu zan ne impesavut din he edhipanew en sikandin. Ne migenat ne midlikù diyà te prubinsya he Mesidunya. ²Ne mid-eneb din is menge inged dutun ne mibpurungan din weliyi is menge tumutuu zutun te kedhegeta zin te kedtuu zan. Ne zutun midlaus diyà te Gerisya. ³Ne zutun sikandin med-ubpà taman te tetelu he vulan. Ne zutun neisip din he ed-untud te barku su edhendiyà te Sirya, ne neisip

daan dutun te minge Hudiyu he edeopen dan sikandin dutun te kegenat din, umba, nahalin is gehinawa zin su neisip din maan he edlikù diyà te imbayè din pehendiyà te Mesidunya. ⁴Ne zuen tigBiriya, si Supatir he anak ni Piru he nekezuma kandin. Elin daan miduma si Eristarku wey si Sigundu he minge tigTiselunika, si Gayu he tigDirbi, wey si Timoteo, si Tikiku wey si Trupimu he minge tig-Asya. ⁵Midhuna heini is minge zuma zey ne sikami ki Pablo, midtegezan key zan diyà te inged he Truwas. ⁶Mid-untud key te barku ziyà te inged he Pilipus hein neiwas is Pista te Kegkaan te Supas he Wazè Din Tapey. Ne nekelima zutun nesaut dey sikandan diyà te Truwas ne zutun key med-ubpà taman te sengesimana.

Is Huziyan he Kedhendiyà ni Pablo te Truwas

⁷Ne hein midsanlep en is andew zutun te andew he Sebadu midtigum key su wey zey metuman kes Wagas he Idlavung. Ne si Pablo, midweliyan din is minge etew ne taman te metaneb en is kezukileman te kedwali zin su zutun te egkepawà egenat sikandin. ⁸Mezakel is sulù dutun te rugu he ziyà te zivavew he iyan netiguman dey. ⁹Ne zuen kenakan he si Yutiku he ziyà ebpimpinuu te sulawà dutun te iketelu he endanas. Ne geina te melugayad is kedwali ni Pablo, ne utew nekelipezeng. Hein neuget wazè din en maantus is kebpekelipezeng din ne neulug diyà te tanà. Ne hein mibitbit dan, minatey en. ¹⁰Ne mibeyaan ni Pablo ne midlengkevan din ne migkepkepan din. “Kenè kew meseeng,” ke si Pablo, “su neuyag en.” ¹¹Ne mibpemenahik maan si Pablo ne migkuwa te egkeenen ne migkaan. Ne neuget pa is kebpekidlalag din kandan, ne hein nepawà migenat. ¹²Ne in-uli dan haazà is kenakan he neuyag ne nengelipey zan utew.

Is Kedhendiyà eni Pablo te Militu

¹³Ne nekeuntud key te barku ne midhendiyè key te inged he Asun. Intelaan kenami ni Pablo he ebpetuluy sikandin dutun te inged he Asun su ebpemeyvey mulà sikandin. ¹⁴Ne neuma zey sikandin diyà te Asun ne impeuntud dey ne zutun midlaus key pa ziyà te inged he Mitilini. ^{15,16}Ne neisip ni Pablo is edlevayan dey is inged he Ipisu su wey key kenà neuget diyà te prubinsya he Asya. Egkezegusu si Pablo su egkesuatan din he mekeuma sikandin diyà te inged he Hiruselim te kenà pa andew he Pintikusti. Ne mid-awè key zutun te Mitilini ne sengekezukileman pa zutun midsegazan dey is inged he Kiyu, ne sengekezukileman pa zutun midsegazan dey is inged he Samu. Ne sengekezukileman pa ne neketuluy key ziyà te inged he Militu.

Is Kebpeneltelaan ni Pablo Ziyà te Menge Tumutuu he Tig-Ipisu

¹⁷Ne mibpesuratan ni Pablo is minge ebmegurangan te minge tumutuu ziyà te inged he Ipisu, ne migkagi zin he ebpetelavuk sikandin diyà te

Militu. ¹⁸Ne hein nekeuma zan, migkegiyan din te, “Netuenan niw en he mibpurungan ku is menge ulaula ku kayi te keniyu puun pa zutun te nehuna he andew te kedseled ku kayi te prubinsya he Asya. ¹⁹Midtuman ku is ebpeveelan kedì te Megbevayà ne wazà a mebpelavew. Mibpenigis is menge luhè ku tenged te mahal kew zini te gehinawa ku. Mezakel is kemeregenan wey kemeresayan he neulaula ku tenged te menge pesipala he mibeelan kediey te menge iring ku he Hudiyu. ²⁰Netuenan niw zaan he mibpurungan ku sikiyu penurua ziyà te menge ketiguman wey minsan diyà daan te menge valey niw. Dutun te kebpenurua wey kebpesevuta ku keniyu te Lalag te Megbevayà, in-amin ku keniyu ipenurù is minsan hengkey he ibmeupiya te kedtuu niw. ²¹Hudiyu se kenà Hudiyu, ne wazè ku impelavi su pudu ku midweliyi he kinahanglan he edtumanen dan is ebpeveelan kandan te Megbevayà he iniyugi zan is menge mezaat he ulaula zan ne medtuu zan te Nengazen tew he si Jesus. ²²Ne guntaan, geina te edtumanen ku is sugù kedì te Wagas he Mulin-ulin, edhendiyà a te Hiruselim. Ne kenè ku egketuenan ke hengkey is egkeulaula ku zutun. ²³Iyan dà egketuenan ku is: diyà te kada inged he imbayè dey ne impezayag kedì te Wagas he Mulin-ulin he egkepirisu ad ne mezakel pa he kemeregenan is egkesegazan ku. ²⁴Iyan, kenè ku en egkenugunan heini is untung ku zini te kelibutan su wey ku mepasad is ebpeveelan kedì te Nengazen tew he si Jesus he iyan is kedsengyawa te Meupiya he Tutdulanen te gagew kenitew te Megbevayà.

²⁵Midtukid ku sikiyu weliyi te kedhadì te Megbevayà Ne guntaan netuenan ku en he kenà ad maan keniyu egkeahà. ²⁶Ne egkegiyan ku keniyu he ke zuen minsan sevaha keniyu he kenà egkelibri te silut te Megbevayà, wazè ku salà kandin ²⁷su in-amin ku keniyu ipenurù is minsan hengkey he egkesuatan te Megbevayà. ²⁸Bentayi niw is ulaula niw wey ventayi niw zaan is langun he tumutuu he insarig keniyu te Wagas he Mulin-ulin; kinahanglan he iyan kew edlig-en te kedtuu te menge tumutuu te Megbevayà. Nehimu kiw zin he sakup pinaagi te kebpehimatey te anak din. ²⁹Netuenan ku he emun ed-ewaan ku sikiyu, duen edlepew kayi te keniyu he menge menunudlù he is ibpenurù dan, ne ebpekezezaat te upakat ne edèdeetan dan iyan is upakat niw te menge tumutuu. ³⁰Ne egkeulaula keuzemà he ebpengagi te tarù is minsan menge zuma niw su wey zan meuwit is menge tumutuu su wey mekesundan kandan. ³¹Ne tenged kayi mebbekevantey kew; kenè niw lipati he seled te tetelu he tuig, andew se mezukilem, mid-em-eminan ku sikiyu te penurù. Mibpenigis is menge luhè ku tenged te hizu ku keniyu.

³²Ne guntaan idsarig ku sikiyu ziyà te Megbevayà he iyan ebpeketavang keniyu. Ebpeketavang daan is impenurù ku keniyu he gagew zin kenitew. Is Megbevayà, iyan ebpekevegey kenitew te kezesen te kedtuu. Diyà te kandin egkekuwa ta zaan is kenita he vahin te menge

tuvad he ibegey zin diyà te langun he minge tumutuu zin. ³³Is selapi wey minsan manggad te minsan hentei keniyu, kenà iyan tuyù ku. ³⁴Netuenan niw he mibpenigudu a medterebahu wey ku mekuwa is minge kinahanglan dey te minge zuma ku. ³⁵Ne pinaagi kayi te langun, impeehè ku keniyu he kinahanglan he pinaagi te kebpenigudu tew egketevangen tew is egkengeayuayu su egketenuzan tew is minge lalag dengan te Nengazen tew he si Jesus su ke sikandin te, ‘Dekelà is kelipey ta ke ebegey ki, kenà ke iyan ki edawat.’ ”

³⁶Ne hein nekepasad si Pablo is egkagi zutun, midluhud sikandin ne mibpengumew-umew zin is Megbevayà. ³⁷Ne mibpenigis is luhè dan te minge tumutuu ne migkepkepan dan si Pablo ne midhezekan dan. ³⁸Uteu zan ingkeseeng is lalag din he kenè dan en maan sikandin egkeahà. Ne zutun midumahan dan diyà te barku.

Is Kedhendiyà ni Pablo te Hiruselim

21 ¹Ne zutun hein nekepemazè key en kandan, mid-untud key en maan te barku ne migenat key. Ne midtandang key ziyà te ebeyaan dey ne nekeuma key ziyà te pulu he Kus. Ne zutun te mid-ilis he andew nekeuma key ziyà te pulu he egngезanan te Rudas. Mid-awè key zutun ne nekezunggù key ziyà te inged he Petara. ²Ne ziyè dey meuma is barku he edhendiyà te Pinisya ziyà te prubinsya he Sirya ne nekeuntud key zutun ne migenat key en maan. ³Nekeuvey key ziyà te pulu he Sipru, iyan, midsegazan dey ziyà te egkegivanг dey. Ne midlaus key ziyà te Sirya. Nekezunggù key ziyà te inged he Tiru su zutun idhaw-as is minge karga te barku. ⁴Neturedu zey zutun is minge tumutuu ne midhulavung key ziyà te kandan taman te sengesimana. Ne geina te zuen impezayag kandan te Wagas he Mulin-ulin midleguyan dan si Pablo he kenà ibpelaus diyà te Hiruselim. ⁵Iyan, hein neume en is kegenat dey, mid-awè key zutun te inged. Ne nemenduma kenami is langun he minge tumutuu, maama se vahi wey minge anak dan. Ne midluhud key zutun te veyvey te zagat is ed-ampù. ⁶Ne zutun mibpepempemezeey key ne mid-untud key en maan te barku ne sikandan mulà, midlikù dan diyà te inged.

⁷Ne mid-ewaan dey is inged he Tiru ne midlaus key ne nekezunggù key ziyà te inged he Tulimeyda. Mibpenumbelayan dey is minge tumutuu ne midhulavung key ziyà te kandan. ⁸Ne hein nepawà, migenat key en maan ne nekezunggù key ziyà te Sisarya. Ne ziyè key medhulavung te valey ni Felipe, sikan is ebpesavut te Meupiya he Tudtulanen. Iyan sikandin sevaha zutun te pitu he maama he nepilì dengan diyà te Hiruselim he timbang te minge epustul. ⁹Duen heepat he minge anak din he raga he ebpeneuven te Megbevayà. ¹⁰Hein nepipira en he andew is kedhulavung dey zutun, nekeuma si Egebu is sevaha he maama he ebpeneuven te Megbevayà he ebpuun diyà te Hudiya. ¹¹Mid-uvey ziyà te kenami ne

migkuwa zin is bakes ni Pablo ne imbakus din te kandin he menge paa wey menge velad din ne ke sikandin te, “Ibpesavut kenitew te Wagas he Mulin-ulin he is tegigaked kayi te vakes, iring kayi is kebekusa kandin te menge Hudiyu ziyà te Hiruselim ne ibpalad dan sikandin diyà te kenà menge Hudiyu.” ¹²Ne hein nezineg dey haazà, sikami wey is menge tumutuu zutun, midhengyuan dey si Pablo he kenà medhendiyà te Hiruselim. ¹³Iyan, midtavak si Pablo te, “Maan is edhimuwen niw he utew a meseeng pinaagi te kedsinegew niw? Su emun intugut en te Nengazen tew he si Jesus he iyan heeyan egkehitevù kedì, andam ad, kenà te kebpepirisu zà, kekenà, minsan te kebpehimatey ziyà te Hiruselim.” ¹⁴Ne hein netuenan dey en he kenà egkeegut si Pablo, mid-engkezan dey te edhangyù ne migkagi key te, “Berakat he iyan metuman is egkesuatan te Nengazen.”

¹⁵Ne hein malù en neuget is ked-ubpè dey zutun, mibpenines key ne migenat key is edhendiyà te Hiruselim. ¹⁶Ne zuen menge tumutuu he tigSisarya he miduma kenami ziyà te Hiruselim. Inhated key zan diyà te valey he ebpemenehikan dey, diyà te valey ni Menasun he tigSipru. Sevaha sikandin dutun te nengehuna he menge sumusundan ni Jesus.

Is Kebpekeuma ni Pablo Ziyà te Hiruselim

¹⁷Ne zutun te kebpekeuma zey ziyà te Hiruselim, midtelavuk kenami he nengegalew is menge tumutuu. ¹⁸Ne nepawà dutun nenumbaley key ki Pablo ziyà te ki Epustul Santiago, ne zutun daan is langun he menge ebmegurangan te menge tumutuu. ¹⁹Ne mibpengemusta kandan si Pablo ne zutun mibpenudtul zin kandan is langun he nengehimu te Megbevayà diyà te menge etew he kenà menge Hudiyu, pinaagi te kedwali zin. ²⁰Ne hein nezineg dan haazà is tudtul ni Pablo, nemekezalig dan te Megbevayà. Ne migkegiyan dan si Pablo te, “Netuenan nu, Suled, he utew zaan mezakel is menge zuma tew he Hudiyu he nemeketuu en ki Jesus, ne mibpurungan dan tumana is imbilinbilin kenitew he kesuguan. ²¹Nezineg dan is tudtul he is menge zuma tew he Hudiyu he ziyà te menge inged te kenà menge Hudiyu, impenurù nu kandan he engkezi zan is kedtumana zan te kesuguan he imbilinbilin dengan ni Moises. Impenurù nu kun kandan he kenè dan sirkunsidara is menge anak dan he maama ne kenè dan en sunuza is menge vetasan tew te menge Hudiyu. ²²Siguradu egkezineg dan he nekeuma ke en. Hengkey is meupiya he edhimuwen? ²³Meupiya ke edtumanen nu is sambag dey. Duen kayi heepat he zuma tew he maama he zuen impenangdù dan diyà te Megbevayà sumalà is betasan tew. ²⁴Duma ka kandan diyà te simbahan he Valey te Megbevayà, ne tampu ka te ed-ul-ulahan kandan sumalà is betasan te kekgelumpiyuwi kandan. Iyan ka vayad te ebpeveyazan kandan ne human dan ebpekepevangul. Emun edtumanen

nu heini, egketuenan te langun he kenà benar is tudtul he nezineg dan mehitenged kenikew, su egkekeleduwan dan he mibentayan nu is imbilinbilin he kesuguan ni Moises. ²⁵Ne is menge kenà Hudiyu mulà he nemeketuu, migkagi zey en dengan kandan pinaagi te surat is menge idsugù dey kandan he kinahanglan he kenè dan megkaan te impemuhat diyà te kenà hustu he megbevayà wey kenè dan daan keena is lengesa wey is edlepaan he kenà ebpekelelengesa. Ne kinahanglan daan he kenè dan hileveti is kenè dan esawa.” ²⁶Ne hein nepawà dutun miduma ni Pablo haazà is menge maama ne midtampu sikandin dutun te kedtumana zan te vetasan te kebpenlumpiyu. Ne midseled si Pablo ziyà te Valey te Megbevayà wey zin ikepesavut ke pira pa he andew ne human egketapus is kegkelumpiyuwi kandan su emun egketapus haazà ne zuen pemuhat te kada sevaha kandan.

Is Kedekepa ki Pablo Ziyà te Valey te Megbevayà

²⁷Ne hein ikepitu en he andew, duen menge Hudiyu he tig-Asya he nekeahà ki Pablo ziyà te Valey te Megbevayà. Ne mibpetavang dan te utew mezakel he menge etew zutun te simbahan su wey zan mezakep si Pablo. ²⁸Ne mibpememensag dan is egkagi te, “Sikiyu is menge zuma zey he Isreyilihanen, tevangi key! Iyan heini sikan is etew he in-eneb din is penurù din te minsan hendei he inged. Ne supak is impenurù din te tivuuk he kehudiyuwan wey supak daan te kesuguan tew wey kayi te simbahan tew. Ne guntaan impeseled din en kayi te simbahan tew is kenà menge Hudiyu ne neremerikan heini is simbahan he ebulusan te Megbevayà.” ²⁹(Umba migkagi zan heini su neehè dan si Trupimu he zuma ni Pablo zutun te inged. Ne si Trupimu, tig-Ipisu he kenà Hudiyu, ne kunaan dan ke miduma ni Pablo he impeseled dutun te simbahan.) ³⁰Ne ingkepauk haazà te langun he meginged dutun te Hiruselim ne nengevurun dan ne migewezan dan si Pablo, ne miguyud dan sikandin pehendiyà te gawas dutun te simbahan ne midlekevan dan haazà is simbahan. ³¹Edhimetayan dan pezem sikandin, iyan, duen neketudtul te kepitán te menge sundaru he menge Rumanu he edsinamuk is tivuuk he meginged te Hiruselim. ³²Ne is kepitán duma is menge sundaru, migaanggaan dan is edhendutun te nengevurun he menge etew. Ne hein naahà te menge etew haazà is kepitán wey menge sundaru, mid-engkezan dan te ebpemugel si Pablo. ³³Ne haazà is kepitán, mibeyaan din si Pablo ne midakep din ne insugù din he hiketi sikandin te zezuwa he kedina. Ne zutun in-insè din te menge etew ke hentei haazà is etew ne hengkey is salè din. ³⁴Ne mibpememensag he edtavak is menge etew asal selakew is tavak te kada sevaha. Ne geina te utew megurub ne kenà egkekeleduwan dutun te kepitán ke hengkey is hustu he neulaula, ne tenged dutun insugù din te menge sundaru he uwita zan si Pablo ziyà te

kutà. ³⁵Hein nekeuma zan diyà te hegezan dutun te kutà mibitbit dan si Pablo tenged te utew ed-iseg is kedsinamuk te minge etew. Ne ed-egawen pezem si Pablo zutun te minge etew ³⁶ne ebpememensag dan is egkagi te, “Edhimetayan tew!”

Is Ketezengan ni Pablo Ziyà te Minge Etew

³⁷Ne zutun te edseled dan en te kutà, migkagi si Pablo ziyà te kepitan ke sikandin te, “Egkehimu ve ke zuen lalag ku kenikew?” Ne migkagi haazà is kepitan te, “Metau ke ves te kinegiyan he Gerisyahanen? ³⁸Kenè ke ve iyan kes tig-Ihptu he malù en neuget guntaan he midsukul te gubirnu ne mibpengulu te heepat he libu he minge tulisan diyà te tanà he kenà ed-ubpaan te etew?” ³⁹Ne midtavak si Pablo te, “Hudiyu a he sakup te zekelà he inged diyà te prubinsya he Silisya su ziyà a ianak te Tarsu. Edhengyuen ku kenikew he tuguti a he melelagi ku is minge etew.” ⁴⁰Ne midtugutan din, ne si Pablo, midhitindeg dutun te hegezan, ne imbayew zin is belad din *he tuus te zuen egkegiyen din dutun te minge etew*, ne hein mid-engked is kegurub dan, migkagi si Pablo te kinegiyan he Hibriyuhanen.

22 ¹Ke sikandin te, “Minge suled wey minge ginikanan, peminega niw is ibpesavut ku keniyu he minge ketezengan ku.” ²Ne hein nezineg dan he Hinibriyuhanen is kegkagi zin, ne mibpurung dan mebpemineg.

Ne ke si Pablo te, ³“Hudiyu e man; diyà a ianak te prubinsya he Silisya, diyà te inged he Tarsu asal kayi a medekelà te Hiruselim su mibpenurù a ni Gemelil. Impenurù kediey is kebpurungi kedtumana te kesuguan he nesunud te gin-epuan tew. Utew meheget dutun is kedtumana ku te kunaan ku he ibpetuman kedì te Megbevayà su iring a keniyu guntaan. ⁴Ne tenged dutun, mibpesipelahan ku is minge tumutuu ki Jesus ne mibpenhimetayan ku. Mibpendakep ku is minge maama wey minge vahi ne mibpirisu ku. ⁵Is lavew he memumuhat wey is langun he ebmegurangan tew, ebpeketistigus dan he tutuu heini is egkegiyen ku keniyu su mibegayan e zan te minge surat he impeuwit dan kedì diyà te minge zuma zan he Hudiyu ziyà te inged he Demasku. Umba edhendiyà a su wey ku mezakep dutun is minge tumutuu ki Jesus su ed-uwiten ku sikandan dini te Hiruselim wey mesiluti sikandan. ⁶Ne zutun te uvey e en diyà te Demasku, neudtu is andew ne netekewtekw a enlagi te utew merayag he ebpuun te langit. ⁷Ne nepiley a ne zutun nezineg ku is egkagi te, ‘He Seulu, maan is ebpesipelahan a kenikew?’ ⁸Ne mid-insà a te, ‘Hentei ka?’ Ne ke sikandin te, ‘Iyan a sikan is ebpesipelahan nu he si Jesus he tigNeserit.’ ⁹Ne is minge zuma ku, neehè dan haazà is merayag, iyan, wazè dan mesavut haazà is egkegiyen diyà te kediey. ¹⁰Ne nekeinsà a te, ‘Nengazen, hengkey is ebpevelan nu kediey?’ Ne migkagi kedì is

Nengazen te, 'Enew ka ne laus ke en diyà te Demasku ne zutun ibpesavut kenikew is langun he intuvad en kenikew te Megbevayà he ebpeveelan kenikew.' ¹¹Ne nelakap a tenged dutun te midsirang kedì he utew merayag, umba mid-agak e zà te menge zuma ku pehendiyà te Demasku.

¹²Ne zuen dutun etew he egngезanan ki Eneniyas; metinumanen sikandin te kesuguan tew, wey telehuzen te langun he menge Hudiyu he tigDemasku. ¹³Mibeyaan e zin ne mid-uvayan e zin ne ke sikandin te, 'Sikew is suled ku he Seulu, berakat he mekeehè ke en maan.' Ne segugunà mibmerayag is ked-ehè ku ne midtengtangan ku sikandin. ¹⁴Ne ke sikandin te, 'Is Megbevayà te menge apù tew, mibpilì ke zin su wey nu maahà is suluguen din he metazeng wey nu zaan mezineg is egkegiyen kayi kenikew wey nu zaan metueni is egkesuatan din. ¹⁵Su ibpesangyew zin kenikew is tudtul te keagi zin ne ibpesavut nu ziyà te langun he menge etew is impezineg din wey impeehè din kenikew. ¹⁶Ne kenè ka medlanganlangan, kuwa ke en wey ka mebewtismuwi. Pengumew-umew ka te Nengazen wey ka mepesaylu te menge salè nu.'

¹⁷Ne mid-uli a zini te inged he Hiruselim ne zutun te ked-ampù ku ziyà te simbahan he Valey te Megbevayà, duen mibpaahà kediey. ¹⁸Neehè ku is Nengazen he si Jesus ne ke sikandin te, 'Gaanggaan ka genat ne awè ka kayi te Hiruselim su is menge etew kayi, kenè dan edewaten is ibpesavut nu kandan mehitenged kediey.' ¹⁹Ne midtavak ku is Nengazen, ke siak te, 'Iyan, netuenan dan en he mibeyaan ku is menge tumutuu kenikew ziyà te menge simbahan ne mibpendakep ku wey mibpemugel ku zaan sikandan. ²⁰Ne hein midhimetayan si Esteban, is sevaha he etew he wazè din menuguni is untung din dini te kelibutan tenged kenikew, dutun a su mid-uyun a zaan dutun te kedhimetayi kandin. Iyan a impevantey te menge kumbalà te midhimatey kandin.' ²¹Ne migkagi en maan is Nengazen te, 'Genat ke en su edsuguen ku sikew ziyà te meziyù wey nu ikepesavut is lalag ku ziyà te kenà menge Hudiyu.' "

Si Pablo wey Sikan is Kepitan te Menge Sundaru

²²Ne te nekagi haazà ni Pablo wazè en mebpemineg haazà is menge etew. Mibpememensag dan te, "Himetayi en su zait he edhimetayan!" ²³Ebpememensag he pesivayew zan te menge kumbalè dan wey edsimburè dan te menge tanà diyà te zivavew. ²⁴Ne haazà is kepitan te menge sundaru he Rumanu, wazè din mesavut ke hengkey is egkegiyen dan ne zutun insugù din te menge sundaru he uwita zan si Pablo zutun te kutà ne vugela zan su wey zin iketug-an ke hengkey is ingkepeuki kandin te menge Hudiyu su maan is ebpememensag dan te iring dutun. ²⁵Ne hein midhiketani dan si Pablo su ebugelen dan en, migkegiyan ni Pablo is serhintu he zutun, ke sikandin te, "Idtugut be te velaud he vugela a keniyu is sakup te inged he Ruma te wazè e pa imbistigaha?"

²⁶Ne hein nezineg haazà dutun te serhintu, mibeyaan din is kepitan, ke sikandin te, “Maan is ibpevugel nu kenami is etew he sakup te Ruma?”
²⁷Ne midhendutun te ki Pablo haazà is kepitan ne ke sikandin te, “Sakup ke ve te inged he Ruma?” Ne ke si Pablo te, “Uya.”
²⁸Ne migkagi en maan haazà is kepitan te, “Uteu zekelà is selapì he ingkevegey ku wey a mehimu he sakup te Ruma.” Ne ke si Pablo te, “Siak mulà, puun pa te ked-enaka kedì ne sakup ad te Ruma.”
²⁹Ne segugunà, nemekeendud haazà is menge etew he ebugel pezem kandin ne nahandek daan haazà is kepitan geina te sakup bes te inged he Ruma si Pablo ne maan is nepuasan din.

Is Ked-etuvang ni Pablo te Menge Punuan

³⁰Ne hein nepawà impawà dutun te kepitan si Pablo. Egkesuatan din he metueni zin ke hengkey is insumbunga ki Pablo te menge Hudiuyu, umba midtigum din is menge punuan he memumuhat wey is langun he menge ebmegurangen. Ne migkuwa zin si Pablo ne impeetuvang din.

23 ¹Ne si Pablo, midtengtangan din haazà is nengetigum he menge ebmegurangen ne ke sikandin te, “Menge suled, wazà buring te zengeg ku ziyà te etuvangan te Megbevayà taman en guntaan!”
²Ne zutun, si Eneniyas sikan is lavew he memumuhat, migkegiyan din is menge etew zutun te uvey ni Pablo he tebpia zan is bèbè din wey mesiluti sikandin.
³Ne migkegiyan sikandin ni Pablo te, “Sikew is tarù is ked-azap din te Megbevayà, siguradu Megbevayà is edsilut kenikew. Su sumalà is ibpenurù te kesuguan tew, ebpimpinuu ka keniyas is edsusi kediey, iyan, edsupaken nu is kesuguan su insugù nu he tebpie e zan.”
⁴Ne zutun migkagi is menge etew he uvey ni Pablo te, “Maan is ed-insultuwan nu is lavew he memumuhat he mibpili te Megbevayà?”
⁵Ne midtavak si Pablo te, “Wazà a mesayud he iyan sikandin lavew he memumuhat. Su netuenan ku is migkagi te insurat he Lalag te Megbevayà he, ‘Kenè niw insultuwi is edumala keniyu.’”

⁶Ne naahà ni Pablo he menge Sedusiyu is duma zutun te nengetigum he menge ebmegurangen, ne is duma, ne menge Perisiyu. Ne tenged dutun, mibpekezaging is egkagi te, “Menge suled, Perisiyu a ne Perisiyu zaan is ginikanan ku. Iyan ketezengan ke maan is mid-uwit e zan dini te keniyu guntaan is: edtuu a he keuzemà ebhawan te Megbevayà is menge minatey.”
⁷Ne zutun te nekagi zin haazà, ne is menge Sedusiyu wey Perisiyu, nekedsumpakì dan ne nevahinbahin is langun te sikandan.
⁸Umba nekedsumpakì dan su is menge Sedusiyu, ibpenurù dan he kenà egkevanhew is menge minatey. Egkegiyen dan he wazà menge mulin-ulin ne wazà daan menge velinsuguen he ebpuun diyà te langit. Ne is menge Perisiyu, edtuu zan mulà he zuen kegkevanhew wey menge mulin-ulin wey velinsuguen te Megbevayà.
⁹Umba, mid-iseg dan mebmegurub dutun

is ebpevenbensagey. Ne zutun midhitindeg is menge Perisiyu he menge menunudlù te kesuguan ne ke sikandan te, “Wazà mezaat he netuenan dey he mibeelan kayi te etew. Kela ke tutuu iyan he zuen mulin-ulin wey ke velinsuguen be te Megbevayà he mibpekidlalag kandin.”

¹⁰Ne mid-iseg dutun is kegkesumpakì dan ne tenged dutun insugù te kepitan diyà te menge sundaru zin he egawa zan si Pablo zutun te menge etew wey iulì diyà te kutà. Su nahandek sikandin su kela ke pitaspitasa zan si Pablo.

¹¹Ne zutun te kebmezukilem din, mibpaahà ki Pablo is Nengazen tew he si Jesus ne migkagi te, “Sarig ke zà su iring te impenudtul nu is kedtuu nu kedì dini te Hiruselim, kinahanglan daan he ibpenudtul nu ziyà te inged he Ruma.”

Is Bitiyara Mehitenged te Kedhimetayi ki Pablo

¹²Ne hein nepawà midtigum is menge Hudiyu su zuen pezem ed-ul-olahan dan ki Pablo. Ke sikandan te, “Kenè kiw egkaan wey ed-inum taman te kenè tew pa egkepatay si Pablo.” ¹³Ne subra te kepatan he etew haazà is menge Hudiyu he mid-uuyun-uuyun he edhimatey ki Pablo. ¹⁴Ne zutun midhendiyè dan te menge punuan he menge memumuhat wey te menge ebmegurangan ne ke sikandan te, “Uteu neheget is uyun dey he kenè key egkaan wey ed-inum taman te kenè dey pa egkepatay si Pablo. ¹⁵Ne sikiyu wey is tivuuk he menge ebmegurangan, pesurati niw is kepitan te menge sundaru he Rumanu. Ne kegiya niw zutun he uwita zin si Pablo zini su wey niw mepurung meimbistiga te mid-ulaula zin. Ne sikami, andam key su edhimetayan dey te kenè pa ebpekeuma zini.”

¹⁶Is anak te etevey ni Pablo, nekezineg dutun te ed-ul-olahan dan ne midhendiyà te kutà ne midtudtulan din si Pablo. ¹⁷Ne si Pablo, mid-umew zin is sundaru ne ke sikandin te, “Dumaha nu heini is kenakan diyà te kepitan su zuen egkegiyen din kandin.” ¹⁸Ne haazà is sundaru, miduma zin haazà is kenakan diyà te kepitan ne ke sikandin te, “Kes pirisu he si Pablo, mid-umew e zin ne migkagi zin kedì he ibpezuma zin kedì heini is kenakan dini te kenikew su zuen egkegiyen din kenikew.” ¹⁹Ne zutun, is kepitan, mid-agak din haazà is kenakan dutun te uvey zà ne hein iyan dan dà, mid-insà te, “Hengkey, Mama, is egkegiyen nu kedì?” ²⁰Ne midtavak haazà is kenakan te, “Is menge Hudiyu, mid-uyun dan he keeselem, edhengyuan ke zan he uwita nu si Pablo ziyà te ketiguman te ebmegurangan su ebpurangan dan kun ed-imbistigaha te mid-ulaula zin. ²¹Iyan, kenè nu itugut su zuen menge kepatan he etew he ed-eles su ed-ayan kandin. Meheget is uyun dan he kenè dan egkaan wey ed-inum taman te kenè dan pa egkepatay si Pablo. Mid-andam dan en ne iyan dà edtegazan dan is sugù nu.” ²²Ne zutun migkagi haazà is kepitan te, “Kenè nu, Mama, tudtula ziyà te minsan hentei he midtudtulan a kenikew.” Ne zutun impeulì din is kenakan.

Is Kedheteza ki Pablo Ziyà te Gubirnedur

²³Ne haazà is kepitan, mid-umew zin is dezuwa he sinerigan din ne ke sikandin te, “Ipaandam niw is dezuwa he gatus he sundaru su edsuguen ku sikiyu ziyà te inged he Sisarya. Ipezuma zaan is kepituwan pa he egkukudà wey is dezuwa pa he gatus he ebevankew. Kinahanglan he ipaandam niw sikandan taman te alas nuwibi kan te mezukilem su iyan kegenat niw. ²⁴Kuwa kew te minge kudà he ebpeuntuzan ki Pablo. Ne purungi niw ventayi sikandin para wazà mehitavù kandin taman te ebpekeuma kew ziyà te ki Gubirnedur Felix.” ²⁵Ne mibeelan dutun te kepitan is surat he ibpeuwit din diyà te gubirnedur.

²⁶Ke sikandin te, “Surat heini ni Claudio Lisyas diyà te ki Gubirnedur Felix. Kumusta ka. ²⁷Heini is etew he ibpeuwit ku ziyan, midakep te minge Hudiyu ne edhimetayan dan pezem. Iyan, nezineg ku he sakup sikandin te inged tew he Ruma, umba miduma ku is minge sundaru ne mibeyaan ku ne miduma ku para kenà mehimetayi. ²⁸Geina te edsusiyen ku ke hengkey is insumbunga zan kandin, mid-uwit ku sikandin diyà te ketiguman te minge ebmegurangan dan. ²⁹Ne zutun netuenan ku he wazè bes mezaat he ulaula zin he zait he igkepirisuwa wey igkepehimetayi kandin. Iyan dà insumbunga kandin is kedsupaka zin te minge vetasan dan dutun te kesuguan dan. ³⁰Ne hein netuenan ku he ed-eyanan sikandin te minge Hudiyu, neisip ku he ibpeuwit diyan. Ne migkegiyan ku is minge midsumbung kandin he ziyan dan ebpekeetuvang te kenikew.”

³¹Ne zutun te nepasad te kepitan haazà is surat din, midtuman te minge sundaru is insugù din kandan su migkuwa zan si Pablo ne migenat dan. Ne te iyan haazà he kezukileman nekeuma zan diyà te inged he Entipatris. ³²Ne zutun te mid-ilis he andew midlikù haazà is ebpemenhipanew he minge sundaru ne iyan dà дума ni Pablo is minge sundaru he ebpemen-untud te kudà. ³³Ne midlaus dan diyà te Sisarya ne imbegey zan sikan is surat diyà te gubirnedur ne impalad dan kandin si Pablo. ³⁴Ne mibasa zin haazà is surat ne in-insè din ki Pablo ke hendei sikandin he prubinsya mesakup. Ne hein midtavak si Pablo te, “Sakup a ziyà te prubinsya he Silisya,” ³⁵migkagi haazà is gubirnedur te, “Wey ku en edsusiya is insumbunga kenikew ke ebpemekeuma is midsumbung.” Ne zutun, impeventayan din te sundaru si Pablo ne ziyè din isavuk te turagan ni Hadì Hirudis.

Is Sumbung Diyà te Gubirnedur Mehitenged ki Pablo

24 ¹Ne nekelima zutun, is lavew he memumuhat, midhendiyà te Sisarya he edumahan te zuma he minge ebmegurangan wey is sevaha he ebugadu he egngезanan ki Tertulu. Mid-etuvang dan ki

Gubirnedur Felix ne midtutul zan is insumbunga zan ki Pablo. ²Ne impetawag din si Pablo ne zutun midhitindeg si Tertulu su ibpesavut din is menge sumbung dan mehitenged ki Pablo.

Ne ke sikandin te, “Minahal he Gubirnedur, tenged te ketau nu te edumala kenami, melugayad en is kelinew zini te prubinsya tew wey mezakel is menge keupianan he egkengehimu zini te kenami. ³Ne utew zey igkelipey heini is langun ne zekelà layun is kebpelesemi zey kenikew. ⁴Ne kenè ku egkesuatan he meyawat ka te egkegiyen ku, iyan, edhengyuan ku sikew he peminaga nu zè pa is ibpesavut dey kenikew. ⁵Iyan is: netuenan dey he heini is etew, utew mesamuk, su is menge vaal zin, ne iyan idsinamuk te menge Hudiyu ziyà te minsan hendei. Ne sevaha zaan sikandin he egalen te menge etew he eggezanan te menge Naserinu. ⁶Ne kenà duen dà taman su edremerikan din pezem is simbahan dey he Valey te Megbevayà, umba midakep dey. Ne edsusiyen dey pezem dutun sikandin sumalà is impenurù kenami te kesuguan dey, ⁷iyang, mibeyaan key te kepitan he si Lisyas ne mibpemugel key zin ne mid-agew zin heini is etew zini te kenami. ⁸Ne migkegiyan key zutun ni Lisyas he sikami is midsumbung ki Pablo, dini key ibpeetuvang te kenikew. Emun edsusiyen nu heini is etew egketuenan nu zaan diyà te kandin he tutuu is langun he idsumbunga zey kandin.” ⁹Ne zutun is menge Hudiyu he zuma ni Tertulu midtistigusan dan is langun he migkagi zin.

Is Ketezengan ni Pablo Zutun te Gubirnedur

¹⁰Ne mid-uyawan dutun te gubirnedur si Pablo he iyan tuus te ibpekagi sikandin. Ne migkagi si Pablo ziyà te kandin te, “Netuenan ku he neuget ke en he edumala kayi te prubinsya tew, umba kenà a egkelenew he ebpezayag te ketezengan ku kayi te etuvangan nu. ¹¹Ne emun edsusiyen nu ne petuluy nu egketueni he sepulù en wey zezuwa he andew guntaan midtekezeg a is edhendiyà te Hiruselim su edsimba a. ¹²Ne wazà a maahà te menge Hudiyu is ebpekidibati ziyà te simbahan he Valey te Megbevayà wey ziyà te menge simbahan te menge Hudiyu. Ne wazè e zan daan maahà is midhimu te menge kesamuk te menge etew ziyà te minsan hendei ziyà te inged. ¹³Ne wazè dan daan igkepaahà he tutuu is insumbunga zan kedì. ¹⁴Iyan, kenè ku igkeeled he egkegiyen ku kenikew he ed-ezapen ku is Megbevayà he ed-ezapen daan dengan te menge kepuun dey. Iyan, heini is tuluuwan he edsunuzen ku, egkegiyen kayi te menge etew he tarù. Ne edsunuzen ku zaan is langun he insurat duen te kesuguan he imbilinbilin dengan ni Moises wey is insurat dengan te ebpemeneuven te Megbevayà. ¹⁵Is edtuuwan kayi te menge etew, edtuuwan ku zaan su edtuu a he is Megbevayà, ebenhawen din keuzemà is langun he etew, se meupiya is ulaula zin se mezaat is ulaula zin. ¹⁶Ne

edhemenan ku is minge meupiya he minge vaal su wey wazà igkesewayi kedì te minsan hentei he etew lavew en is Megbevayà. ¹⁷Umba midhendiyà a te Hiruselim su nepipire en he tuig is wazà a mekehendiyà. Midhendiyà a su wey ku ikehated is selapì he idtavang diyà te minge zuma ku he Hudiyu wey a zaan mekepemuhah diyà te Megbevayà. ¹⁸Ne zutun te ed-ul-ulahan ku en heini, neehè e zan diyà te simbahan he Valey te Megbevayà dutun te nepasad ku en is betasan dey te kegkelumpiyuwi. Wazà mezakel he etew he zuma ku; ne wazà daan edsinamuk. ¹⁹Iyan, duen minge Hudiyu he tig-Asya he zutun daan; deyzey ke iyan sikandan med-etuvang kenikew emun duen igkesumbunga zan kediey. ²⁰Ne heini zaan is minge etew he edsumbung kedì guntaan, meupiya ke ibpesavut dan en kenikew ke hengkey is salè ku he netueanan dan hein impeetuvang e zan te minge ebmegurangan. ²¹Su wazè dan netueanan gawas te imbensag ku he minge lalag diyà te kandan he ke siak te, ‘Iyan dà igkesumbunga niw kedì guntaan is kebpeketuu ku he egkengevanhew keuzemà is minge minatey!’ ”

²²Ne zutun midsirahan dè pa ni Felix haazà is husayen su nesayud sikandin he zaan ke hengkey is tuluuwen he midtuuwan te minge tumutuu ki Jesus. Ke sikandin te, “Wey ku en ibegey is kedì he hukum ke ebpekeuma si Kepitan Lisyas.” ²³Ne migkegiyan din sikan is serhantu he kenè din engkezi te ebantey si Pablo asal kinahanglan daan he elimahi zin sikandin ne egkehimu he ebpenumbelayan si Pablo te minge emigu zin ne egkehimu zaan he edtevangen dan sikandin.

Is Kebpelelagà ni Pablo wey ni Felix

²⁴Ne nepipira he andew zutun, midhendutun si Felix he miduma is esawa zin he Hudiyu he si Drusila. Ne impetawag din si Pablo ne mibpemingeg din si Pablo is ebpesavut kandin te kedtuu ki Jesu Kristu. ²⁵Ne zutun te kebpenurua ni Pablo te metazeng he ulaula, wey kebpurungi te ed-ul-ulahan wey is kebpeebuta te andew te kedsilut, nahandek si Felix ne ke sikandin te, “Ereg ki en dè pa. Ibpetawag ku sikew ke zuen ku timpu.” ²⁶Egkesuatan pezem ni Felix he mebegey si Pablo te selapì diyà te kandin, umba layun din ibpetawag wey zin melelagi.

²⁷Ne hein dezuwa en he tuig dutun nekeilis si Pursyu Pistu ki Felix he gubirnedur. Ne si Felix, geina te egkesuatan din he wazà ibmezaat te gihinawa te minge Hudiyu kandin, wazè din libriya si Pablo.

Is Ked-imbistigaha ni Pistu ki Pablo

25 ¹Ne neketelu pa te kebpekeuma ni Pistu zutun te prubinsya he Hudiyu mid-awà sikandin diyà te inged he Sisarya ne midhendiyà te Hiruselim. ²Ne zutun, is minge punuan he memumuhah

wey is minge egalen te minge Hudiyu, midtudtul zan ki Pistu is insumbunga zan ki Pablo. Inhangyù dan ki Pistu ³he emun meupiya zà te gehinawa zin kandan ne ipeuwit din si Pablo ziyà te Hiruselim. Umba midhangyù dan te iring kayi su wey zan meeyani si Pablo ziyà te ibayè din wey zan mehimetayi. ⁴Ne midtavak si Pistu te, “Diyè pa si Pablo pirisuwa te Sisarya ne geina te megaan e en edlikù diyà, ⁵ipezuma niw kedì is minge egalen niw su wey zan mekevaal te sumbung mehitenged kandin ke zuen mid-ulaula zin he mezaat.”

⁶Ne subra zà te sengesimana is ked-ubpà ni Pistu zutun ne midlikù en diyà te Sisarya. Ne hein nepawà mibpinuu zutun te hukmanan ne insugù din he ipeetuvang kandin si Pablo. ⁷Ne hein nekeuma si Pablo midlingutan sikandin te minge Hudiyu he ebpeumuun diyà te Hiruselim ne utew mezaat he ulaula is insumbunga zan kandin, iyan, wazè dan igkepaahà he tutuu is sumbung dan mehitenged kandin. ⁸Iyan, mibpengetezengan si Pablo he egkagi te, “Wazè e man mekesupak te kesuguan tew te minge Hudiyu, ne wazà a zaan mekesupak te simbahan tew wey lavew en is hadì tew he ziyà te inged he Ruma.” ⁹Ne zutun si Pistu, geina te iyan gustu zin he mebmeupiya is gehinawa te minge Hudiyu mehitenged kandin, migkegiyan din si Pablo te, “Egkesuat ke ve he edhendiyà te Hiruselim su ziyè ku sikew ed-imbistigaha?” ¹⁰Ne midtavak si Pablo te, “Kayi a guntaan te hukmanan sumalà is belaud ni Cesar te hadì tew ziyà te Ruma ne iyan heini hustu he ed-imbistigahan kedì. Ne netuenan nu he wazà mezaat he mid-ulaula ku ziyà te minge Hudiyu. ¹¹Emun nekesupak a te velaud pinaagi te mid-ulaula ku he zait he igkehimetayi kedì, ne kenè ku zaan ed-engkezan is silut kedì. Iyan, ke kenà tutuu is minge insumbunga zan kedì wazà minsan hentei he zuen gehem he ebpalad kedì diyà te kandan. Ne tenged kayi egkesuatan ku he iyan ed-imbistiga kedì si Cesar is hadì tew ziyà te Ruma.” ¹²Ne zutun mid-insaan ni Pistu is minge sumesambag din ne human din kegiyi si Pablo te, “Geina te ebpeimbistiga ka te hadì tew ziyà te Ruma, ibpeuwit ku sikew ziyà te kandin.”

Is Kebpelelagà ni Pistu wey ni Hadì Egripa

¹³Ne nepipira he andew zutun, nekeuma ziyà te Sisarya si Hadì Egripa wey is esawa zin he si Birinisi su edtelavuk dan ki Pistu. ¹⁴Ne nekepira pa zutun impesavut ni Pistu ki Egripa is kasu mehitenged ki Pablo, ke sikandin te, “Duen pirisu kayi he wazà libriya ni Felix. ¹⁵Ne hein midhendiyà a te Hiruselim zuen minge sumbung mehitenged kandin te minge punuan he memumuhat wey minge ebmegurangan te minge Hudiyu. Ne midhangyù dan he hukumi ku sikandin te kemetayen. ¹⁶Ne migkagi ku kandan he sikami is minge Rumanu, kenè dey igkepalad is etew he insumbung ke wazè pa sikandin mekeetuvang

te menge midsumbung kandin su wey sikandin mekepengetezengan. ¹⁷Ne hein midhendini zan te Sisarya wazà a medlanganlangan su hein nepawà dutun, nekepinuu a ziyà te hukmanan ne insugù ku he ipeetuvang sikandin diyà te kedì. ¹⁸Ne zutun mid-etuvang daan is menge midsumbung kandin. Ne kunaan ku ke iyan insumbunga kandin is menge mezaat he salà, iyan, wazà. ¹⁹Su iyan dà ingkepeuki zan kandin is menge tuluuwen din he kenè dan edewaten. Ne elin daan ingkepeuki zan is egkegiyen ni Pablo he nevanhew sikan is etew he egngezanan ki Jesus he minatey en. ²⁰Ne geina te wazà egketuenan ku he paagi te kedhusaya ku kayi, mid-insaan ku si Pablo ke egkesuatan din be he edhendiyà te Hiruselim wey ku sikandin meimbistiga zutun. ²¹Iyan, migkagi sikandin he ebpeimbistiga sikandin te hadì tew ziyà te Ruma su wey iyan mekehusey kayi is hadì. Umba, insugù ku he kenè pa sikandin ibpeguwà te pirusuan taman te kenè ku pa igkepeuwit diyà te hadì.” ²²Ne zutun migkagi si Egripa ziyà te ki Pistu te, “Egkesuatan ku he mezineg ku zaan is menge ketezengan din.” “Ne keeselem nu egkezineg,” ke si Pistu.

Is Ked-etuvang ni Pablo Ziyà te ki Hadì Egripa

²³Ne hein nepawà nekeuma si Hadì Egripa wey si Birinisi he midsuluvan sikandan te bisti te hadì wey bisti te singyuda ne midseled dan dutun te hukmanan. Ne midseled daan dutun is menge kepitan te sundaru wey is menge telehuzen he etew zutun te inged dan. Ne zutun insugù ni Pistu he ipeseled si Pablo. Ne hein dutun en si Pablo, ²⁴migkagi si Pistu te, “Hadì Egripa wey is langun te sikiyu he nengetigum kayi, ahaa niw heini is etew. Midhangyù kedì he ebpememensag is langun he menge Hudiyu zini te Sisarya wey ziyà te Hiruselim he pehimetayi ku sikandin. ²⁵Iyan, hein midsusi ku, wazè ku netuenan he mid-ulaula zin he zait he igkehimetayi kandin. Ne geina te ebpetavang te hadì tew ziyà te Ruma, neisip ku he ibpeuwit ku sikandin diyà te hadì. ²⁶Ne wazà ketezengan he igkesurat ku mehitenged kandin he zait he idhendiyà te hadì tew. Umba ibpeetuvang ku en keniyu guntaan lavew en diyan te kenikew, Hadì Egripa, su wey zuen igkesurat ku ke egkeimbistiga nu sikandin. ²⁷Su henduen be te wazà utew pulus emun ibpeuwit ku heini is pirusu ziyà te hadì ne wazà daan ipesavut kandin ke hengkey is insumbunga kandin.”

26 ¹Ne migkagi si Egripa ziyà te ki Pablo te, “Egkehimu en he ibpesavut nu kenami is menge ketezengan nu.” Ne si Pablo, imbayew zin is belad din *he tuus te egkagi en* ne ke sikandin te, ²“Hadì Egripa, utew ku ingkelipey is kebpeketuvang ku kenikew guntaan wey ku ikepezineg is menge ketezengan ku tenged te langun he menge sumbung te menge Hudiyu mehitenged kedì. ³Iyan ingkelipey ku su geina te nepurung nu mesavut is menge kegkesumpakì wey vetasan tew

te minge Hudiyu. Umba edhengyuen ku kenikew he peminega nu is egkegiyen ku.

⁴Is langun he minge Hudiyu, netuenan dan ke hengkey is minge ulaula ku puun pa te zeisek e pa su ziyà a medekelà duma kandan diyà te inged ku wey ziyà daan te Hiruselim. ⁵Netuenan dan wey igkevenari zan emun egkezawat te gehinawa zan he puun pa te menguhed e pa, Perisiyu e en. Ne emun Perisiyu, utew meheget is kedtumana zin te tuluuwen tew te minge Hudiyu. ⁶Ne guntaan dini ad te etuvangan nu tenged dà te edtuuwen ku he egketuman keuzemà is impesarig dengan te Megbevayà diyà te minge kepuun tew. ⁷Ne sikitew is tivuuk he kehudiyuwan he nevahin te sepulù wey zezuwa he tribu, edtuuwan tew he egketuman heini. Ne tenged kayi, te andew wey mezukilem ed-azap kiw te Megbevayà. Na, Mahal he Hadì, minsan te iyan heini midtuuwan ku zaan, migamit dan he insumbunga zan kedì. ⁸Sikiyu is minge zuma ku he Hudiyu, maan is kenè kew ebpeketuu he ebenhawen keuzemà te Megbevayà is minge minatey?

⁹Ne siak, kunaan ku zengan ke iyan ebpevelan kedì te Megbevayà is ed-ul-ulahan ku is taman te egkehimu ku su wey maawà diyà te minsan hentei is kedtuu zan ki Jesus he tigNeserit. ¹⁰Iyan heini mid-ulaula ku ziyà te Hiruselim. Mibegayan a te minge punuan te minge memumuhat te kegehém ne mibpirisu ku is mezakel he minge tumutuu te Nengazen. Ne hein neisip te minge ebmegurangan dey he zait sikandan he edhimetayan, mid-uyun a zutun. ¹¹Kenè en egkepangkus is kebpsiluti ku kandan diyà te minge simbahan su ebpegesen ku pezem sikandan he engkezi zan is kedtuu zan. Ne tenged te utew ku sikandan nepeuki, mid-alew ku sikandan minsan diyà te minge meziyù he inged wey ku sikandan mesiluti.

¹²Ne tenged dutun midhendiyà a te inged he Demasku is ed-uwit te surat he kemetuuzan te gehem he imbegey kedì te minge punuan he memumuhat. ¹³Na, Hadì Egripa, hein diyè e pa te zalan ne neudtu is andew ne midtik-awan a enlagi te utew merayag kenà is andew. Ne ziyà haazà ebpuun te langit ne neketanà diyà te renged dey te minge zuma ku. ¹⁴Ne sikami is langun, nepiley key ne nezineg ku is egkagi te kinegiyan he Hibriyuhanen te, 'He Seulu, maan is ebpesipelahan a kenikew? Edlised ka su wazà pulus te kedsukul nu kediey.' ¹⁵Ne ke siak te, 'Hentei ka?' Ne midtavak is Nengazen te, 'Iyan a si Jesus, is ebpesipelahan nu. ¹⁶Enew ka. Mibpaahà a kenikew wey ku sikew mehimu he suluguen ku. Tudtula nu ziyà te zuma he minge etew is kebpeehè ku kenikew guntaan wey tudtula nu zaan is ibpeehè ku zaan kenikew keuzemà. ¹⁷Ebentayan ku sikew ne kenè ku idtugut he mekeizi ka te minge Hudiyu wey te kenà minge Hudiyu. Ne edsuguen ku sikew ziyà te minge etew he kenà Hudiyu. ¹⁸Ne is ibpesavut nu kandan, egkehimu he iyan igkeawà te kegelakap dan te kedtuu wey zan

daan meewai is merusirem ne medhalin dan diyà te merayag. Ne pinaagi kayi egkepeleguyan dan is kebeyveyai kandan ni Setanas ne ebpekesakup dan te Megbevayà. Ne egkepesaylu is menge salè dan tenged te kedtuu zan kedì ne egkehimu zan daan he menge tumutuu he pinilì te Megbevayà.’

¹⁹Na, Hadì Egripa, midtuman ku is impeehè kedì he ebpuun te langit. ²⁰Midhuna a ziyà te inged he Demasku ne human diyà te Hiruselim. Ne zutun mid-eneb ku is prubinsya he Hudiya ne midhendiyà a zaan te menge etew he kenà menge Hudiyu. Impesavut ku kandan he kinahanglan he iniyugi zan is menge salè dan, ne medtuu zan te Megbevayà ne ipeehè dan pinaagi te ulaula zan he tutuu is ked-iniyugi zan te mezaat he ulaula. ²¹Ne tenged kayi te impenurù ku midakep a te menge Hudiyu ziyà te simbahan he Valey te Megbevayà ne edhimetayan e zan pezem. ²²Iyan, taman en guntaan midtevangan a te Megbevayà umba zini ad guntaan te etuvangan niw. Ne ibpenurù ku heini is langun diyà te minsan hentei, dekelà is pid-etawan din se zeisey is pid-etawan din. Ne is ibpenurù ku, iyan ded sikan is netagnà dengan ni Moises wey kes ebpemeneuven te Megbevayà, ²³su netuman en is netagnè dan he is mibpilì te Megbevayà he ibpahadì, kinahanglan he edresayen wey edhimetayan. Ne netagnè dan daan he iyan sikandin egkehuna he egkevanhew ne edtudtulan din is menge Hudiyu wey is kenà menge Hudiyu he egketeyawan is isip dan te tutuu he tuluuwen.”

²⁴Ne te kemulu pa egkagi si Pablo te iring dutun, nekevensag si Pistu, ke sikandin te, “Pablo, ebunegen ka! Iyan ibunega kenikew is utew subra he istudyu nu.” ²⁵Ne midtavak si Pablo te, “Minahal he Pistu, is lalag ku, kenà lalag te ebunegen, kekenà, tutuu. ²⁶Sikew, Hadì Egripa, kenà a egkelenew he egkagi kenikew su netuenan ku he netuenan nu he zaan is langun he egkegiyen ku. Netuenan nu iyan su heini is nengeulaula, wazà mekeeles. ²⁷Hadì Egripa, edtuuwan nu ve is nengetagnà dengan te ebpemeneuven? Netuenan ku he neketuu ka.” ²⁸Ne zutun midtavak si Egripa te, “Kela ke kunaan nu ke egkegaanggaan a kenikew egkehimu he tumutuu ki Kristu!” ²⁹Ne ke si Pablo te, “Sikew wey is langun he ebpeming kedì guntaan kayi, id-ampù ku te Megbevayà he menaney se megaan, himuwa kew zin he iring kedì, iyan, kenè kew mulà mepirisu!”

³⁰Ne zutun, haazà is hadì wey is gubirnedur wey si Birinisi wey menge zuma zan, midhitindeg su ed-ulì dan en. ³¹Ne zutun te kegenat dan mibpelelagè dan is egkagi te, “Wazà ulaula zin he zait he igkehimetayi kandin wey minsan igkepirisuwa kandin.” ³²Ne migkagi zaan si Egripa ziyà te ki Pistu te, “Angin ke kenà sikandin ebpeimbistiga te hadì diyà te Ruma su egkehimu en he ibpaawà.”

Is Kedhendiyà ni Pablo te Ruma

27 ¹Ne hein neisip dan he ibpeuntud key en te barku su ibpeuwit key ziyà te Italya, impalad dan si Pablo wey is duma pa he pirisu

ziyà te ki Julio. Si Julio, serhintu sikandin te kumpeniya te sundaru he egngezanan te Kumpeniya te Lavew he Hadì. ²Ne ziyà te Sisarya zuen barku he tig-Edremityu he edhendiyà te minge inged diyà te prubinsya he Asya. Ne mid-untud key ne migenat key. Is дума zey, ne iyan si Eristarku he tigTiselunika ziyà te prubinsya he Mesidunya. ³Ne hein nepawà, nekezunggù key ziyà te Sidun, ne si Julio, midtulengezan din si Pablo su midtugutan din he mekepenumbaley sikandin diyà te minge emigu zin dutun wey zan mevegayi te egkinehnglanan din. ⁴Ne mid-awè key ziyà, ne geina te kenè dey egkehimu te edsinugung is bendes te keramag, diyè key mebayà te zivaluy te pulu he Sipru he egkeelangan haazà is keramag. ⁵Ne hein nekerapas key en te zagat he ziyà te uvey te minge prubinsya he Silisya wey Pempilya, midunggù key ziyà te inged he Mira he ziyà te prubinsya he Lisyà. ⁶Ne zutun, nekeahà is serhintu te sevaha he barku he tig-Elihendriya he edhendiyà te tanà he Italya ne impeuntud key zin.

⁷Ne utew menaney haazà is hipanew zey ne nepipira he andew zutun ne human key mekelavey te inged he Nidu asal neregenan key. Ne geina te kemulu zey pa egkesinugung is bendes te keramag, midhalin key te ibayà ne ziyè key mebayà te zivaluy te pulu he Krita he egkeelangan haazà is keramag, ne midlevayan dey is beyvey he egngezanan te Salmun. ⁸Ne wazè key mebbekeziyù te veyvey ne utew meregen is hipanew zey. Ne hein neuget nekezunggù key ziyà te egngezanan te Memeupiya he Dungguan he uvey te inged he Lasya.

⁹Ne geina te utew en neuget is hipanew zey, nesepeinan key te mezaat he timpu te kedlayag su tipenguzan; ne piligru en haazà is hipanew te barku. Umba midsembagan sikandan ni Pablo te, ¹⁰“Henduen be te zuen egkehita vù kenitew ke edlaus kiw. Egkezeetan heini is barku wey is karga ne zuen daan ebpatay kenitew.” ¹¹Iyan, is serhintu zutun, wazè din peminega haazà is sambag ni Pablo su midsarig te lalag te kepitan wey lalag te tegigaked dutun te barku. ¹²Ne is dungguan dutun, kenà meupiya he edsevukan te barku emun tipenguzan. Umba, iyan egkesuatan te kezekelan te minge zuma zey is edlaus key en wey key mekeuma ziyà te Pinisi ke egkehimu. Su is Pinisi, dungguan diyà te pulu he Krita he neelangan is keramag ne zutun is meupiya he edsevukan te barku taman te egketapus haazà is tipenguzan.

Is Bagyu Ziyà te Zagat

¹³Ne zutun ebpuun en ebpengeramag, asal kenà mevendes he ziyà ebpuun te zapit te Libya. Ne kunaan dan ke iyan edtuman is neisip dan, umba midtines dan is perivatu zutun te barku ne migenat key. Ne wazè key mebbekeziyù te veyvey te pulu he Krita. ¹⁴Ne te wazè pa utew meugut dutun, mibegyuan key. Nekeuma is utew mevendes he keramag

he egngезanan te Ebagat. Diyà ebpuun haazà is keramag te zapit te tanà. ¹⁵Ne nesugat is barku. Ne geina te kenè en ebpekeetuvang is barku zutun te keramag, mibpesagdan dey en ke hendei ed-uwita is barku te keramag. ¹⁶Ne hein diyè key en te uvey te pulu he Kewda, malù key neelangi te keramag. Ne zutun te utew key neregeni, netegel zey mekuwa is avang he eguyuzen te barku. ¹⁷Mibitbit dan ne in-untud dan. Ne zutun mibagkes dan haazà is barku te minge pisi su wey kenà mewagey. Ne geina te egkehandek dan su kela ke mewagey is barku ke mekesukung te memevavew he tanà he uvey zutun te veyvey te tanà he Libya, ne in-awè dan is layag ne mibpesagdan dan is barku ke hendei ed-uwita te keramag. ¹⁸Ne geina te kemulu pa is bagyu zutun te mid-ilis he andew, impuun dan impenimbag is minge karga zutun te barku su wey kenà melened. ¹⁹Ne te mid-ilis pa zutun he andew minsan is minge himan wey minge gelemiten te minge terebahanti zutun te barku, impenimbag dan en elin. ²⁰Ne seled te mezakel he andew wazà mebpaahà kenami is andew wey minge vituen ne wazè pa med-engked haazà is bagyu he utew mezesen. Ne zutun wazè dey en isipa he egkelibri key pa.

²¹Ne zutun, neuget he wazè dey nekaan ne midhitindeg si Pablo ne migkagi te, “Menge zuma ku, angin ke mibpemineg kew te sambag ku he kenè kiw ed-awà diyà te pulu he Krita, su kenè tew geina egkesegazan heini is hitavù kenitew. ²²Ne edhengyuan ku sikiyu guntaan he kenè kew mahandek su wazà minsan sevaha kenitew he egkepatay, iyan dà egkezeetan heini is barku. ²³Geina te mezukilem, is Megbevayà he iyan ed-ezapen ku, mibpaahà kedì is belinsuguen din, ²⁴ne ke sikandin te, ‘He Pablo, kenè ka mahandek. Kinahanglan he ziyè ka mekeetuvang te lavew he hadì diyà te Ruma. Ne is Megbevayà, tenged te gagew zin kenikew, intugut din daan he wazà minsan sevaha kayi te minge zuma niw he egkepatay.’ ²⁵Umba,” ke si Pablo, “kenè kiw egkehandek, su ebpekesarig a te Megbevayà he sumalà is impesavut din kediey, iyan egkehitavù kenitew. ²⁶Iyan dà is idampil kiw ziyà te sengepupulu.”

²⁷Ne zutun te ikeseputù en wey heepat he kezukileman te ked-uuwita kenami te vagy, diyè key en te zagat he egngезanan te Midityanyu. Ne hein metaneb en is kezukileman, is minge etew he ed-uwit te barku, neisip dan he kela ke zuen en tanà diyà te uvey zey. ²⁸Ne tenged dutun mid-ulug dan is sevaha he perivatu ne netuenan dan he minge keluwaan dà he repa is kezalem te wahig. Ne netegtegaad maan dutun mid-umanan dan ne minge sepulù wey lelima zà he repa is kezalem din. ²⁹Ne zutun nahandek dan su kela ke mekesukung haazà is barku te minge vatu, umba, inhiket dan is heepat he perivatu ziyà te huziyan he zulung dutun te barku. Ne egkesuatan dan pezem he mepawè en haazà. ³⁰Ne is minge terebahanti zutun te barku, ed-ewaan key zan pezem te ebpemelaguy puun dutun te barku. Impenaug dan is avang ne mid-ekalan key zan he egkagi zan he ebperivetuwan dan

haazà is dulung he edhuna. ³¹Iyan, migkagi zutun si Pablo ziyà te serhintu wey menge sundaru zin te, “Emun ed-ewaan kew te menge terebahanti kayi, kenè kew en egkelibri.” ³²Ne zutun, migetas te menge sundaru haazà is menge pisi he inhiket dutun te avang wey maanud haazà is avang.

³³Ne hein megaan en egkepawà, midhengyuan ni Pablo sikandan is langun he megkaan dan. Ke sikandin te, “Sepulù en wey heepat he andew is kebpekeantus tew te kegkehandek ne wazà meselezi is getek tew te minsan hengkey. ³⁴Edhengyuan ku sikiyu he megkaan kew su wey kew metegui te zesen su wey kew melibri kayi. Su wazà minsan sevaha keniyu he kenà egkelibri kayi te egkeulaula tew.” ³⁵Ne te nekagi ni Pablo haazà, migkuwa te supas ne mibpeselematan din te Megbevayà ne mibpenevitevi din ne migkaan din. ³⁶Ne zutun naawà is kegkeseeng dey ne langun te sikami, migkaan key zaan. ³⁷Ne is kezakel zey te menge etew zutun te barku ne zezuwa key he gatus wey kepituwon wey heenem. ³⁸Ne hein nengehantey key en pudu, intimbag dan diyà te zagat is karga zutun te barku he vegas te trigu su wey mebmahagkap haazà is barku.

Is Kegkezeeti Zuen te Barku

³⁹Ne hein nepawà dutun, haazà is tanà he neuvayan dey, wazà mekilala te menge terebahanti zutun te barku. Neehè dan is nekesuyuk he zagat ne zuen dutun beyvey he pantad. Ne neisip dan dutun he ke egkehimu, meupiya ke igkepezunggù dan haazà is barku. ⁴⁰Ne zutun migetas dan is menge pisi he inhiket dutun te menge perivatu su wey metagak is menge perivatu, ne mibpenhekad dan is menge vagkes dutun te menge vegsey he idtandang dutun te barku su egemiten dan. Intaud dan is layag he ziyà te egkehuna he zulung su wey meuwit te keramag is barku pehendutun te tanà. Ne zutun migenat is barku. ⁴¹Ne nekesukung haazà is barku te mevavew he tanà ne mid-enget. Is egkehuna he zulung kenè en egkewaleng, iyan, is huziyan he zulung egkerupet en te kezesen te zezekelà he menge vagel.

⁴²Ne neisip te menge sundaru he ebpenhimetayan dan is menge pirisu su wey kenè dan mekegaun dutun te veyvey ne kenè dan egkepeleguyan haazà is menge sundaru. ⁴³Iyan, is serhintu, kenè din egkesuatan he mehimetayi si Pablo ne wazè din itugut he mehimetayi sikandan. Insugù din he med-agbur is metau he ed-emparas wey mekegaun, ⁴⁴ne is kenà metau he ed-emparas, megegentungan te menge tabla wey te nengerupet he pengawid te barku ne medsunud dan. Ne mid-ulaula zey haazà. Ne sikami is langun, nekegaun he wazà nekeizan kenami.

Si Pablo Ziyà te Malta

28 ¹Ne hein nekegaun key he wazà nemenu kenami, netueanan dey is ngazan dutun te pulu ne Malta. ²Ne is menge meginged

dutun, utew key zan midtulengezi. Ed-uzan dutun ne utew megenew ne midtetavun dan. ³Nengayu si Pablo ne zuen ibpenavuk din he kayu ziyà te hapuy ne zuen mevisa he uled he neinitan he ebpuun dutun te impenavuk din he kayu. Ne migkagat diyà te velad ni Pablo. ⁴Ne is menge etew he meginged dutun hein neehè dan haazà is uled he mibpikit diyà te velad ni Pablo, mibpelelelagè dan he egkagi te, “Memumunù bes heini su maan is wazà sikandin mekelikey te silut kandin; su minsan te nelibri en sikandin, su wazà melened diyà te zagat, egkepatey gihapun.” ⁵Iyan, bà dà impirik ni Pablo haazà is uled ne neulug dutun te hapuy ne wazà sikandin mekeizi te uled. ⁶Kunaan dan ke zutundutun ne segugunà edlevag is belad ni Pablo ne egkepiley ne segugunà egkevinteng. Iyan, hein netegtegaad dutun he wazà nehitavù ki Pablo, nahalin is isip dan ne ke sikandan te, “Diwata ves heini sikandin.”

⁷Ne uvey zutun is menge tanà ni Publiyu he iyan edlingahaan dan dutun te pulu. Impepemenahik key zin dutun te valey zin ne mid-elimahan key zin. Ne zutun key med-ubpà taman te tetelu he andew. ⁸Nezeruwan is amey ni Publiyu. Edhidhizegà su edetengen wey mesakit is getek din. Ne midseled si Pablo zutun te rugu zin ne in-ampù din. Midepenetan din haazà ne neulian. ⁹Ne hein netuenan haazà te menge etew, midhendutun is langun he nengezeruwan dutun te pulu ne nengeulian daan sikandan. ¹⁰Mezakel is menge vutang he inggasa zan kenami, ne hein mid-untud key en maan te selakew en he barku, ingkarga zan daan dutun te barku is minsan hengkey he egkinehnglanen dey.

Is Kebpekeuma ni Pablo Ziyà te Ruma

¹¹Hein tetelu en he vulan is ked-ubpè dey zutun ne midlaus key. Mid-untud key te barku he zutun mekeubpà tenged te tipenguzan. Tig-Elihendriya haazà is barku ne iyan igketuusi ta zutun su ziyà te zulung din is ledawan te sereping he ziwata. ¹²Ne midtuluy key ziyà te inged he Sirekusa, ne neketelu pa zutun ¹³midlaus key ne nekeuma key ziyà te inged he Rihiyu. Ne hein mid-ilis he andew mibpengeramag. Ne haazà is keramag, diyà ebpuun te imbayè dey ne nekezuwa pa zutun, ne nekezunggù key human diyà te inged he Putiyuli. ^{14,15}Duen menge tumutuu zutun he neuma zey ne mid-egut key zan he med-ubpè key ziyà te kandan seled te sengesimana. Ne zutun midlaus key medhipanew pehendiyà te Ruma. Hein nezing te menge tumutuu ziyà te Ruma he ebpekeuma key en, midsinugung key zan diyà te mirkadu ni Apio wey zuen daan diyà te egngезanan te Tetelu he Valey he Hulevungà. Ne hein naahà sikandan ni Pablo mibpeselamat sikandin te Megbevayà ne neteguan sikandin te kebpekesarig ne zutun nekeuma key human diyà te inged he Ruma.

¹⁶Ne hein diyè key en te Ruma wazà si Pablo iseled te pirusuwan, kekenà, impeveyàbayà sikandin ke hendei ed-ubpà, asal zuen sundaru he ebantey kandin.

Is Kedwali ni Pablo Ziyà te Ruma

¹⁷Ne neketelu zutun te kebpekeuma zey mibpenenawag ni Pablo is menge egalen te menge Hudiyu he medtigum dan. Ne hein netigum dan en migkagi si Pablo ziyà te kandan te, “Menge suled, minsan te wazè ku pesipelahi is menge zuma tew he Hudiyu ziyà te Hiruselim ne wazà a zaan medsupak te menge vetasan he imbilinbilin kenitew te menge apù tew, mibpirisu e zan ne impalad e zan diyà te menge upisyal he Rumanu. ¹⁸Ne is menge Rumanu, mid-imbistige e zan ne ibpaawè e zan pezem su netuenan dan he wazà mid-ulaula ku he zait he igkehimetayi kediey. ¹⁹Ne hein kenà egkesuatan te menge zuma tew he Hudiyu he ipaawà a, ne geina te wazà ku zaan duma he paagi, ebpetavang a te hadi tew zini te Ruma, minsan te wazè ku igkesumbunga kandan te menge zuma ku he Hudiyu. ²⁰Umba mibpenenawag a keniyu su wey a mekepekidlalag keniyu. Su nepuasan a tenged te kedtuu ku te hadi he ibulus he ebpeebuten tew te menge Hudiyu.” ²¹Ne migkegiyan dan si Pablo te, “Wazà surat he nezawat dey he ebpuun diyà te prubinsya he Hudiya he ebpesavut mehitenged kenikew. Ne wazà daan nekeuma he zuma zey he ebpuun diyà te Hudiya he zuen din tudtul mehitenged te mid-ulaula nu he mezaat. ²²Egkesuatan dey te ebpemineg is menge penurù nu wey zey mesusi su netuenan dey he is menge tumutuu kayi te tuluuwen he ibpenurù nu, egkuntedahan te menge etew ziyà te minsan hendei.”

²³Ne midtelaan dan is andew ne hein netuman haazà, mezakel is menge Hudiyu he nengetigum dutun te ed-ubpaan ni Pablo. Ne nehepunan si Pablo is edseysey wey ebpesavut kandan ke egkemenumenu is kedhadì te Megbevayà. Impesavut din kandan is insurat dengan ni Moises dutun te kesuguan wey is insurat daan te ebpemeneuven te Megbevayà su wey meketuu sikandan he iyan si Jesus sikan is hadi. ²⁴Ne is duma zutun neketuu te migkagi zin, iyan, is duma, wazè dan meketuu. ²⁵Ne geina te kenè dan egkeuyun, ebpemen-uli dan en. Ne te kemulu zan pa zutun, impelaus ni Pablo is lalag din te, “Uteu tutuu is migkagi zengan te Wagas he Mulin-ulin diyà te menge kepuun tew pinaagi te kebpeueva zin ki Esaias. ²⁶Su ke sikandin te,

‘Beyai nu heini is menge etew
ne kegiyi nu sikandan
he ebpurung dan ebpemineg,
iyan, kenè dan ebpekesavut.
Ebpurung dan edtengteng, iyan, kenè dan ebpekeahà.
Umba ibpekagi ku heini he menge lalag

27 su heini is minge etew,
 mibmezesen is isip dan.
 Edsebpengen dan is telinga zan,
 edlizepengen dan is minge mata zan.
 Su emun kenà, ne ebpekeehè dan
 ne ebpekezing dan ne egkesavut dan is hustu,
 ne edsarig dan kedì, ne ebewian ku sikandan.’”

28 Ne migkagi zaan si Pablo te, “Ibpe savut ku en keniyu he is tudtul te paagi te kekgelibriya te Megbevayà te menusiyà, insugù din he ipesavut heini zaan diyà te minge etew he kenà Hudiyu, ne ebpepinge dan mulà.”

29 Ne te nekagi ni Pablo haazà mid-awà is minge Hudiyu he utew gerabi is kekgesumpaki dan.

30 Ne seled te zezuwa pa he tuig dutun, diyà med-ubpà si Pablo te valey he mibpilitiyan din ne impepemenahik din is minsan hentei he ebpenumbaley ziyà te kandin. 31 Impesavut din kandan ke egkemenumeni is kedhadì te Megbevayà ne impenurù din daan ke hentei is Nengazen tew he si Jesu Kristu. Ne wazè din ieles is kebpenerù din ne wazà daan midawey kandin.